

**NATIONAL ASSEMBLY OF
SEYCHELLES**

Tuesday 20th September, 2022

The Assembly met at 0901am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou *staff* ki pe asiste nou. E tou nou manm piblik ki swiv nou an deor Lasanble. Byenveni pou en nouvo travay lasemenn.

Leader Biznes Gouvernman, Onorab Bernard Georges in demann, mwan pou fer en pti *statement* dan Lasanble e mon'n akord li. Onorab Georges ou annan laparol.

HON BERNARD GEORGES

Mersi Mr Speaker. Bonzour Mr Speaker. Bonzour tou bann Manm Onorab e tou dimoun ki pe swiv nou.

Mr Speaker mersi pou donn mon laparol bomaten. Mon'n demann ou permisyon pou mwan adres Lasanble. nou'n konpran bomaten ki en ansyen Minis dan Gouvernman oparavan, Minis Peter Larose in kit nou.

E mon ti anvi profit sa lokazyon lo lapar, lo nou kote Lasanble pou dir detrwa parol dan son loner. E an menm tan pou anmenn tou nou kondoleans avek son fanmir e bann dimoun ki in kit deryer.

Mr Speaker, Minis Larose ti en dimoun ki personnelman mon ti kontan bokou. E mon ti apresye son fason travay. Se ki'n anmenn mon bomaten demann ou permisyon pou mon dir detrwa mo.

Set en Minis bann Manm Sizyenm Lasanble ki ti aprouv son nominasyon.

Ou ava rapel en msye *humble, courtois*, touzour byen poze. En zonm entelizan avek en gran sans *fair play*. Annefe en fran teknokrat ki en gran pert pou sa pei.

Mr Speaker, Minis Larose ki'n annan en gran karyer dan *Banking* avek Finans. In fer Sesel fyer dan landrwa kot in travay.

In travay pou bokou lannen *Washington*. Bann lenstans enternasyonal *IMF World Bank*. E in anmenn Sesel en kantite lenformasyon, en kantite lentelizans, en kantite savwar fer ki in gannyen dan sa bann landrwa.

E sak fwa ki i ti vin devan Lasanble avek zis en pti leksepsyon, nou ti vwar en dimoun pare pou ede, e en dimoun ekstrememan kourtwa.

I ti en dimoun ki ti kontan trouv solisyon pou problemm. E nou, nou ti apresye sa bokou koman son kourt letan koman Minis, akoz bann problemm lasante pa'n permet li al pli lontan.

De pti keksoz finalman Mr Speaker, mon rapel ki ler Lakour, ler tou bann Ziz Lakour *COMESA* ti vizit Sesel, pandan ki Minis Larose ti Minis.

I ti resevwar nou avek gran ponp. E dan son biro i ti'n fer en gran preparasyon pou montre langazman Sesel avek sa Lakour, ki annan pou fer avek rezolisyon bann dispit komers.

E dan menm laliny i ti pouse pou ki 2 Seselwa, enn parmi mon koleg Mr France Bonte i ganny apwente lo Lakour *ICSID, International Centre for Resolution of Disputes, Washington*.

I ti anvi ki Sesel i pran son par dan lemonn. E pou sa son depar Mr Speaker i en gran lapert pou nou.

Alor an konklizyon, tou an remersye ou pou donn mwan laparol, mon ti a kontan lo nou kote latatab, eksprim tou nou kondoleans anver Nasyon Seselwa pou sa pert.

Me osi pli partikilyerman anver son fanmir pros ki i kit deryer. Mersi Mr Speaker.

MR SPEAKER

Mersi Onorab Georges. Onorab Pillay, eski ou ti ava anvi azout en keksoz lo la? Mon annan plezir donn ou laparol.

HON SEBASTIEN PILLAY

Mersi Mr Speaker. Mr Speaker sa i en nouvel ki vin koman en sok pou mwan. Pa zis akoz mon fonksyon ki mon annan dan Lasanble, me parske mon'n grandi pa lwen avek kot Dr Larose i reste.

E in war mon grandi. In war mon depi tre zenn az. In konn mon fanmir, mon konn son fanmir tre byen. E mon konnen poudir zot in toultan en fanmir ki kontan zot *privacy*.

I vremen difisil Mr Speaker, mon pa konnen ki mon pou dir vremen, akoz mon dan en leta sok.

Sanmdi menm mon ti pe koz avek son frer, i ti'n dir mwan poudir i ti'n *move* kot Lopital North East Point.

Sa ki mon annan pou dir Mr Speaker, se ki mon pou koz premyerman pou zabitan Glacis. Ki mon krwar nou tou nou, ki ti annan reste dan sa rezyon Dr Larose ti en sours bokou lafyerte pou nou, akoz son bann *achievement* ki in fer. Mon osi koz pou son garson ki ti lekol ek mwan dan menm laklas.

Enn son lot garson ki mon'n, an traver mon karyer mon'n travay, mon'n fer li lekol.

Mr Speaker, souvandfwa ler en Seselwa i akonplir bokou dan lavi, nou toultan bezwen reste *humble* a zefor e rezilyans ki sa dimoun in mete pou li kapab akonpli sa ki'n arive.

E mwan mon'n toultan annan en gran lapresyasyon pou Dr Larose. Akoz in toultan en dimoun ki'n siport mwan dan mon travay;- donn mwan *advice*. Menm parfwa in donn mon serten gidans.

E mon, nou vremen artiste Mr Speaker. Nou remersye li pou son kontribisyon. E mon swete ki dan sa moman lapenn son fanmir i kapab ganny konsolasyon avek bann bon moman ki zot in pase ansanm.

Onorab Georges avan mwan byensir pandan letan Kolez i bann dimoun ki zot enterakte pandan sa letan ki Gouvernman ti la. Mon bokou pli zenn.

In fer en tre bon leksplikasyon. E mon remersi li lo parkour ki Dr Larose in fer. me sa ki arive la i osi montre nou toultan finalite lavi.

E ki nou tou nou pa pou ganny eparnye avek sa lafen. E mon swete ki lakonplisman Dr Larose i reste en sours lenspirasyon pou bann zenn ki pe vini e ki pe monte.

E avek ou permisyon Mr Speaker, pou nou *United Seychelles* lo non *United Seychelles*, mon ti a kontan eksprim nou senser kondoleans e nou senser senpati avek lafanmir Dr Larose.

E mon ti ava kontan osi Mr Speaker zis, nou'n osi lo kote *United Seychelles* perdi en lot dimoun. E sa se Mrs Anne-Marie ki ti en aktivis.

Li ki'n siport nou. E i ti en dimoun ki ti annan bokou lafeksyon pou pous bann Manm Lasanble lo nou kote. Me i ti annan bokou lafeksyon pou son pei.

E Anne osi in kit nou, dimoun English River i konn li koman Pti Anne. So pou nou i en doub pert. E i en doub moman latristes pou nou lo nou kote latab.

Mon remersi ou Mr Speaker pou donn mon sans pou dir sa 2 pti mo.

MR SPEAKER

Mersi Onorab. Mon ava akout mon kondoleans personnel e osi kondoleans tou Manm Lasanble. e osi en omaz pou lakonplisman Dr Larose. Mersi.

Madanm Clerk nou annan en pti prezantasyon dokiman.

MADAM CLERK

Yes, Mr Speaker. Bonzour Mr Speaker. Bonzour tou bann Manm, tou bann *staff* Sekretarya. E tou dimoun ki a lekout.

Papye ki pe ganny prezante se maten i: -

S.I. 93 of 2022. Road Transport (designating and Testing of Devices) (Amendment) Regulation, 2022.

Mersi Mr Speaker.

MR SPEAKER

Mersi Madanm Clerk. Madanm raporter nou pare pou *Private Notice Question*. Ou ava apel Minis e son delegasyon silvouple.

Bon bonzour en byenveni *Designated Minister* Jean-Francois Ferrari. E Mr Ted Barbe, *Commissioner of Police* ki pe zwenn nou pou *Private Notice Question*.

Onorab *Leader* Lopoziyon ou *Private Notice Question* silvouple.

HON SEBASTIEN PILLAY

Mersi Mr Speaker. E bonzour tou dimoun ki a lekout. E bonzour tou koleg Onorab. Bonzour Minis Dezinyen avek Komisyoner Lapolis dan Lasanble Nasyonal.

Mr Speaker, avan mon demann mon kestyon, mon ti ava kontan fer kler ki an okenn ka ki mon parti pa kont lager kont trafik drog, oubyen lezot eleman anti-sosyal dan nou pei.

E mon krwar i nesese ki dan tou aksyon ki ganny pran, ki nou fer sir nou kestyonnen, e fer sir sa bann aksyon i ganny pran byen.

Mon kestyon i lir koumsa: -

Prenan kont ki in annan plizyer reaksyon par piblik Seselwa an zeneral, an sa ki konsern sa bann loperasyon kot in annan lafouy, larestasyon, e resaman menm grenad ki'n aparaman ganny servi, dan lentere rol ki Lasanble Nasyonal i annan pour rod leklersisman lo bann size ki pe preokip nou popilasyon, eski sa Lasanble i kapab ganny en leksplikasyon kler lo:-

Lekel lafors ki pe fer sa bann loperasyon? Konbyen dimoun ki'n ganny arete e konbyen lasezi drog ki'n ganny fer?

Eski sa bann loperasyon i baze lo lentelizans konkret e aköz ki dan bann

sirkonstans resan in annan konsern ki sa bann zofisye in menm antre an konfrontasyon avek dimoun tre aze e menm zanfan?

Trwazyenm, kan eski ki Gouvernman pou vin devan pou donn lenformasyon konkret lo kwa ki pe pase? e eski Gouvernman pou pran responsabilite pou okenn labi drwa imen ki kapab ganny komet pandan sa bann loperasyon?

Mersi Mr Speaker.

MR SPEAKER

Mersi Onorab. Minis ou larepons silvouple.

THE DESIGNATED MINISTER JEAN-FRANCOIS FERRARI

Mersi Mr Speaker. Mr Speaker mon ti ava konmanse par lo lapar mon bann koleg minis osi prezant mon senpati pou lafanmir Dr Larose pou son depar bomaten.

Mr Speaker, mon'n not *opening statement* ki Onorab *Leader* Lopoziyon in fer ki pa dan son kestyon. Me ki in dir ki son parti i siport lalit kont drog. Mon zos espere ki sa i pa zis en parol dan ler. Me i ganny tradwir an realite.

Mr Speaker, e tou Manm Onorab bonzour. Kestyon *Leader* Lopoziyon pe premyerman demann leksplikasyon e detay lo loperasyon ki Lapolis in fer resaman. E ki dapre li pe preokip nou popilasyon.

Avek ou permisyon Mr Speaker, mon a reponn sa bout lo preokipasyon.

Wi Mr Speaker, mon dakor avek Onorab ki popilasyon i preokipe avek sa ki pe arrive. Me la kot nou annan en gran diferans se ki pou Onorab, popilasyon i preokipe avek ki mannyer bann loperasyon pe ganny dirize, ki mannyer zot pe deroule.

Me nou lo nou kote, nou santi ki preokipasyon mazorite Seselwa i lo sa problem drog tre, tre grav ki pe ronz nou pei, ki pe detri nou lazenes, ki pe touy nou lafors travayer e ki pe detri fabrik

nou sosyete. Nou santi ki se la kot preokipasyon Seselwa i ete.

Wi, tou Seselwa i merit vreman preokipe e tou Seselwa i merit pe rod solisyon e met tou zefor posib pou elimin sa problem.

Malerezman, pa tou Seselwa ki preokipe dan menm fason. I annan ki atraver zot aksyon e zot kritik ki pa nesese e ki pa apropiye, dan sa moman, zot pe kas moral bann ki pe lite pou elimin drog dan Sesel.

I annan ki sitan preokipe pou rod sa ki mal, ki zot trouv zis bann febles dan tou loperasyon, plito ki rekonnet travay dir Lafors Lapolis e Lafors Militer. Zot zis pe pas zot letan kritik sa bann zonm ek fanm ki pe servi zot pei avek determinasyon e avek bokou kouraz.

Ser Manm Onorab, Prezidan Ramkalawan ti fer nou rapel en pe letan pase, ki fleo drog napa kouler politik. I pa konn krwayans relizye, i pa entere ek ou kouler lapo ni ou loriyantasyon seksyel. Problenm drog i afekte tou dimoun, tou fanmir san okenn distenksyon. Nou tou, dan nou fanmir, e mwan enkli. E nou tou ki isi dan sa Lasanble in arive ki nou'n bezwen fer fas avek enn nou frer, enn nou ser ouswa plizyer nou zanfan, ki'n pri dan sa kosmar.

Alors, la ki mon ganny sa loportinite ozordi, mon lans leko sa lapel fer par Prezidan Ramkalawan pou met tou nou diferans de kote lo sa size. E travay ansanm pou nou sov nou pei.

Nou pou ganny sans fer politik an 2025 ler 2025 i arive. Ozordi i pa le moman pou nou fer politik lo lalit kont drog. Ozordi i le moman pou Koste Seselwa, pou nou sov non zanfan.

Mon pran sa lokazyon alors, pou mwan remersye tou sa bann zonm ek fanm dan liniform, ki pe partisip dan sa bann loperasyon kont drog. Sa bann dimoun i bezwen nou lankourazman, zot pa bezwen zis ganny atake, kritike.

Wi, pa toultan ki tou keksoz i mars byen dan en loperasyon koumsa.

Me sa bann dimoun pe fer zot mye dan bann sityasyon vreman difisil.

Eski okenn parmi nou i vreman krwar ki en ser ouswa en frer Seselwa, i kontan pou li al fouy dan lakaz son vwazen? Eski i gou ler ou pe met en dimoun dan minot, ou pe aret li?

Non, sa pa gou, me i form parti louvraz Lapolis e ler zot pe fer zot louvraz, zot merit ganny ankouraze. Sirtou ler sa louvraz i enn ki sitan difisil.

Sa i fer mwan mazine konbyen fwa, ler nou rankontre avek Prezidan, Vis-Prezidan e bann koleg Minis, nou demande akfer nou, nou bezwen ganny maltrete, ensilte, ler nou pe travay sitan for pou nou pei e prosperite nou dimoun?

Ennler nou demande, zot pa war tou sa dibyen ki nou pe fer? Annou silvouple, aret war zis sa ki mal, zis bann pti fot. Tou sa drog ki nou'n sezi depi sa detrwa mwan, zot pa vwar? Tou sa bato ilegal ki nou'n sezi, zot pa war?

Nou rod lisyen spesyalize Larisi ek UAE, zot pa war ki nou pe travay dan sa direksyon pou nou elimin drog? Nou'n met trafiker dan prizon, zot pa vwar menm?

Ler en zournalis i vwar en *Jeep* Lapolis pe degaze *full speed* pou anmenn en zenn garson Lopital, akoz in ganny afekte par deboulir dan en loperasyon kont drog. Sa zournalis i demande si Lapolis in panik?

Akoz person pa mazine pou felisit sa zofisye? Pou li donn valer lavi en imen. Menm ler i dan en loperasyon difisil, i mazin son *training* e son devwar pou protez lavi.

Akoz nou vwar zis sa ki negativ e nou refize get sa ki pozitiv? Dan sa lalit, Lapolis pa nou lennmi frer ek ser Seselwa. Lapolis se nou zanmi e annou konmans tret zot parey zot merite. Koman nou zanmi.

Onorab i osi koz lo en grenad ki'n ganny itilize resaman. Onorab i en dimoun eksperyans e mon krwar ki konn diferans and en grenad ordiner ki

larme i servi dan lager, e en *stun grenade*’ ki Lapolis i servi pou kontrol lafoul.

Annou silvouple pa met konfizyon dan latet dimoun, pou fer krwar ki dimoun i kapab ganny touye dan sa kalite loperasyon.

Lapolis, Onorab, in ganny direktiv pou pran tou prekosyon nesaser, pou evite ki okenn dimoun i ganny blese. Me zot konnen osi ki personn pa pou anpes nou kontinyen sa lalit kot fleo drog.

Permet mwan Mr Speaker la ki mon pe fini mon lentrodiksyon, dir avek lepep Seselwa e bann dan sa Lasanble ki pa ankor dekouver la realite, ki sa konba kont drog i enn ki nob, enn ki nesaser e enn ki nou Gouvernman in determinen pou anmennen pou konbat.

Lalit pou drog, kont drog i pou long e i pou difisil. Me nou bezwen avanse. Nou napa swa. Nou pa pou les bann ki pou rezon politik ouswa rezon egois, ouswa rezon profi personnel, pou anpes nou bouz devan.

Kritik i bon, nou aksepte kritik ler kritik i zistifye. Me ler kritik i ganny servi tou le semenn, Mardi apre Mardi, zis pou met sa pei an retar, kritik pa bon. Wi, dimoun i preokipe pou vwar lafen sa fleo. E mon lans ankor en lapel pou tou Seselwa, ki annan bonn volonte pou donn nou en koudmen dan sa lager.

Lekel lafors ki pe fer sa bann loperasyon? Konbyen dimoun ki’n ganny arete e konbyen lasezi drog ki’n ganny fer?

Mr Speaker, Onorab *Leader* Lopoziyon dan son kestyon, mon pa konnen aköz, pa’n fer kler ki bann loperasyon i pe fer referans avek.

Si i pe fer referans avek sa enn Sanmdi pase, swa i le koz lo sa bann pou sa detrwa dernyen semen. Ouswa sa de dernyen lannen ki sa nouvo Ladministrasyon pe diriz pei.

I pa kler ditou. Alors I fer li difisil pou nou donn li bann sif avek presizyon.

Malgre sa, mon kapab donn li sa bann repons swivan.

Tou sa bann loperasyon relye avek lalit kont, kont trafik drog i ganny dirize par Lafors Lapolis avek lasistans Militer, ler sa i nesaser.

Se Lapolis ki enterakte avek piblik pou kestyonn zot, ouswa pou fer lafouy ouswa larestasyon. Vreman, mon pa konnen aköz zot ensiste lo sa size lasistans Militer.

Aköz sak fwa ki Lapolis i koz lo sa size, bann zofisye i repet menm zafer. Lapolis i planifye, i dirize, i egzekite e Militer is donn lasistans kan e zis kan sa i nesaser.

Bann Zofisye Militer i prezan pou zot aport sa sipor. Aköz leksperyans i montre ki sa bann loperasyon i vin avek en serten kantite risk.

Dimoun i regroupe, souvan pou anpes Lapolis fer son travay. Militer i sirvey sityasyon a en serten zistans e zot entervenir pou protez bann zofisye Lapolis si sa bann zofisye i dan danze. I annan en lokazyon kot Militer in entervenir ler en sispe ti pe esey sove.

Parey zot in vwar lo televizyon dan sa lensidan dan Kangard Plaisance. Person pa’n konplent nanryen ki mal ki Militer in fer.

Serten dimoun i konplent ki Lapolis in aret zot, me sa i travay Lapolis Onorab. Ler en zofisye Lapolis i demann ou pou *handover* en kouto e ou refize, sa i en lofans anba Lalwa. Ou pa kapab apre konplent ki ou’n ganny pez ater e ou’n ganny met dan minot! Se ou ki’n kas Lalwa. Se ou ki pa’n swiv direktiv Lapolis.

Konbyen dimoun ki’n ganny arete? *Leader* Lopoziyon i demande.

Mr Speaker, depi sa bann loperasyon pe deroule, plizyer dizenn dimoun in ganny arete ziska aprezan. Serten in ganny detenir pour detrwa zour apre zot ganny large. Me tou in ganny *processed* pou anmas lentelizans parey Lapolis i eksplike.

E apre sa, swa zot in ganny detenir pou pli lontan, swa large, swa anmenn Ankour pou rimann. Parey in ganny raporte dan Nouvel, in annan plizyer dimoun ki'n ganny anmenn devan Lakour. Dimoun in kondannen e i annan osi en bann ki pe esper pou pas devan Lakour.

Parmi sa bann dimoun, i annan sirtou bann trafikier. Akoz bit sa bann loperasyon se pa pou target bann pti dimoun, parey serten oule fer krwar. Me bit sa bann loperasyon se pou aret e demantibil bann *network* ki pe servi pou fer trafik drog dan nou pei.

Me pou lenformasyon Lasanble, pa tou loperasyon ki fini avek en lasezi drog ouswa en larestasyon. Me malgre sa, Lapolis i kontinyen anmas lenformasyon, swa atraver servi lisyen, swa atraver kolaborasyon avek bann vwazen e bann dimoun dan kominote.

Lalit kont drog i enn ki long, mon bann Onorab. I enn ki demann pasyans e perseverans. Tou pti bout ki nou anmase, i kapab demen permet nou pou konplet sa *puzzle* e elimin sa fleo.

E se la kot Lapolis i anmas son lentelizans. Sa lentelizans konkret ki Onorab *Leader* Lopoziyon in demande, ki neser pou zot kontinyen zot travay. Sa i mon reponn premye parti.

2enm kestyon ki lir koumsa: -

Eski sa bann loperasyon i baze lo lentelizans konkret, e akoz ki dan bann sironstans resan in annan konsern ki bann zofisye in menm antre an konfrontasyon avek dimoun tre aze e menm zanfan?

Sa i 2enm kestyon Onorab *Leader* Lopoziyon.

Ankor enn fwa Onorab avek respe, mon krwar ki i tronp problem. I war problem kot napa e i pa war problem kot i annan.

Onorab, mon pa konnen si ou'n deza fer vizit dan distrik pou ou konnen vremen ki kote e dan ki fason sa problem i manifeste.

Mon mazine ki ou pa pe sezi sa sityasyon kekfwa akoz ou, ou en politisyen ki pa'n zanmen met ou kandida pou eleksyon.

(Interruption)

MR SPEAKER

Order! Order! Minis kontinyen please.

THE DESIGNATED MINISTER JEAN-FRANCOIS FERRARI

Mon kapab kontinyen?

MR SPEAKER

Minis kontinyen please.

THE DESIGNATED MINISTER JEAN-FRANCOIS FERRARI

Mon mazine ki ou pa sezi sa sityasyon akoz ou, ou en politisyen ki pa'n zanmen met ou kandida pou eleksyon! Ou pa'n zanmen pas devan laport dimoun pou ou ganny en plas dan Lasanble!

Ou'n ganny en *free ticket* parey 2 lezot ou kole pou vin isi.

(Interruption)

HON SEBASTIEN PILLAY

Mr Speaker.

MR SPEAKER

Hold on. Minis. Order! Minis les mon dir ou ...

(Interruption)

MR SPEAKER

Order please! Onorab Loze mon donn ou en premye warning. Ok?

Mon pou adres sa sityasyon *order* dan Lasanble dan en pti moman.

Bann Onorab mon le premye koz avek Minis Dezinyen. Minis nou lo en size tre sansib, tre difisil. I neser ki nou war en fason pou nou anmenn

Lasanble ansanm pou *tackle* sa size. Alor mon pou demann ou pou evit bann komantr ki al lo politik e pozisyon bann Manm. E pou reste lo size silvouple.

E apre sa ler ou fini mon ava adres bann lezot Manm. Mersi.

THE DESIGNATED MINISTER JEAN-FRANCOIS FERRARI

Dakor. Mersi Mr Speaker. Mon leskiz si monn deranz travay Lasanble. Mon kontinyen. Wi Onorab, si nou tou nou ti konn larealite. Larealite lavi anba sa lanfer drog. Nou ti pou konnen ki drog i dan kominote. Drog pa kot Lorloz, ni dan *stadium*, ni lo *highway*.

Ler Lapolis i vin fer en lentervansyon, i bezwen antre dan kominote. E se la kot dimoun aze e zenn zanfan i reste. Se la malerezman ki laplipar komers drog i ganny fer.

E wi Onorab, nou merit konnen ki bann trafikier i servi nou vye granmanman e bann pti zanfan pou kouper zot latras.

Eski zot konnen ki Lapolis i vwar drog dan *pampers* zanfan?

Eski zot konnen ki Lapolis i vwar drog anba kousen, zorye kot granmanman pe asize?

Eski zot pa'n zanmen deza tann pti marmay pe kriy 'bloke' pou protez bann trafikier ler Lapolis pe aprozé?

Eski zot krwar se adilt ki anmenn drog dan lekol?

Eski zot pa war dan Nouvel ki se zanfan ki regroupe pou anpes Lapolis koste pou ki bann adilt i ganny letan evakye?

Eski zot demann zot lekor ki 25 a 30 pe fer dan en lakaz?

Ser Onorab, ser pep Seselwa, sa trafik drog i sal, i kriminel e i napa balizaz! Bann trafikier pou servi tou mwayen, menm zot zanfan, menm nou zanfan pou fer zot biznes.

Ki en zonn pa pou fer si i kapab anvoy en frer an otaz Iran o risk perdi son lavi? E i annan ki pa'n zanmen retournen.

Ler nou koz labous plen zot *human rights*, annou mazin en segonn *human right* sa bann ki'n ganny sakrifye dan sa trafik sal. Oli drwa sa pti baba ki en dimoun i anmas dan desbin aköz en problemn drog?

Oli drwa sa zenn fiy ki santi i bezwen vann son lekor pou li ganny son laliny? Se sanmenm sa kalite pei ki nou pa oule nou tonm ladan.

Kot i konsern sa Gouvernman ki la ozordi, mon dir klerman, ki nou pou fer tou sa ki nou kapab pou nou atak sa fleo!

(APPLAUSE)

THE DESIGNATED MINISTER JEAN-FRANCOIS FERRARI

Nou pou pran tou proteksyon ki neserer, me nou pa pou les personn anpes nou fer sa travay. Nou pou donn tou nou sipor Lapolis e lezot lafors dan liniform pou zot fer sa travay.

Sa lalit mon bann ser Onorab e piblik ki pe ekout mwan, Sa lalit an ka zot bliye, ti en promes dan nou Manifesto. E voter in swazir sa semen an 2020.

(APPLAUSE)

THE DESIGNATED MINISTER JEAN-FRANCOIS FERRARI

Gouvernman pe met an pratik sa sityasyon. Ni plis, ni mwens.

Mr Speaker, mon pou terminen par re vin ankor lo sa size plis lenformasyon konkret ki Onorab pe demande.

Zanmen Sesel in deza annan en Gouvernman ki pli transparan ki sa enn ozordi. Napa nanryen ki ganny kasyet e tou kestyon ki kapab ganny reponn i ganny reponn.

Par kont, si serten dimoun pe rod bann detay lo lentelizans e bann diferan teknik ki Lapolis i servi pou lalit kont sa fleo, nou regrete me i pa pou kapab gannyen.

Sa i lenformasyon ki Lapolis dan okenn pei dan lemond pa donn akoz i kapab prezidis bann lenformasyon fitir. E sa, mon pa krwar ki Onorab ti pou kontan.

An sa ki konsern pli spesifikman labi drwa imen, mon byen regrete, me sa Gouvernman ki la ozordi pa kapab aksepte sa kalite lakizasyon sorti kot dimoun ki pa'n *live up* to drwa imen dan lepase.

Wi, dan sa Sesel ozordi, dimoun i ganny arete, dimoun i ganny kestyonnen, dimoun i ganny deteni, zize. Me tousala i ganny fer anba Lalwa e avek respe pou Lalwa.

Erezman ki ler zot in pas an traver sa process zot retourn kot zot pou zot dormi. E zot pa disparet, ki zanmen zot in war zot lekor ankor.

Ozordi i annan ki pe ankouraz en zenn-onm pou fer son konplent ki in ganny grife lo son lebra e in ganny pez ater dan en loperasyon kont drog.

Nou pe ankouraz en madanm pou met en bandaz lo son lebra bomaten, me apre midi i donn en lot *interview* e son lebra i byen, napa okenn bandaz ni okenn problem.

Les mwan fer zot rapel ki detrwa lannen pase sete bate dan Prizon Gran Polis san zizman, e garde laba lo plezir sa Prezidan. Alors, Manm Onorab, annou balanse ler nou fer sa bann kalite akizasyon.

Lalit kont drog pou long e i pou difisil, me nou bezwen avanse, nou napa swa. Lo lapar Egzekitiv, mon lans lapel ankor enn fwa. En lapel pou en zefor Nasyonal. En lelan patriyotik.

I ti pou pli fasil pou nou dan Gouvernman pou nou get lot kote e inyor sa problem. Me i nou responsabilite konman en Nasyon pou regard bann trafiker drwat dan zot lize e dir avek zot ki nou pa pou zanmen aret lager kont sa trafik sal!

E nou bezwen fer sa travay nou tou ansanm. Akoz swa nou pou reisi ansanm, swa nou pou *fail* ansanm.

Nou konnen ki nou annan sipor en gran mazorite Seselwa dan sa lalit e nou remersye zot. Mersi Mr Speaker.

(APPLAUSE)

MR SPEAKER

Mersi Minis.

HON SEBASTIEN PILLAY

(Off-Mic)

MR SPEAKER

Onorab Pillay mon pa pe pran lo size la. Mon ti a kontan adres bann Manm. Mon konnen nou lo en size kontrovers, sansib e vremen politik.

Me selman mon bezwen ki sa Lasanble i deroul - e sa sesyon kestyonn annord. Mon annan 14 Manm ki'n lev lanmen. Alor mon santi poudir Lasanble i annan en gran lentere dan sa kestyonn. E mon pou prolonz peryod sa *Private Notice Question* pou bomaten.

Me selman mon pa pou kapab pran tou Manm ki'n lev lanmen, sa i evidan. Mon pa pou kapab. Mon pou pran serten. Aksepte sa.

Mon pou pas laparol avek serten Manm. Me mon pe demande ki kestyonn i reste annord. I reste lo size ki devan nou.

Si mon santi ki nou pe divage, nou pe al lo tou kalite size, nou pa pe reste lo kestyonn, mon pou bezwen termin sa sesyon kestyonn - par egzanp si i annan tro bokou repetisyon. E parey mon'n dir avan, bann Manm i permet fer en komanter ler zot entrodwir zot kestyonn. Me i en komanter kourt silvouple.

Mon demann tou zot korperasyon pou nou fer sa sesyon deroul annord. Mon pou -

HON SEBASTIEN PILLAY

(Off-Mic)

MR SPEAKER

Onorab Pillay mon pe pran lot size la.

HON SEBASTIEN PILLAY

(Off-Mic)

Mon annan en *matter of privilege* akoz i annan en *communication* ki'n ganny fer lo nou karakter.

MR SPEAKER

Ok, mon a pran ou *matter of privilege* apre. Mon pou pran kestyon Onorab Cosgrow premye.

HON SEBASTIEN PILLAY

(Off-Mic)

Avek ou permisyon mon ti a kontan klarifye en imputation ki'n ganny fer ...

MR SPEAKER

Mon ava donn ou laparol apre Onorab. Onorab Cosgrow.

HON WALLACE COSGROW

Mersi Mr Speaker. Bonzour tou dimoun ki a lekout. Bonzour tou Manm Onorab. I remarkab ki ler Gouvernman i annan serten keksoz pou kasyet zot anvoy Minis Ferrari pou vin fer en pe dezord dan Lasanble.

(APPLAUSE)

HON WALLACE COSGROW

Mr Speaker eski Minis pe dir nou ki poudir dan lalit kont drog - e dayer nou'n fer resorti poudir nou kont okenn trafik drog ki arive dan sa pei. Nou kont.

Me eski Minis pe dir nou, ki dan sa lalit kont drog, i pare pou servi okenn, nenport ki taktik, menm si i met nou vye paran a risk, nou bann zanfan a risk zis pou li kapab *achieve* sa ki i anv *achieve*? Eski se sa ki Minis pe dir nou?

Dezyenm Mr Speaker, eski Minis i kapab dir nou si dan sa bann loperasyon - sa bann dimoun ki pe fer sa bann loperasyon, eski i annan etranze dan sa bann lafors?

Akoz bann *account* bann dimoun zot dir i annan en dimoun ki donn lenstriksyon an Angle? So eski i annan etranze ki pe fer loperasyon dan sa bann landrwa kot zot pe rod lafouy drog silvouple? Mersi Mr Speaker.

MR SPEAKER

Mersi Onorab. Minis nou ava bezwen sey adres kestyon en pe bref direktman, akoz mon annan en kantite Manm ki pe demann kestyon. Mersi. Ou annan laparol.

THE DESIGNATED MINISTER JEAN-FRANCOIS FERRARI

Mersi. Mr Speaker mersi. Mersi Onorab pou ou kestyon. Mr Speaker, tou prekasyon i ganny fer pou nou protez lavi bann manman ek bann zanfan. Selman parey mon'n dir, drog i dan kominote, i dan bann lakaz. E souvan se dan sa bann landrwa laplipar letan kot drog i ganny trafike.

Alors malerezman menm si nou fer tou keksoz pou nou evite - e Komisyoner in dir mwan poudir dan lepase, par egzanp bann aktivite bann - ki mannyer zot dir sa - bann loperasyon pa ganny fer dan bann kominote pandan vakans, akoz zot konnen poudir i annan bokou zanfan ki dan lakour. Alor zot evite konmsi antre dan bann kominote dan sa bann moman ki en pe difisil.

Donk mon anv reasir ou Onorab, ki tou bann prekasyon i ganny fer pou nou protez sa bann dimoun. E nou pa pe fer nanryen pou met zot lavi an danze.

An sa ki konsern dezyenm kestyon Onorab, si i annan etranze? Mon lenformasyon ki mon annan se ki sa detrwa dernyen semenn in annan de enstriker Larisi ki'n vin avek bann lisyen sorti Larisi ki Larisi in donn pei.

E zot in deza fini kit pei apre ki zot in fer sa *handover* avek bann *handler* Seselwa. Mersi.

MR SPEAKER

Mersi.

HON SEBASTIEN PILLAY*(Off-Mic)***MR SPEAKER**

Onorab Pillay mon kapab demann ou pou pa enteronp sesyon silvouple?

Mon espekite ki ou donn legzanp. Mersi. Mon a donn ou kestyon Onorab Sandy Arissol.

HON SANDY ARISSOL

Mersi Mr Speaker. Bonzour Minis, bonzour tou dimoun ki a lekout.

Premyerman mon ti ava kontan felisit Minis, felisit mon Gouvernman avek Lapolis pou sa bon travay ki zot pe fer.

Mon kestyon ki mon ti ava kontan demann ou Minis, souvandfwa se bann manman oubyen bann granmanman ki soutir zot zanfan, pou *deal* avek bann zafer drog dan bann kominote. Parske senpleman zot per.

Alor kestyon ki mon ti a kontan demann ou, an vi ki Gouvernman in sanze e nou annan en nouvo travay nou pe fer, eski zot pe target tou dimoun oubyen zot konman en Gouvernman e zot konman Lapolis zot pe target serten dimoun an relasyon avek swa son kouler politik, swa zot pa byen ek sa dimoun oubyen en dimoun ki lontan zot in koz lo la ?

Oubyen zot pe fer travay zeneral pou elimin sa ki nou apel drog dan nou pei? Mersi Mr Speaker.

MR SPEAKER

Mersi. Minis ou repons.

THE DESIGNATED MINISTER JEAN-FRANCOIS FERRARI

Mersi Mr Speaker. Mr Speaker mersi Onorab.

Parey mon'n dir dan mon prezantasyon pou nou Gouvernman drog e trafik drog i afekte tou dimoun. I pa swazir ni kouler politik, ni larelizyon, ni o preferans seksyel ni okenn nanryen,

ni ou kouler lapo. E sirtou i pa ganny afekte par ou kouler politik.

Tou dimoun ki pran sa risk pou li antre dan trafik drog ki in *tick* anler, ki in *tick* anba i pou ganny trete menm fason!

(APPLAUSE)**THE DESIGNATED MINISTER JEAN-FRANCOIS FERRARI**

Akoz ler nou pe protez nou bann zanfan Onorab, nou pa pou fer okenn *compromise*. I enportan ki tou dimoun i konpran ki sa lalit i afekte tou dimoun, e tou dimoun ki responsab i pou bezwen pey le konsekans. Mersi.

MR SPEAKER

Mersi Minis. Mon ava pran kestyon Onorab Lemiel.

HON SYLVANNE LEMIEL

Mersi Mr Speaker. Bonzour Minis. Bonzour Mr Komisyoner Lapolis.

Mr Speaker, mwan konman en madanm, en manman e en *leader* dan en distrik, i vremen tous mwan mon osi letan mon vwar sa bann trafik ki pe deroule, pti zanfan, zenn fiy ki pe ganny afekte avek drog. Kot lekol i ganny anmennen. Nou pa konnen ki mannyer i ganny aranze tousala.

Parfwa nou paran petet nou merit pran nou responsabilite lo kote kot i konsern drog, trafik, *involve* nou zanfan dan sa bann keksoz koumsa.

Wi Minis atraver ou Mr Speaker, nou bezwen lite kont drog. E mwan konman sa fanm, sa manman, sa *leader* dan kominote mon *all for that*. Nou bezwen lite. E nou bezwen met en lafen avek.

E parey mon krwar nou tou lo sa kote latab parey *LOTO* in dir nou tou nou anvii vwar sa. Menm si petet ou pe mazin en nou pa senser. Mwan mon pe dir ou Minis atraver ou Mr Speaker, mwan mon senser dan sa ki mon pe dir.

E mon pou koz lo lapar mon bann koleg osi ki nou sener dan sa ki nou pe dir.

(APPLAUSE)

HON SYLVANNE LEMIEL

So Mr Speaker, dan nou pe anmenn pou met en lafen, mwan mon konsernen apard ki sa bann paran, ou Minis ou'n dir ki pe servi zanfan, sa nou konnen sa.

Akoz dan tou nou kominote i annan Mr Speaker. Nou servi zanfan, servi granmanman fer asiz lo la. Bann dimoun i vini i antre i le bouldoz granmanman. I le mon pa konnen ki pou fer avek sa zanfan.

Me Mr Speaker mon konsern la i se ki letan nou pe fer bann *raid* en pe parey ki fek pase, *ok* - konmsi ki mannyer nou fer e oubyen Lapolis eski zot pe mazin petet- Fot i arive, fot i arive imen sa ki pe travay. Me nou *learn by our mistakes ok?* So ki Komisyoner Lapolis petet avek son bann dimoun ki partisip dan sa bann *raids*, ki zot pe mazine petet pou minimiz en pti pe lenpak lo sa bann pti zanfan?

Akoz zanfan zot zaksyon, zot pe vini, zot pe regarde, konmsi pou minimiz lenpak. Enn, aksidan, e lot konmsi bann keksoz en pti pe pli mazer ki kapab arive avek sa bann manmay lo teren, letan en *raid* li menm pe ganny fer.

E sa i enkli pou bann madanm osi. Mon konnen parfwa i annan de madanm kontan vin vey zaksyon. Be solman konmsi ki nou fer pou nou minimiz lenpak danze e dimal ler i annan sa bann *raid* ? *Thank you.*

(APPLAUSE)

MR SPEAKER

Mersi Onorab. Minis mon vwar *ComPol* in lev lanmen. *ComPol* ou annan laparol.

THE COMMISSIONER OF POLICE TED BARBE

Mersi Mr Speaker. Bonzour tou bann Manm. Onorab parey in dir oparavan i en loperasyon. Drog i en zafer sansib li, *very sensitive*. E malerezman i pran en kantite letan pou *build up*. Sa *dealer* avek son tim *whoever, it is a big network* annefe.

Zot pran otan letan pou zot etabli zot. Me Lapolis osi i pran letan pou li anmas lenformasyon, lentelizans e *when it is right* nou tape. Nou fer sa loperasyon.

Me mon garanti ou poudir loperasyon ki pe ganny fer la, se bann dimoun in ganny *train, they know everything about* minimiz lenpak. Nou konnen keler pou fer.

Par egzant Minis in dir taler si nou konnen poudir dan vakans nou annan serten lenformasyon, nou sansire sa lenformasyon nou gete, i annan manmay *around* i annan serten keksoz nou fer *or* nou pa fer. Nou peze nou tant pou *weigh* sityasyon mannyer i ete.

Mon oule fer sorti osi savedir nou minimiz, nou pran tou risk pou minimiz lenpak tou posibilite.

Me oule fer sorti osi poudir i devwar tou dimoun e responsabilite tou dimoun kot drog i konsernen. I devwar Lapolis ek Lotorite pou met en lord pou *curb down* sa tranzaksyon drog.

Me i osi pli gro responsabilite lo sa fanmir osi, sa distrik, sa kominote, sa paran ki les son bann zanfan zot bann zanfan alatrenn. E ler ou, ou krwar ou vwar li alatrenn i annan en travay ki i pe fer li, i annan en *duty*, zot ganny *train* sa bann zanfan la mon pou dir zot ozordi.

Sa bann zanfan i konn *everything about* ler gard i vini, avan gard i vini ler gard i vini e si i annan keksoz ki zot pou fer. Tousala zot ganny dir.

So or all in all i en serk visye si oule e i pa fasil ditou pour Lapolis. I pa fasil. Me selman lefe i reste. Ler ou war zanfan i tousel, zot bann *layer* zot osi sa group zot Sanmdi pase par egzant. Zot

tousel paran ou konnen kote zot ete i dan en lot landrwa zot osi zot pe fer zot zafer. Zot osi zot pe preokipe.

E ou *endup* kot en lakaz kot i annan en vennsenk, en trantenn dimoun la. E lekel sa bann dimoun eski i sorti, souvandfwa i dan kominote. Me plis fwa pa bann dimoun sa landrwa. Be ki ou 25, 30 dimoun i fer dan sa bout la kot ou ete? Zot pe konpran mwan la.

I bann sityasyon ki ase difisil. E ler gard i vini i fer sa ki fodre fer. Si napa nanryen - napa rezistans kot nou bezwen arestasyon nou fer nou lafouy byen.

Napa manrmay ki'n ganny *plan* poudir met sa retar, se enn bann *layer* ouswa i annan detrwa *layers*, nou fer nou fer nou louvraz byen.

E ler ou zwenn zanfan 14an 7an menm pli ba, kot i pe konfront Lapolis ek lezot Lazans, i pe anpes ou antre zis pou donn letan defalke *whatever*. Sa osi i en problemn.

E ki mannyer ou *go around* sa sityasyon? I ase konplike. Mon ava aret la. Me selman si i annan lezot keksoz mon ava. Mersi bokou.

MR SPEAKER

Mersi *ComPol*. Kote i si ti annan en dimoun ti lev lanmen tre boner. Mon krwar ti Onorab Hoareau. Mon'n met ou non, ti ou? Pa ti ou, a Onorab Monthy alors. Mersi. Onorab Monthy mon ava donn ou kestyon.

HON PHILIP MONTHY

Mersi Mr Speaker. Bonzour Minis e Komisyoner Barbe.

Enn bann kritik ki mon'n tande se ki si sa travay ki pe ganny fer i en travay onnet, akfer ki bann zofisyè i bezwen maske zot figir?

So kestyon se eski i annan okenn zofisyè ki maske zot figir pandan sa bann loperasyon e si wi aköz? Mersi.

MR SPEAKER

Mersi. Minis oubyen *ComPol*? Lev lanmen silvouple. Minis *yes*.

THE DESIGNATED MINISTER JEAN-FRANCOIS FERRARI

Mersi Mr Speaker. Mr Speaker pou fer li byen kler, se bann zofisyè Militer ki met en mask. Lapolis li i napa nanryen pou li kasyet - i pe entervenir dan en kominote e i *ok* pou tou dimoun konnen lekel bann zofisyè ki pe travay.

Me bann Militer, zot, zot ganny proteze dan en sans aköz zot la zis an sipor. E kontrerman a sa ki mon ti pe krwar, bann Militer osi i met *body cam*. Zot in konmanse oubyen? Zot pe mete deza.

Donk i annan en distenksyon ant travay Lapolis ki en travay kominoter e travay Militer ki zot, zot zis vin la an sipor. E zot pa anvi, nou pa anvi enplik zot dan sa bann loperasyon aret dimoun, kestyonn dimoun, antre dan lakaz dimoun. Bann keksoz koumsa.

So this is why zot reste one step removed. Mersi.

MR SPEAKER

Mersi. Mon ava pran kestyon Onorab Loze.

HON JOHAN LOZE

Mersi Mr Speaker. Mr Speaker mon oule konmans par reasir lepep Seselwa ki lo mon kote personnelman, mon fanmir, e lo kote mon *Caucus*, nou a 100poursan siport sa konba kont drog ki Minis ek son Gouvernman pe anmennen.

Mon osi oule reasir Minis ki dan mon *Caucus*, pou napa personn ki pou zanmen monte desann avek en trafiker drog letan son *case* pe pase Ankour.

Pou napa personn lo mon *Caucus* ki pou monte desann anmenn bwat manze Ankour, letan en trafiker drog pe ganny ziz-e.

E pou napa personn ki pou debout plere dan lebra en trafiker drog, letan son santans i pase parey ki ou Minis Ferrari ou ti fer.

Mr Speaker ...

(Interruption)

MR SPEAKER

Hold-on! Wait, wait, wait! Arete Onorab Loze. Mon pa tro konnen ki mannyer mon pou *deal* avek sa, me sa ki ou'n dir i vreman ...

HON JOHAN LOZE

Sa ki mon'n dir i en fe i konnen li.

MR SPEAKER

I vreman *objectionable*. I pa le sa size ki nou pe konsernen la e ou'n amenn en alegasyon.

HON JOHAN LOZE

En *statement of fact* lo son lipokrizi direk! In fer sa ki mon'n dir. Mon kapab *drwa out* plizyer lartik dan *People testifying to this fact* aköz mwan ki ti Ankour.

MR SPEAKER

Non i pa akseptab.

HON JOHAN LOZE

E ou ti son koleg pandan sa bann letan ou konn tre byen sa *case* ti ganny pase ou ...

(Mic switched off)

MR SPEAKER

Mon pe dir ou, mon pe dir ou sa ki ou'n fer pa akseptab. Ou pa, i pa akseptab mon pa pe tret sa size la.

Si ou annan en kestyon demande si non ou sed mikro. Mersi.

HON JOHAN LOZE

Mersi Mr Speaker. Mr Speaker, mon kestyon se vyolans i ganny servi ki'n *involve* zanfan e zanfan i ganny *rushed* pou ganny latansyon medikal.

Eski Minis i konsider li i normal, pou servi son syez dan Lasanble ozordi

pou *browbeat* zournalis senpleman aköz zournalis pe demann kestyon?

Eski nou'n ariv enn sa bann pei diktatir kot zournalis nepli annan drwa poz kestyon kestyonn aksyon Gouvernman letan Gouvernman pe aplik labi lo sitwayen? Mersi Mr Speaker.

MR SPEAKER

Mersi. Minis ou kapab pran kestyon e ou kapab osi adres alegasyon ki Onorab in fer si ou annan en komanter pou fer.

THE DESIGNATED MINISTER JEAN-FRANCOIS FERRARI

Non Mr Speaker. Sa Onorab an partikilye ler i koze, ou les li koze. Napa nanryen pou dir.

MR SPEAKER

Mersi, ale reponn sa kestyon silvouple.

THE DESIGNATED MINISTER JEAN-FRANCOIS FERRARI

Kestyon se zanmen dan listwar Sesel bann zournalis in ganny sitan laliberte parey zot annan ozordi.

(APPLAUSE)

THE DESIGNATED MINISTER JEAN-FRANCOIS FERRARI

Nou, nou ankouraz tou zournalis pou demann tou kestyon. Me selman nou demann zournalis pou annan en lapros ki balanse. E nou demann zournalis pou war sa ki bon ler i vwar ki mal, me war osi sa ki bon.

Dan sa ka spesifik Onorab, ler zofisye Lapolis i entervenir pou li sov lavi en zanfan dan en loperasyon, i en keksoz pozitiv.

E nou ti a kontan ki nou felisit sa zofisye Lapolis aköz se sa son louvraz.

E nou anvi kontinyen dir avek bann zournalis ki se pa zis an kritikan zot pou rezourd problem. Set an osi anmenn bann solisyon e an fezan bann propozisyon ki bon pou Sesel.

Alors mwan mon lankourazman se ki zot kontinyen demann kestyon. Me selman zot devret demann bann kestyon dan en fason ki ekler nou popilasyon. Pa dan en fason ki met nou popilasyon dan plis fernwanr. Mersi.

MR SPEAKER

Mersi. Mon a pran kestyon Onorab Labonte.

HON ANDY LABONTE

Mersi Mr Speaker. Bonzour Minis, bonzour *ComPol*.

Bon Mr Speaker permet mwan ki mon annan laparol pou mon senpatiz avek lafanmir Marie, Hibonne e Joubert ki'n perdi enn nou zabitan Ma Joie 69an Mrs Anne-Marie. Ki nou kapab dir La Rivyer Anglez antye i an pler - i pa zis kote *LDS*, akoz ler i ti rann son dernyen soupir mon ti Lopital e mon ti la. So nou senpatiz avek lafanmir.

Bon mon kestyon i al koumsa *Minister*. I al dan menm laliny ki Onorab Pillay in pran en.

Dan lentere rol ki Lasanble Nasyonal i annan, pou rod leklersisman lo bann size ki pe preokip nou popilasyon, eski sa Lasanble i kapab ganny en lesplikasyon kler, si i dan lentere lepep ler bann droger ek trafikier i vin en nwizans dan en kominote e deranz trankilite lezot zabitan?

E mon dezyenm parti kestyon i vize ver proteksyon e linosans nou bann zanfan, parey Minis in dir.

Eski Servis Sosyal pe fer swivi, apre sa bann tel lensidan, pou fer sir ki nou bann pti trezor pa ganny servi koman en baravan pou toler bann aktivite ilegal parey trafikier drog ?

E zis an pasan Minis en, eski i annan okenn zabitan ki ti ganny arete dan bann *raid* tou dernyerman, ki finalman in ganny vwar dan rigol, oubyen ki'n ganny deklare disparet parey i ti leka dan lepase apre koudeta kot drwa imen ti vreman ganny abize?

MR SPEAKER

Mersi Onorab. Onorab ou pe depas kestyon. Minis ou annan de kestyon pou adrese silvouple.

THE DESIGNATED MINISTER JEAN-FRANCOIS FERRARI

Yes, lo dezyenm bout kestyon mon fek reponn lo la Onorab. Mon krwar ki nou viv dan en pei kot drwa tou Seselwa i ganny respekte. E an menm tan ki Lapolis ti fer son bann loperasyon, zot fer li avek respe pou sa bann drwa.

Alors e sa i en keksoz ki mon promet pou kontinyen. Me selman an menm tan mon pou promet ki nou lalit kont trafikier drog pa pou zanmen, zanmen arete. Sa i an repons ou dezyenm kestyon.

Ou premye kestyon zis fer mon mazin.

HON ANDY LABONTE

Eski i dan lentere Nasyonal pou nou konman en Gouvernman tolere ki bann nwizans ki ganny deroule parey trafikier drog i kontinyen dan nou kominote?

MR SPEAKER

Mersi. Wi Minis.

THE DESIGNATED MINISTER JEAN-FRANCOIS FERRARI

Sertenman pa Onorab. I pa dan lentere Gouvernman i pa dan lentere nou pei, i pa dan nou lentere nou bann Onorab ki sa kote latab oubyen lo lot kote latab, i pa dan lentere person.

Parey Onorab Lemiel in dir pli boner, mon'n mon vreman santi son douler dan en sans. Akoz ler mon al lanmes dan Dimans bomaten mon pas Anse Royale ler ou vwar sa ta dimoun ki'n rasanble sa bann zenn dimoun, bann dimoun avek lafors ki pe apiy sa bis *methadone*, i vreman rasker. E nou bezwen fer keksoz pou nou rezourd sa problem oubyen elimin li.

Me selman mon anvi ki demann avek Lasanble ki nou zefor i sorti lo

kritik Lapolis. Se la konmsi se pou sa rezon ki mon dan sa Lasanble ozordi.

Lapolis i pa perfe. Lapolis pa perfe. Lapolis i annan son bann *weakness*. I annan bann keksoz ki i pa perfeksyonnen ladan.

I annan parler Lapolis i enn de zofisyè ki parler pe brit, oubyen en pe *rough*, oubyen ti kapab fer keksoz en pe diferaman. Tousala nou pe travay lo la.

Me solman pou zot kapab avanse dan lavi, se pou ankouraz zot. Se lankourazman ki pou anmenn nou en pe pli lwe.

Alors mon lapel avek Lasanble se ki, otan ki Gouvernman pa pou toler sa bann dezord dan kominote, annou kontinyen ankouraz Lapolis pran zot pou nou bann zanmi, pran zot pou bann dimoun ki pe travay dan en fason pozitif pou zot osi.

Akoz zot osi zot annan zot annan bann fanmir ki dan drog e sa i terib. Mersi.

MR SPEAKER

Mersi Minis. Mon ava pran kestyon Onorab Uranie.

HON ROCKY URANIE

Mersi Mr Speaker. Bonzour Minis ek ou delegasyon, tou koleg Onorab byensir tou zabitan Zil Pros ki a lekout.

Minis eski zot annan en striktir pou *monitor* e kontrol sa bann *raid* ki ganny fer ?

E ek ki sa bann zofisyè ki fer sa bann *raid* i al raporte ler zot in fini fer zot *raid*? Mersi.

MR SPEAKER

Mersi. *ComPol*. *ComPol* nou ava adres sa silvouple.

THE COMMISSIONER OF POLICE TED BARBE

Mersi Mr Speaker. Mersi Onorab. Onorab sa bann *raid* ki pe ganny fer, bann loperasyon, Lapolis i *take the lead* dan sa bann loperasyon.

Nou annan sa ki nou apel *Joint Operation Centre* e bann rapor i ganny fer ladan e bann desizyon ki ganny pran se Komisyoner Lapolis ki *ensure* ki desizyon i ganny pran byen. Se sa. Mersi Mr Speaker.

MR SPEAKER

Mersi *ComPol*. Mon a pran kestyon Onorab Henrie.

HON GERVAIS HENRIE

Mersi Mr Speaker. Bonzour tou dimoun. Konman Manm Elekte pour Distrik Mont Buxton mon sipor tou zefor Lapolis e Gouvernman. Parske mon *constituency* i ganny afekte par drog, so mon pou sipor tou bann zefor ki pe ganny fer.

E mon osi remersi Gouvernman ki dan sa bann loperasyon, okenn dimoun pa'n mor konpare avek *Philippine* ziska Desanm 2019 29,000 in mor dan bann loperasyon drog.

E sa kote *Caucus* pa pou zanmen anmenn kestyon ler trafikier i ganny deporte dan sa pei.

(APPLAUSE)

HON GERVAIS HENRIE

Mr Speaker, kestyon ki mon oule demann Minis, zis en kestyon. Ou'n dir drog i dan kominote. E nou tou la anndan sirtou bann dimoun ki'n ganny elekte, nou en dirizan dan nou kominote, e nou bezwen sezi sa deklarasyon ki ou'n fer sirtou, ler ou dir ki lalit kont drog pou long e difil.

Alor ki nou kapab fer konman en Nasyon an konmansman par en lapel avek nou la anndan pou ki tou bann dimoun tou bann antite ki enplike avek kominote, konmansman par lafanmir, legliz, lekol, bann dirizan dan kominote, medya, kominote biznes, nou travay ansanm e nou aret vwar defo avek sa lesey pou nou met drog anba kontrol me ki nou vin ansanm e lager kont drog dan kominote ? Mersi Mr Speaker.

MR SPEAKER

Mersi Onorab. Minis ou pou pran laparol.

THE DESIGNATED MINISTER JEAN-FRANCOIS FERRARI

Mersi Onorab. Onorab mon pou profit ou kestyon pou mwan eklersi en pwen ki'n leve boner. E ou'n koz lo bann Manm Lasanble ki'n ganny elekte konman o sant zot kominote.

Pwen ki mon ti pe sey fer boner se ki pou ou kapab konpran, pou ou kapab vremen konpran sa ki pe pase dan bann kominote, se ki fodre a serten moman dan ou lavi, ou'n annan sa responsabilite pou ou al dan kominote e pou ou koz avek bann dimoun pou ou tap bann laport. Pou ou konpran zot problem.

Pou ou vwar bann manman pe plere, pou ou vwar bann pti baba pe taye pe ganny tire, akoz i annan vyolans otour zot.

Fodre ou'n annan sa kouraz pou ou met ou kandida a serten moman. Ki ou'n ganny elekte oubyen ou pa'n ganny elekte, sa pa enportan.

Sa ki pli enportan se fodre ou demontre konman en *leader* ou annan sa kouraz pou ou met ou kandida, e demann lepep pou ou swazir ou pou *validate* ou kandida. Donk sa i en keksoz ki vremen enportan.

E akoz en *MNA* - e la ozordi mon profite ler mon dan Lasanble Nasyonal - en *MNA* li ki *leader* dan son kominote. E si i kapab ganny kolaborasyon tou bann lezot lenstans tou bann lezot lorganizasyon ;-ki legliz, ki lekol, ki bann kominote biznes ki bann *NGOs*, se li ki bezwen anmenn tou sa bann dimoun ansanm.

E Gouvernman pe fer tou sa ki i kapab pou li ankouraz bann kominote pou vin ansanm. E atraver sa, bann kominote i bezwen ofer zot sipor e zot kolaborasyon Lapolis.

Enn bann bon keksoz ki pe sorti dan sa bann lopeyasyon kont drog, se ki Lapolis pou premye fwa pe ganny en pe plis konprenezon ki pe arive dan bann distrik.

Dan lefase Lapolis ti malerezman ti annan en lepok kot zot ti plito zis dan Kordgard oubyen zis dan transpor pe monte desann.

La zot pli *involve* zot pli zot antre dan Kominote zot koz avek bann dimoun, zot ganny konfli sertenman. I annan bann konfli ki devlope. Me selman i permet en kominikasyon bokou pli pros. E sa pe anmenn en kantite lentervansyon pozitiv.

Alors lo ou kestyon Onorab, Gouvernman i vremen apiy tou dimoun dan bann kominote ki anvi vin ansanm pou zot kapab anmenn en fason diferan pou *empower* sa kominote.

Pou ki sa kominote li menm li i anbank dan sa lager i pa les sa zis pou Lapolis. Me i anbank dan sa lager dan sa lalit kont drog. So mon fotespere mon'n reponn ou kestyon Onorab. Mersi.

MR SPEAKER

Mersi Minis. Kestyon pour Onorab Ernesta.

HON PAUL ERNESTA

Mersi Mr Speaker. Mr Speaker, Minis, *ComPol*, koleg Onorab e tou dimoun a lekout bonzour. Mr Speaker Minis letan in koze in dir tou dimoun in ganny touse par sa fason, par sa fleo.

E mon osi mon annan enn mon pros ki'n perdi lavi akoz drog. E mon osi mon anmenn tou sipor ki annan kont labi kont drog.

E an menm tan mon denons tou bann trafik drog ki i annan dan pei. Akoz sa sakenn de nou, nou fanmir e nou bann pros ki pe ganny afekte.

E dan sa konteks, i enportan ki letan nou anmenn sa lalit nou fer li byen. E se sa ki nou lo sa kote latab nou pe demande ki sa lalit i fer byen.

E dan anlany mon kestyon pou Minis, eski Minis e dan sa fason ki zot pe anvizaze enplimant sa dizyenm lamannman ki zot in fer resaman lo Konstitisyon? Mersi Mr Speaker.

MR SPEAKER

Mersi. Minis ou annan kestyon lo Konstitisyon.

THE DESIGNATED MINISTER JEAN-FRANCOIS FERRARI

Pardon Onorab. Pardon Mr Speaker.

MR SPEAKER

Wi mon dir ou ava adres son kestyon lo Konstitisyon si ou'n konpran byen.

THE DESIGNATED MINISTER JEAN-FRANCOIS FERRARI

Non.

MR SPEAKER

Bon Onorab zis rezim ou kestyon vitman silvouple.

HON PAUL ERNESTA

Mersi Mr Speaker. I enportan osi ki Minis i port atansyon i ekoute en ?

Eski dan sa fason ki son Gouvernman i anvizaze enplimant sa dizyenm lamannman ki zot in fek fer dan Konstitisyon resaman? Mersi.

MR SPEAKER

Mersi. Minis.

THE DESIGNATED MINISTER JEAN-FRANCOIS FERRARI

Mersi Mr Speaker. Lamannman dan Konstriksyon in legaliz en pratik ki ti deza egziste. Me nou'n formaliz li dan Lalwa.

E mon santi ki en bon desizyon ki'n ganny pran, aköz i permet anmenn Lafors Lapolis e Lafors Militer pli pros avek kanmarad, pou zot kapab fer sa travay dan sa lalit ki vreman difisil e ki bezwen tou partisipasyon tou dimoun.

Byensir i annan bann toultan bann risk dan sa bann keksoz koumsa, aköz nou konnen ki *training* Lapolis ek *training* Larme i pa menm *training* ki zot gannnen.

Donk la mon kapab reasir ou Onorab ki an metan an pratik sa lamannman, Lapolis in fer en kantite konsiltasyon e en kantite *training* avek Militer.

Pou fer sir ki bann loperasyon i deroul dan respe e dan proteksyon pou tou dimoun dan kominote.

Mon ti a kontan remersye ou pou ou sipor ki ou deklare pou sa lalit. E mon ti ava kontan dir ou ki pou annan ankor bann keksoz ki pa pou mars 100poursan. Pou annan.

Aköz dan tou loperasyon parey mon'n dir pli boner, napa naryen ki perfe. Mwan sa ki mon ti a kontan, e sa ki Gouvernman ti ava kontan war, e mon krwar Lasanble osi ti ava kontan war, se ki o fir a mezir ki Lapolis ek Larme ek Militer i perfeksyon zot bann *modus operandi* - ler zot pe fer perfeksyonn zot travay. Zot ganny lankourazman piblik. Ki zot pa ganny bann dekourazman.

Aköz se bann zonm ek fanm dan liniform. Se bann dimoun parey nou. Zot annan disan dan zot lavenn zot osi. Zot nou bann fanmir. E zot bezwen gannnen sa sipor. Aköz sinon zot pou dekouraze.

Donk annan fer mannyer ki nou don zot sa sipor. E an menm tan nou pa dekouraz bann ki pe lalit kont drog. Me nou dekouraz bann ki pe trafik dan drog.

So annou, *let's get* nou bann *target right*. E mon krwar poudir nou pou ganny en bon pe sikse a la venir. Byensir si nou mentenir parey dan mon biro i annan en mesaz lo miray i dir : -

“Never go weary in doing well for in one day you will reap.”

So i annan toultan sa determinasyon pou nou kontinyen fer sa travay. E pou nou anmas fri nou travay byento. Mersi.

MR SPEAKER

Mersi. Mon ava pran kestyon Onorab Romain.

HON GEORGES ROMAIN

Mersi Mr Speaker. Bonzour Minis ek Komisyoner. Minis ou'n fer resorti ki drog in konfirman nou pou war lo zanfan. E sa pa premye fwa nou'n tande.

Menm Konmisyoner in fer resorti ki zanfan pe ede dan trafik drog. Sa nou pe vwar, nou'n tande plizyer fwa osi tou.

Alors mon kestyon Minis atraver ou Mr Speaker, eski Minister Lafanmir ek Sosyal pe *involve* dan sa travay pou kapab koz ek sa bann zanfan enkli zot bann paran, pou fer sir ki - mon konnen zot pe sey detri sa drog - me selman nou konnen zanfan i ankor pti, e nou pa pe kapab detri lo kote adilt. Me selman apre nou pou annan en lot problem ankor lo nou.

Si mon ti kapab kek fwa Minis kapab donn nou en pti pe lesplikasyon lo la. Mersi Mr Speaker.

MR SPEAKER

Mersi. Minis ou ava adrese.

THE DESIGNATED MINISTER JEAN-FRANCOIS FERRARI

Mersi. Onorab mon ti ava kontan reasir ou ki i annan en gran kolaborasyon ant Lapolis e Servis Sosyal, e Minister Lasante.

Sa 3 lebra i travay tre pros ek kanmarad. E an se moman ki Legzekitiv i dan bann deba lo Bidze pou lannen prosenn, en kantite lanfaz pe ganny mete pou nou gete ki mannyer nou kapab annan bann striktir ki byen ekipe, pou vin an sipor bann viktim drog.

Akoz se la kot pli gran defayans i ete. E se la kot pli gran latristes ki nou war. Akoz ler paran i tonm dan sa drog, se bann zanfan ki ganny abandonnen. Se bann zanfan ki tonm dan vyolans, dan labi, eksetera.

Alors, e sirtou Onorab se Minister Lasante ki bezwen apre anmas bann *crack baby*, bann *heroin babies* ki ne dan Lopital. Ki vreman en bann sityasyon dramatik.

Ki ou konnen poudir sa zanfan in ganny kondannen pou lavi - pou lavi. Akoz in ne dan drog. E sa drog i dan son disan. E in afekte li pou lavi. Donk se la kot i montre nou ki mannyer sa sityasyon i irzan.

E kolaborasyon i tre etrwat. Mon repete ant zafer Sosyal, Departman Zafer Sosyal e Departman Lafanmir byensir e Minister Lasante.

Mon krwar ki en bon pe ler bann zanfan e menm parler bann adilt en - menm parler bann adilt i fini fer bann *processing* avek Lapolis, Lapolis i refer zot avek bann lezot Lazans, pou fer sir ki zot kapab gan y en pti lakonpanyman ki *hopefully* zot kapab retonm lo zot lipye apre. Mersi.

MR SPEAKER

Mersi Minis. Bon mon'n sot 10 er en kar. Mon pa pou kapab pran kestyon lezot Manm. Mon pe retourn kot loter kestyon. Mon regrete mon pa kapab pran kestyon siplemanter lezot Manm.

Onorab Pillay mon pou pas ou laparol. Ou kapab fer ou lesplikasyon ki ou ti'n demande. Selman mon ava demann ou pou fer li ase kourt aköz mon determinen pou arete avek sa sesyon 10er edmi. Mersi. Onorab Pillay.

HON SEBASTIEN PILLAY

Mersi Mr Speaker. Mr Speaker pandan letan ki Minis ti pe donn son larepons, i annan lentansyon pour montre ki lenpitasyon ki mon pe rod lentelizans pour - mon pe afekte lentelizans Lapolis, oubyen ki mwan mon annan okenn lentere - en lot lezot lentere avek sa kestyon.

Mon le *remind* Minis ki mon annan fanmir pros ki mwan mon'n bezwen al sers li dan geto, ki'n lopital, kot ler tou son organ ti fel mon'n vwar li

kot in mor. E mon'n pase dan plizyer distrik, e mon'n vwar problem ki'n arive avek bokou dimoun.

So mon krwar ti vreman *insensitive* lo ou par, e avek en move lentansyon ki ou'n vin fer, pou vin fer en lakizasyon, pou parey ou'n fer.

Mon krwar petet avan ou vin tir sa lapousyer dan mon lizye, tir sa blok dan ou lizye ...

MR SPEAKER

Onorab! Onorab!

HON SEBASTIEN PILLAY

... mon pa ti dan *land rover* le 5 Zen...

MR SPEAKER

Onorab! Arete silvouple!

HON SEBASTIEN PILLAY

... parey ou, ou ti fer.

MR SPEAKER

Onorab! Ou'n realize poudir ou'n depas ou leksplikasyon, ou'n antre dan en lot lakizasyon kont Minis? Mon pa aksepte sa.

HON SEBASTIEN PILLAY

I pa en lakizasyon Mr Speaker.

MR SPEAKER

Silvouple, silvouple. *Ok*, aret la, e prosede avek ou kestyon.

HON SEBASTIEN PILLAY

Mersi Mr Speaker, mon pou prosed ek mon kestyon. Mon ti a kontan demann Minis pou klarifye, ou'n dir ek nou koumsa a en moman donner pandan letan ki ou pe reponn kestyon, ki se Lapolis, ki ansarz sa bann loperasyon. E ki militer, i zis la koman sipor.

Aprè letan ou'n ganny demande kestyon lo aköz militer i bar zot figir, ou'n dir prezan militer bezwen bar zot figir letan zot pe fer lentervansyon.

Se sa ki ou'n dir Onorab. Onorab Monthy ki'n demann kestyon.

MR SPEAKER

Minis ou a reponn. *Ok*. Ale.

HON SEBASTIEN PILLAY

So, eski ou kapab, dir avek nou *ok* - e safwasi dir nou laverite; eski lafors militer dan sa *involvement* ki zot pe annan avek sa loperasyon, zot anba komann - dir nou sa *on record* pou Lasanble Nasyonal silvouple - zot anba komann lafors Lapolis, e ki zot reponn avek zofisye Lapolis ler zot pe fer sa bann loperasyon? Sa i mon kestyon. Mon le Minis i konfirman *on record* lo *mic* dan Lasanble. Sa i mon premye kestyon.

Mon dezyenm kestyon Mr Speaker. Sa rezyon kot in annan sa bann *raid* in elekte Minis Ferrari koman *MNA* pandan 2 manda. E Minis Ferrari, in la pandan 2 manda. E bokou dimoun in vwar li kot in ankouraz, bann aktivite anti- sosyal dan Corgat Estate.

MR SPEAKER

Onorab!

HON SEBASTIEN PILLAY

Aprè plizyer repriz in la ...

MR SPEAKER

Onorab! *Sorry* ale ...

HON SEBASTIEN PILLAY

.. pou bar bann *raids* Lapolis Corgat Estate.

MR SPEAKER

Sorry, ale, eskiz mwan. Ou pe al ...

(Interruption)

MR SPEAKER

Onorab ou pe *impute improper motives*. Mon'n donn ou *warning* detrwa fwa. Pou sa enn mon pe demann ou *retract* silvouple. Aköz ou pa kapab kontinyen *impute improper motives*, ler Minis i vin reponn kestyon. E non pli ler en Manm i fer komanter. Silvouple *retract*.

HON SEBASTIEN PILLAY

Mr Speaker anba ou Lotorite, parey ou'n demann mwan, mon pou *retract* ki Onorab Ferrari ...

MR SPEAKER

Mersi.

HON SEBASTIEN PILLAY

...in ... in...

MR SPEAKER

Termin ou kestyon prezan.

HON SEBASTIEN PILLAY

... in ensit zabitan Corgat Estate pour reakte kont Lapolis dan lepase.

Mr Speaker, mon kestyon i senp, eski Lapolis pe konfirman dan Lasanble ki an relasyon ek sa *raid* ki'n pase, kot in annan sa *stunt grenade* ki'n ganny tire, kot in annan sa bann agresyon ki'n ganny fer ek sa bann zanfan, tou keksoz ti mars dapre lord, ti mars dapre prosedir. E ki'n napa okenn lenstans apre kot okenn zofisye in sey retourn dan sa kontan, pou demann okenn - ou pou ofer okenn zabitan larzan pour sanz zot zistwar an relasyon ek sa ki'n arive?

Mon ti a kontan ki nou konfirman sa Mr Speaker, aköz i bann keksoz. E mon dernyen kestyon Mr Speaker, mon le dir sa, nou'n toultan siport travay ki Lapolis i fer lo nou kote latab. Nou ti komans Prizon Marie Louise. E *LDS* dan Lasanble ti fer frenm Marie Louise.

Nou pa'n zanmen, nou pa'n zanmen, nou pran droger met lo avyon fer li retourn dan son pei. Apre pour li pa ganny ziz-e Sesel - parey zot in fer.

So eski, nou kapab ganny en konpran Mr Speaker, ozordi ti en loportinite, pou Gouvernman vini avek sa bann kestyon. Ti napa okenn latak lo Gouvernman, napa okenn latak lo Lapolis - pou anmenn nou ansanm pour nou kapab travay dan sa lalit kont drog.

Eski Gouvernman, i *committed* dan son lager kont drog pour li *tackle*

tou endividi, ki *involve* dan drog? E eski Minis i kapab dir nou, si Prezidan Larepublik, in kapab *provide* sa lalis tou sa bann trafiker ki i dir i ti konnen, pandan letan ki ti pe fer kanpanny pou vin Prezidan Larepublik? Mersi Mr Speaker.

MR SPEAKER

Mersi Minis mon krwar ou annan trwa pwen pou adrese la.

THE DESIGNATED MINISTER JEAN-FRANCOIS FERRARI

Mersi Onorab. Difisil pour fer sans dan tou sa bann keksoz. Me premyerman, afekte lentelizans. Onorab mon pa'n zanmen *impute* ki ou pe rod lentelizans pour ou afekte.

Mon'n zis dir, ki ou pa konpran ki pe pase dan bann distrik, aköz zanmen ou'n met ou kandida pou ou debout dan Eleksyon. So, sa ki mon'n dir.

An sa ki konsern travay, dan distrik Mont Fleuri, in en travay vreman difisil, ou konnen. Tou dimoun i konnen poudir Mont Fleuri i pa, i en zoli distrik son bann dimoun, son bann zabitan se bann dimoun formidab.

Me selman i annan malerezman en problem, parey serten lezot distrik ki ase grav. E i demann - i demann en bon pe kouraz, en bon pe lenerzi, pou ou al non-selman ver bann ki pe soufer. Me osi pou al ver bann ki, pe kree sa soufrans.

E ou bezwen kapab, annan sa lespri larz, pou ou kapab apros bann dimoun ki dan trafik pou ou kapab sanz zot e pou kapab reabilit zot. E mwan mon kapab dir ou Onorab, e sa en keksoz ki fer mwan tre fyer, ki dan mon travay koman *MNA* Mont Fleuri, mon'n kapab, mon konvenki mon'n kapab sov - pa zis sov zot lavi, me sov en serten dimoun e remet zot lo en semen ki drwat.

(APPLAUSE)

THE DESIGNATED MINISTER JEAN-FRANCOIS FERRARI

Alors sa pour mwan i en gran, i en gran konsolasyon.

Lo kote loperasyon mon ava permet Komisyoner pou li eksplik sa enn de pti bout, ki ou ti pe demande. Mersi.

MR SPEAKER

Mersi Minis. *ComPol* ou annan laparol.

THE COMMISSIONER OF POLICE TED BARBE

Mersi Mr Speaker. Loperasyon ki pe ganny fer. Mon le fer sorti ki Lapolis ki *take the lead*. Akoz nou *take the lead*, i se ki nou loperasyon, e nou ganny mandate pou fer sa. E an plis nou bezwen mazin son *legal finish as well*. So nou ki pran ka avek loperasyon.

Lo sa pti zafer agresyon, mon'n vwar bann *video* ki pe sirkile, i annan plizyer annefe. Me mon le zis fer sorti ki sete sa bann zanfan, ki ti pe balans ros, sopin, zot ti *even* annan kouto ek zot. Sez, a sez kase ki mon'n vwar pe sirkile. E zot ti'n antour bann gard, e se sa rezon ki gard ti bezwen servi mwayen pou dispers zot.

Onorab lo zafer mon pa okouran okenn bann *attempt*, pou *bribe* dan okenn mannyer - *this I don't recall any*. Mon pa'n ganny met okouran dan mon bann *debriefing*. Me o kontrer mon mazin, dan en lot ensidan bann *raid*, kot mon bann gard ek bann zofisye ti pe ganny *bribe*. Sa mon okouran, me i pa dan sa enn ki la. Mersi Mr Speaker.

MR SPEAKER

Mersi *ComPol*. Bon nou'n terminen, sesyon *PNQ*. Mon remerisi Minis e *ComPol* pou zot partisipasyon, e mon remerisye bann Manm pour zot kontribisyon kestyon. Nou ava poz e nou a rebran travay ller. Mersi.

(BREAK)

MR SPEAKER

Nou a kontinyen avek kestyon lo *Order Paper*. Madanm raporter, mon a demann ou pou apel Minis Antony Derjacques, silvouple.

Bon bonzour e byenveni Minis e on delegasyon Minis Antony Derjacques, Minis pou Transpor Mr Alan Renaud *PS* pour *Civil Aviation Ports and Marine* e Mr Sony Payet *CEO Seychelles Port Authority*.

Nou komans avek kestyon 138 pou Onorab Gill. Onorab ou kestyon.

HON CHURCHILL GILL

Mersi Mr Speaker. Bonzour Minis ek ou delegasyon. Bonzour tou Manm prezan e tou dimoun ki pe ekout nou. Kestyon i lir koumsa: -

Eski Minis i kapab enform sa Lasanble, ki son Minister i anvizaze fer avek sa lasose andomaze ler tou aktivite pasaze in fini bouz lo nouvo lasose? Mersi.

MR SPEAKER

Mersi, mon mazin en ou pe dir lasose Baie Ste Anne Onorab? Korek? Minis ou annan sa kestyon.

MINISTER ANTONY DERJACQUES

Mersi Mr Speaker. Bonzour *Chief Whip*. Bonzour *Leader* Lopozisyon. Bonzour tou bann Onorab e tou sa ki pe ekout nou.

Mr Speaker, avan mon anvi pas mon senpati pour *ex Minister* Dr Larose, e tou mon bann kondoleans pour son fanmir.

M Speaker konsernan sa lasose Baie Ste Anne, de ki kondisyon letan i amelyore, pou annan en evalyasyon ki pou ganny fer par bann enzenyer Lotorite Por.

Bann zofisye pou bezwen, ki lanmer i ase kalm pou zot plonze, pou evalye degre domaz ki annan lo sa enfracstriktir. Rapor pou ganny soumet avek Minister Transpor lafen Novanm.

Dan son demars pour amelyor lenfrastruktir e servis lo bann lasose, Minister Transpor in deside ki sa premye lanmwaye lasose ki enkli *car park*, pou ganny re-devlope dan en poze *marina*.

E pou siport travay SMSA, sa lot lanmwaye pou ganny remet avek *Coast Guard* Sesel, ki a sa moman la, napa en baz lo zil Praslin.

Sa pou fasilite son bann travay patrol dan bann Zil Pros e permet li asir sekirite maritim dan sa rezyon. Gard Lakot i ede dan lalit kont drog, e lezot aksyon ilegal. I siport SMSA pou asir sekirite bann bato, maren e pasaze. E osi ede dan proteksyon lanvironnman. Mersi Mr Speaker.

MR SPEAKER

Wi Onorab Gill ou siplemanter? Mersi.

HON CHURCHILL GILL

Mersi Minis pour ou larepons. Lo ou premye larepons ki ou'n donner sa premye parti lasose. Vi ki ozordi, kot *car park* - vi ki ozordi i annan, i pe siport en biznes touristik *Dream Yacht*.

Eski ler sa nouvo devlopman ki ou'n dir nou sipoze pe vini, i pou annan nesosite pour sa biznes la bouze oubyen i pou enkorpor ansanm avek sa nouvo devlopman? Mersi.

MR SPEAKER

Mersi Onorab. Minis.

MINISTER ANTONY DERJACQUES

Mersi Onorab, i pour pou lemoman sa *marina* i ankor en *concept*. E mon kontan i sak fwa, nou vin Praslin, tou le trwa *MNA* i pran par, e nou diskit avek zot. Pou lemoman nou pe mazin, ki ler nou donn, nou fer sa *tender*, atraver en *letter of interest*, Gouvernman avek sa devlope i a fer sir ki, i *dream* sa operater ki la *Dream Yacht*, i pa ganny deranze ositan e ganny enkorpore. Akoz sa dezyenm *marina* - si nou kapab apel li dezyenm i ava *complement*, i ava mars ansanm avek sa premye.

Mon vwar ki pou annan en kantite resours ki pou ganny *shared*. Zot pou dan menm *bay*, dan menm *harbor* e bann fasilite par egzanp, *parking* pou bezwen byen ganny planifye. E *Planning* pou antre ladan, Enfrastruktir pou antre ladan. E sa devlope osi, pou fer sir ki i dan en landrwa kot i vyab, kot i komersyal, e ki tou lede i kapab fer en sikse.

Nou pa pou kapab fer enn mars byen, e lot ganny afekte dan en fason negativ. Mersi Mr Speaker.

MR SPEAKER

Mersi Minis. Onorab Pillay ou annan siplemanter?

HON SEBASTIEN PILLAY

Mersi Mr Speaker. Mr Speaker prenon kont ki sa travay lo lasose, Baie Ste Anne e bann lezot lasose ki Minis in mansyonnen, i osi vize ver Lotorite Por.

Eski nou kapab ganny - Lasanble i kapab ganny en pe lenformasyon lo ki nivo lenplimantasyon oubyen standar abilite pour antreprann bann travay ki nesese ek bann Por ozordi, pou Lotorite Por.

Eski lotorite Por an sa ki konsern son loperasyon i annan ase travayer? Eski par egzanp Lotorite Por, ozordi in fini reganny en *Harbor Master*? Zis pou *improve* son lefikasite, pour li kapab delivre lo bann travay ki annan pour fer.

E ki mannyer Minis pou reponn serten konsern ki'n ganny eksprimen, par lefe ki bann travayer Lotorite Por, pe dir ki zot pe travay anba bann kondisyon kot zot pe fer bann tre gran erdtan. E ki annan dan serten landrwa dan loperasyon Lotorite Por, ki serten travayer in aret travay.

Eski ou kapab konfirman si sa i leka, oubyen si sa pe leka? Mersi Mr Speaker.

MR SPEAKER

Mersi. En moman Minis, nou Onorab Pillay mon konpran nou keston i la

lasose Baie Ste Anne. Ou pe demann sa bann kestyon an relasyon avek lasose Baie Ste Anne. Korek?

HON SEBASTIEN PILLAY

Mersi Mr Speaker pou donn mwan loportinite pou mwan klarifye mon pwèn. Rezon mon pe demann sa bann kestyon set aköz, Lotorite Por i sa, sa enn sa antite primer ki pou annan rol pour li *deal* avek sa sityasyon Baie Saint Anne.

Me lefikasite, e abilite Lotorite Por pou *deal* ek sa, sa bann problem, i en keksoz ki relevan pour sa kestyon.

MR SPEAKER

Wi.

HON SEBASTIEN PILLAY

E se sa rezon aköz, mon pe demann sa kestyon pou form en klarifikasyon.

MR SPEAKER

Mersi Minis. Oubyen ou delegasyon Minis.

MINISTER ANTONY DERJACQUES

Mersi Mr Speaker. Mr Speaker mon ti a kontan entrodwir nou nouvo *CEO* Por, Mr Sony Payet, in la dan son pos pou enn de mwan. E i en zonn kapab, e in travay lontan dan bann e enfracstriktir i en enzenyer par profesyon. E nou annan konfidans, dan son abilite.

Mr Speaker eski Mr Payet i kapab reponn sa kestyon. Mersi.

MR SPEAKER

Minis mon pe ganny sinyal ek bann Manm ki zot pa pe tann ou tro byen. Alor fer sir ou avans kot mikro letan ou pe adrese. Mersi *CEO* Payet i ava pran.

**CEO SEYCHELLES PORT AUTHORITY
SONY PAYET**

Mersi Mr Speaker, mersi tou Onorab, bonzour. Mr Speaker mon anv klersi ki sa manda ki mon'n pran koman nouvo *CEO* Por. Byento mwan Oktob le 01 i a

fer mwan, trwa mwan. Zot tou zot konnen dan sa Lasanble Mr Speaker ki en Lotorite ki pa fasil.

En travay konplike mon pa bezwen al an detay Mr Speaker, se ki kestyon Mr Speaker i ganny pwente ki nou pe fer Lasose Baie Ste Anne, mon krwar bann dimoun ki'n frekant lasose, Baie Ste Anne, zot a vwar Mr Speaker, ki mannyer Lotorite Por, in nabou met anba kontrol sa lensidan ki ti ganny arive, le 30 Zen, zour ti annan divan, gro laroul ti afekte sa lasose.

E mwan mon ti pran mon travay le 01 Zilyet Mr Speaker, en desizyon toudswit mon ti dir fermen pou sekirite bann dimoun, bann nou touris ki frekant, sa lasose.

So definitivman, depi la Mr Speaker i annan bokou keksoz ki ganny fer lo sa lasose, p ou fasilite le *va et vient* nou bann dimoun, Seselwa ki servi Seselwa, *Cat Cocos*, *Cat Rose*, nou bann kliyan ki deservi sa bann zil pou nou fer keksoz pli fasil.

Eski nou bann dimoun i satisfè? Non, toultan ou pou annan konplent Mr Speaker. Me nou Lotorite Por, nou fer mon krwar sa ki bezwen ganny fer pour nou fer sir keksoz i mars byen. I annan bokou devlopman, ki nou pe fer koman Lotorite Por, pou fer sir Praslin, La Digue enkli Mahé, nou avanse avek nou letan. La Digue parey zot konnen, si ou permet mwan Mr Speaker - se ki nou pe devlop La Digue, pou fer sir ki zot osi zot pa tonm deryer avek bann devlopman maritim ki egziste.

Byento lo Praslin, avan lafen sa lannen nou pou annan louvertir nou nouvo terminal pasaze, ki a ed nou pou kapab sorti parey Minis in dir lo vye lasose si nou an vi apel sa parey Onorab Gill i dir li. Pou nou bouz lo sa ki nouvo, e la i ava donn nou laliberte, sa fason fer keksoz pli byen pou avans devan.

Bann lezot kestyon lo kote dimoun, ki dan tou lorganizasyon Mr Speaker, i pou annan mekontantman, i

pou annan dimoun ki pa vwar dan ki direksyon ou anvi regarde.

Mwan koman nouvo CEO, mon pare pou travay ek tou dimoun, mon pa pou met personn deor. Me *as long* ki tou dimoun i swiv dan en laliny ki dan lentere sa antite zot avek mwan. Mersi Mr Speaker.

MR SPEAKER

Mersi CEO nou a pran, kestyon Onorab Woodcock.

HON WAVEL WOODCOCK

Mersi Mr Speaker.

HON SEBASTIEN PILLAY

(Off-Mic)

MR SPEAKER

Onorab, wi eski ou le klarifikasyon oubyen kwa?

MR SPEAKER

Ale fer li vitman *please*.

HON SEBASTIEN PILLAY

Mersi Mr Speaker. Lefe ki annan sa kantite aktivite bato lo lasose Praslin, enn bann rol enportan ki sipoze annan dan *Port Authority* se rol en *Harbor Master*, si mon pa tronpe.

Eski ozordi *Port Authority*, i annan en *Harbor Master*? E ki eski i en *Harbor Master* Seselwa oubyen eski i en etranze? Mersi. Sa mon ti le klarifye Mr Speaker, akoz i enportan pou bann dimoun ki servi sa bann lasosyasyon.

MR SPEAKER

Bon CEO, oubyen Minis lo ou *panel* lekel ki pou adrese?

MINISTER ANTONY DERJACQUES

Mersi Mr Speaker. Mr Speaker nou annan en *Harbor Master* par enterim. Solman parey tou dimoun i konnen, in annan en, nou kapab apel li en lof,

tender pour sa *post Harbor Master* ki'n ganny *advertised*.

E nou'n *interview* enn de dimoun ki'n vini, i annan ki sorti deor i annan ki lokal. E i annan rekomandasyon ki, *Board* in fer, e *Management* enkli CEO in fer avek Minis.

E Minis i bezwen konsidere e apre annan en konversasyon avek Prezidan. Sa *post Harbor Master* i en *statutory post*. E li menm li ki ou kapab dir ki oper, ki *operationalize* tou bann Por.

Alor, i en *post* ki annan en kantite responsabilite. E alor mon pe esper en konversasyon avek Prezidan byento, ler i retournen. E apre nou ava anonse lekel, nouvo *Harbor Master*. Mersi.

MR SPEAKER

Mersi. Mon a fer remarke ki mon annan apepre 15minit par kestyon, mon a pran kestyon pou terminen Onorab Woodcock.

HON WAVEL WOODCOCK

Mersi Mr Speaker. Minis pou lenformasyon piblik, sa de proze ou kapab konsider li kont li koman de proze. I annan sa bout *Coast Guard*, avek sa bout marina.

Lekel ki pou finans sa bout proze, sa bout *Coast Guard* e si *Coast Guard* menm, ouswa Lotorite Por?

E sa bout pou *marina*, eski i pou se en lakonpanyen prive ki pou antreprann sa ouswa Gouvernman? Si ou kapab donn nou en pe detay lo tou lede proze. Mersi.

MR SPEAKER

Mersi. Minis?

MINISTER ANTONY DERJACQUES

Mersi Mr Speaker. Mersi Onorab pou ou gran lentere. Ou form parti toultan, sa tim ki vin konsilte avek nou, ek bann lot Onorab Praslin ki vini tou le trwa. Sa ki konsern *Coast Guard*, Por pou senpleman *handover* sa dezyenm

parti Por enkli son, *terminal building* son langar, avek *Coast Guard*.

E *Coastguard* in vizit, zot byen apresye. Zot pou baz en bato laba, pou annan plas pou en *contingent* bann zofisye, e sa pour siport zot loperasyon dan ban Zil Pros, Praslin La Digue, ek bann lot zil, kont bann aksyon ilegal. Par egzanp ler i ti annan lasezon dizef zwazo, bann *poaching* ki ganny fer anver torti.

Apres osi sa aksyon ki vreman enportan pou nou, sa lalit kont drog. An plis zot pou siport *SMSA - Seychelles Maritime Safety Authority*, an sa ki konsern *safety* e sekirite pour tou bann bato.

Onorab ou konnen i annan plizyer bann *concept*, pour nou devlop kot Baie Ste Anne, sa i enkli plizyer bout *marina*, apepre 4. E pou annan, en bon pe bato lwazir ki pou vin sorti Mahé ki pou vin Praslin.

E sa pour lev nivo devlopman e larises parmi bann Pralinwa. Alor nou bezwen *Coast Guard* osi, ki anfori zot prezans. Praslin ek bann zil pou ki ede dan devlopman Praslin. Mersi.

MR SPEAKER

Mersi. Bon nou termin avek sa kestyon, me nou annan delegasyon en pe konplike. Mon a dir mersi, orevwar manm ki la Onorab, *sorry PS Alan Renaud*, e *CEO Sony Payet*.

Mersi nou a pran enn pti poz pou *sanitizing*, antretan madanm raporter ou a met pare pou apel Mr Patrick Andre, Mr Parinda Herath, e si Mr Zialor i la osi, so nou ganny delegasyon pou kestyon 139,140 e 141.

En poz silvouple *sanitizing*.

(technical break)

MR SPEAKER

Lasanble i a rebran. Mersi. Bon mon swet labyenveni nouvo delegasyon Mr Patrick Andre *PS* pou *Land Transport*, Mr Parinda Herath *CEO* pour *Seychelles Land Transport Agency*, e si Mr Geffy

Zialor, *Chief Operations Officer* pou *SPTC*.

Nou a pran kestyon 139 Onorab Gill.

HON CHURCHILL GILL

Mersi Mr Speaker, byenveni bann nouvo delegasyon. Kestyon i lir koumsa: - Eski Minis i kapab eksplik sa Lasanble kwa ki'n koz tou sa retar lo semen Salazie?

i) Kan ki sa semenn i espekte ganny konplete, enn fwa pou tou zabitan Salazie a kapab aret mars dan sa kantite labou an rezilta retar lo sa semen? Mersi.

MR SPEAKER

Mersi Onorab. Minis ou repons.

MINISTER ANTONY DERJACQUES

Mersi Mr Speaker e Onorab. Proze lagrandisman semen Salazie Baie Ste Anne, ti ganny *tender* an Zilyet 2018. Proze ti ganny aprouve par *National Tender Board*, an Zanvye 2019, e Kontra ti ganny sinyen le 18 Mars 2019.

Retar prensipal pour sa proze, i negosyasyon *wayleave* lo serten seksyon sa semen. Sa in kree serten retar pour sa kontrakter mobilize lo *site* e travay ti komans nek an Mars 2020.

E 2020 bann retar lye avek *COVID*, e kot bann travayer etranze ti bezwen retourn dan zot pei. An 2021, proze ti rebran. Me malerezman, avek en mank materyo konstriksyon lo Praslin, tel koman lapousyer ros, makadanm ek siman, sa proze ti ganny afekte e retarde. Ensi ki bann lezot Proze Kapital, lo sa zil parey.

A plizyer repriz ver lafen 2021, e lafen 2022, sa kontrakter in ganny kosonnyen, i dan sa bann lenstans in bouz lo sit pour li rekomans travay.

I osi enportan note ki serten travay i delika, lefe ki annan en gro rakor delo ki pas anba sa semen. Travay in bezwen ganny fer dan en fason, pou anpes sa rakor andomaze.

Sa kontrakter in annan zis annan ziska le 3 Oktob sa lannen 2022, pour konplet tou travay ki reste lo bann seksyon ki permisyon in fini donnen, par bann propriyeter.

Savedir kot *wayleave* in fini ganny donnen, pou annan pran ka, e ki nou bezwen rekonnèt ki annan bann landrwa kot *wayleave* pa ankor ganny donnen. Tou bann propriyete solman aprezan i agree pou donn permisyon.

E zot pe atann en Lagreman formel, sorti kot Departman Later. Ki fer ki en seksyon sa semen pa pe ganny elarzi ziska ki prosedir i finalize avek Minister Later.

An sa ki konsern travay pour sirfas sa semen, i dan plan *SLTA* pou komans fer bann preparasyon de baz pour sirfas sa bann morso semen apartir mwan prosenn, an Oktob.

Sa travay sirfas i pa pou final, me pou plito kouvert sa bann morso ki'n fini, elarzi. Sa semen pou ganny son kous koltar final alor en pe pli tar. Mersi Mr Speaker.

MR SPEAKER

Yes, Onorab Gill. Siplemanter.

HON CHURCHILL GILL

Mersi Minis. Minis enn se ou'n dir nou *wayleave* ou'n gannyen pou serten parti semen. Eski nou pe koz sa semen ki pe fer. Oubyen bann lezot bout aköz i sipoze kontinyen. Oubyen i annan lezot bout ki relye ek sa semen, ki li pa ankor ganny *wayleave*? Wi sa i enn.

Dezyenm, pour sa dele ou'n donn nou rezon dele pour depi 2019, 2020. E apre ou'n dir nou sa kontrakter, i ganny reprimande. Apre ki sa kontrakter in ganny reprimande, eski ou Minister i satisfè ki prezan i kontinyelman lo *site*, e travay pe ganny fer? Mersi.

MR SPEAKER

Mersi Onorab. Minis repons.

MINISTER ANTONY DERJACQUES

Mr Speaker mon pou les *CEO*, *SLTA* pou reponn sa detay an plis ki Onorab in demande. Mersi Mr Speaker.

MR SPEAKER

Mersi wi nou a pas laparol ek Mr Herath.

CEO SLTA PARINDA HERATH

Mersi Mr Speaker. Mersi Onorab. Bon lo kote *wayleave* ki nou ankor pe negosye, i annan de plot - *PR6178* avek *PR6179*. E sa i anfe, i enkli dan sa proze depi lo komansman. E sa proze anfe, i annan en longer 450met. Alor sa, enkli tousala i enkli dan sa proze depi lo komansman letan i ti ganny *tender*.

Lo kote travay ki pe ganny fer par kontrakter, non nou pa vremen san poursan satisfè. Me selman nou bann dimoun tanzantan pe koz ek li, nou pe donn li bann *warning letters* eksetera.

E la dernyen, ki nou pe donn li nou'n donn li se ziska le 3 Oktob parey Minis in mansyonnen. Si travay pa ganny konplete, nou pou napa swa. Me antre dan bann lezot prosedir, par egzanp terminasyon sa kontra.

Me sa osi i pa en keksoz, ki nou kontan fer. Aköz i annan en lot, prosedir ki nou bezwen swiv ki pran bokou plis letan ankor. Pou termin ek kontra, pou *retender* pou rod en lot kontrakter.

Alors, nou sey nou mye pour nou kapab negosye, sey koz ek sa kontrakter ki lo *site*, pour nou kapab konplet sa travay o pli vit posib. Mersi.

MR SPEAKER

Mersi. Wi Onorab Gill.

HON CHURCHILL GILL

Lo kote *wayleave* mon ti le zis, si ti posib pour mwan konnen ganny sa bann dokiman lo *wayleave* ki pa ankor gannyen, koumsa mon osi mon a kapab kontribye pour nou kapab *clear* sa. Mersi.

MR SPEAKER

Mersi. Mon mazinen *CEO*, i a *note* sa lof. Mon a pran en lot siplemanter Onorab Bernard Georges.

HON BERNARD GEORGES

Mersi Mr Speaker. Bonzour Minis avek ou delegasyon. Mr Speaker mon kestyon i sa enn, eski Minis i kapab konfirman, ki sa proze semen Salazie, avek annefe tou bann lezot poze semen, lo La Digue, lo Praslin, *or anywhere else*.

Eski pou Praslin larzan pou sa bann semen, eski se larzan ki sorti zis Praslin, oubyen eski sa bann larzan i sorti dan Bidze santral kot *tax payer* Praslin, *tax payer* Mahé, *tax payer* La Digue eksetera, nou kontribye? Mersi.

MR SPEAKER

Minis.

MINISTER ANTONY DERJACQUES

Mersi Mr Speaker. Kou sa proze i R3milyon,379,850 sa ki'n ganny peye avek sa kontrakter i R1milyon 397,119. Tou sa larzan, i sorti dan pos ban *tax payers* enkli travayer ki pey *PIT*. Ek bann anplwayer, ki pey avek bann lot *tax*, i enkli *business tax*. Sa i ganny kolekte lo tou zil, dan tou ziridiksyon Sesel.

I ganny met ansanm par en vot sorti kot Lasanble Nasyonal ki *apel Consolidated Fund*. Savedir tou larzan i ganny met ansanm. Apre Gouvernman i propoz atraver en *Bill* kot Lasanble ki mannyer atraver bann *capital project*, sa larzan i ganny seri.

E si an gro an partikilye bann Manm Lasanble i vot an faver sa *Bill* ki *Consolidation Act* i vini, e ganny konsantman Larepublik Prezidan, sa bann *capital project* i ganny met anmars. Savedir an gro sa larepons se wi, tou sa larzan i sorti kot tou bann dimoun ki travay, ki annan biznes, ki kontribye e sa larzan i ganny partaze, dapre Lalwa ler zot, zot fini pas lo la. E sa i al Praslin, La Digue e tou zil enkli Mahé. Mersi Mr Speaker.

MR SPEAKER

Mersi. Kestyon Onorab Arissol.

HON SANDY ARISSOL

Mersi Mr Speaker. Bonzour Minis avek ou delegasyon. Mon ti a kontan demann Minis de kestyon. Premyerman an relasyon avek semen Salazie. Mon ti a kontan konnen lekel kontrakter ki'n ganny - ki ti ganny *tender* pou zisteman kapab komans sa semen e konplet sa semen?

Dezyenmman mon ti a kontan demann Minis, eski letan Gouvernman pe mazin fer sa semen Salazie, eski lezot dimoun ki reste dan zanmirant sa semen par egzanp Lena Lesperance, kot Alex Moussa, zot pou konekte avek *the main* semen ki pe fer, pou ariv ziska kot zot lakour?

Parske zisteman zot napa semen. E an menm tan lo sa kestyon mon ti a kontan demann Minis, eski semen Salazie li, i pou konekte osi par lao, Madanm Rabat anler Laplenn Hollandaise, pour konekte avek nouvo semen ki pe ganny fer ki nou'n tann koz lo la ki pou al tonm Pasker?

Mersi bokou.

MR SPEAKER

Mersi. Minis sa bann leklersisman?

MINISTER ANTONY DERJACQUES

Mersi Mr Speaker. Mr Speaker eski mon kapab sizere ki mon pa donn non sa kontrakter e mon ava anvoy kot Onorab an ekrir, pli tar.

Akoz par egzanp ler mon ti vin isi, e zot ti demann mwan kestyon lo *3rd lane* kot Pointe La Rue, avek enn de bann lot kestyon, ler mon'n nonm bann dimoun parey kontrakter, ouswa bann dimoun ki pa ankor donn *wayleave*, i afekte zot, e apre zot ekrir mwan zot dir mwan zot pa pou donner, si mon bezwen al rod en *land acquisition*.

Konmsi i vin en problemn, pour Minister ler nou nonm non bann dimoun.

MR SPEAKER

Tre byen Minis. Si ou annan en rezon ou kapab, evite nonmen.

MINISTER ANTONY DERJACQUES

Yes. Prezan lo kote sa semen pou egzaktman pou tous anler. Eski mon kapab demann CEO silvouple pour reponn?

MR SPEAKER

Mersi CEO.

CEO SLTA PARINDA HERATH

Mersi Mr Speaker. Proze pou lemoman Onorab i zis lo sa semen Salazie li, lo si nou apel li *main road* Salazie. I napa okenn koneksyon ki nou pe fer. Avek sa proze i enkli zis en *road widening*.

Alors zis pour fasilite mouvman trafik, pou kapab de transpor i kapab pase. Letan nou fini, mazorite sa semen pou vin en larzer 5.5met larzer. Alors i napa nouvo, okenn nouvo koneksyon avek pour lemoman la a sa staz. I pou arive laba wi, selman i napa sa koneksyon ki ou'n dir avek soz. Mersi.

MR SPEAKER

Mersi. Kestyon Onorab Porice.

HON DOYACE PORICE

Mersi Mr Speaker. Mr Speaker, Minis ek ou delegasyon tou bann Manm Onorab bonzour. Minis eski ou satisfè, standar ek proze semen ki pe ganny fer? Konbyen lannen ki sa poze semen pe ganny fer? Mersi.

MR SPEAKER

Mersi. Ok lo konbyen lannen mon krwar Minis in donn bann detay. Minis, standar?

MINISTER ANTONY DERJACQUES

Mr Speaker, lo konbyen lannen zis mon a *remind* avek bann Onorab, sa *tender* ti ganny fer an Zilyet 2018, anba Gouvernman avan, e ti pas devan *Tender Board* an Zanvye 2019.

E kontra ti ganny sinyen e le 18 Mars 2019. Lo son standar, mon ava demann mon CEO akoz li i enzenyer osi par profesyon. E li ki *supervise* direktman e avek son zofisye Praslin, standar lo semen. Mersi Mr Speaker.

MR SPEAKER

Mersi. CEO wi.

CEO SLTA PARINDA HERATH

Mersi Mr Speaker. Mersi Onorab pou kestyon pour lemoman wi nou satisfè bann travay ki pe ganny fer lo *site*. Sa bann standar ki pe ganny swiv. Byensir i annan serten landrwa ki nou, nou kapab nou pe demann serten *improvement*.

Me selman nou bezwen konsider, petet resours ki serten kontrakter i annan osi, lo serten travay. Me selman lo kote standar, *safety* oubyen kalite travay nou satisfè avek.

MR SPEAKER

Mersi bon mon kapab fer letan pou kestyon Onorab Uranie.

HON ROCKY URANIE

Mersi Mr Speaker. Vi ki kestyon i lo Salazie, mon tann Minis dan son bann repons se, bann lezot zofisye pe nonm enn pti pe La Digue.

Mon ti a kontan petet si Mr Herath i kapab dir nou, prezan ki pou arive avek semen La Digue vi ki pou annan proze *sewage* ki pe pase pe kas semen, si prezan pou mazin fer en semen pli bon, pour nou bann transpor? Mersi.

MR SPEAKER

Mersi. Minis si ou'n sezi kestyon, ou a reponn *please*.

MINISTER ANTONY DERJACQUES

Mersi Mr Speaker, wi demars in komanse pour konnekte tou bann lakaz, La Digue avek en *centralized sewage system*. An plis ki sa bann kontrakter, osi dan zot kontra, zot pou retourn sa semen parey ti ete avan, zot in komans fouye pou met sa bann tiyo.

Pour lemoman zot in komanse. E *CEO* in dir mwan dan sa pti bout ki zot in komanse, i ase *ok*, i ase normal. Prezan *CEO* i kapab kontinyen lo la. Mersi.

MR SPEAKER

Mersi. *CEO* nou lo, mon pa ti'n realize nou'n ariv lo La Digue. Me *CEO ok*, *CEO* vi ki nou'n komanse, si ou kapab zis terminen briyevman silvouple.

CEO SLTA PARINDA HERATH

Mersi Mr Speaker. Bon avan sa proze La Digue, ti komanse nou'n fer plizyer miting avek *PUC*, ki pe fer sa proze li menm.

E nou, nou'n pas nou bann konsern, aköz sa i en proze ki pou afekte *network*, preski 80poursan, *network* semen La Digue. E i annan serten kondisyon, ansanm avek Departman Transpor ki'n ganny mete avek *PUC* avek son kontrakter, ki pe travay lo sa bann *site*. E enn sa bann kondisyon se zot bezwen *restore* sa bann semen a en nivo, a en standar ki akseptab.

E apre sa, avek resours ki pa definitivman pa deswit, me selman avek letan nou pou bezwen *resurface* an antye sa bann semen La Digue. E nou anvi met en kours beton lo bann semen.

E sa i pou ganny fer letan, Gouvernman, i kapab donn nou sa *funding* ki nesesser pou fer sa. Me pour lemoman nou osi, nou annan dimoun ki pe *monitor* tou sa bann travay ki pe ganny fer par kontrakter *PUC* e Departman Transpor osi i annan serten *monitoring* ki pe ganny fer.

Alors nou le fer sir ki zot *restore* sa bann semen a en nivo ki akseptab. Mersi.

MR SPEAKER

Mersi *CEO*. Nou a prezan pas lo kestyon 140 Onorab Mondon.

HON TERENCE MONDON

Mersi Mr Speaker. Mon kestyon i lir koumsa: -

Eski Minis i kapab eksplik Lasanble, aköz ki *SPTC* in redwir servis bis lo larout Lentandans e si son Minister i satisfè ki sa *shuttle* servis pou *off-peak hours* pe vreman reponn a bezwen zabitan Takamaka? Mersi Mr Speaker.

MR SPEAKER

Minis.

MINISTER ANTONY DERJACQUES

Mersi Onorab. Ti bezwen annan en gran reparasyon lo sa semen. Swivan travay reparasyon, ki ti ganny fer lo sa semen Lentandans, *SPTC* ti profite pou re aziste son servis bis lo sa larout, baze lo lakantite pasaze ki servi sa larout.

An se moman dan lasemenn, pou benefis bann dimoun ki pe al travay, sa de premye servis bis Lentandans i al direk anvil. E lo apre midi de servis i kit Terminal Victoria pou al direktman Lentandans. Servis i ganny ofer dan bann gran bis.

Dan milye lazournen i annan en servis ale - retour ant Quatre Bornes e Lentandans, kot la pasaze i ganny akse avek bann bis ki al Victoria.

I 95 pasaze an mwayenn par zour ki servi bis ant Lentandans e Quatre Bornes e sa sif i plizoumwen parey ti ete an Oktob 2021. Fodre fer resorti, ki omwen 85 dan sa 95 pasaze pe servi bis *SPTC*, dan letan *peak*, ki bomaten e apre midi.

Pour servis bis lekol i annan en bis ki transport etidyan, direk sorti Lentandans ale - retour. Dan *weekend*, i annan en sistenm *shuttle* ki operasyonnel ant Quatre Bornes e Lentandans.

Pou benefis bann pasaze ki bezwen pran de bis, *SPTC* in met a zot dispozisyon kart bis *Workers Special*, ki permet zot pey selman 2, olye 4 tiket. *SPTC* i dir i satisfè avek servis bis Lentandans akòz i permet li vin pli efikas.

Lakantite bis ki sifizaman pour sa nonm pasaze ki pe vwayaz lo sa larout. I enportan note, ki *SPTC* pe travay lo bann model servis, ki pou ed li redwir kou loperasyon prenon kont ki bann defi ki *SPTC*, pe fer fas avek. Mersi Mr Speaker.

MR SPEAKER

Mersi, siplemanter Onorab Mondon.

HON TERENCE MONDON

Mersi Mr Speaker. Mr Speaker zabitan Takamaka, Lentandans pa satisfè avek sa servis. Menm si *SPTC* i satisfè. Minis i annan en santenn lakour dan sou distrik Lentandans ki depan lo servis bis piblik, an plis i annan touris, ek travayer etranze ki osi depan lo sa servis *SPTC*.

Ozordi dimoun pe mars plizyer kilomet, 5 kilomet pou bann ki reste Bazarca. Nou pe vwar dimoun aze, ki bezwen al lanmes, etidyan pos-segonder, liniversite, zot osi zot pe vwar zot bezwen pey pirat pou ariv kot zot.

Minis parey ou konnen in annan en petisyon, ki zabitan Lentandans in fer kot zot in demann *SPTC* pou revwar sa *schedule* bis. E mon'n fer li mon devwar pou demann *SPTC* pou rankontre sa bann zabitan. Me malerezman sa pa'n arive.

Mon kestyon, pour Minis. Apre ki zot in resevwar sa petisyon, akòz ki zot pa'n vwar li nesese pou zwenn avek sa bann dimoun ki deza kliyan *SPTC*?

E lo menm laliny sa kestyon, Mr Speaker, eski Minis i kapab dir sa Lasanble kan ki *SPTC* pour pare pou rankontre zabitan Lentandans, afen ki nou kapab ganny en soulazman pour sa problemm bis?

Mon dezyenm kestyon, eski Minis i kapab donn ou detay, rezilta sa

monitoring ki *SPTC* ti sipoze fer, apre lentrodiksyon sa nouvo *schedule*? Mersi Mr Speaker.

MR SPEAKER

Mersi Onorab. Minis.

MINISTER ANTONY DERJACQUES

Mersi Mr Speaker. *Chief Operating Officer SPTC* Mr Geffy Zialor i la, sel keksoz mon kapab dir nou pa ankor ganny kopi koman Minister sa petisyon.

Mon'n demann kestyon la, i dir zot fek resevwar kot *SPTC*. Eski Mr Zialor i kapab donn enn pti larepons? Mersi.

MR SPEAKER

Mersi. Mr Zialor?

CHIEF OPERATIONS OFFICER SPTC GEFKY ZIALOR

Ok bonzour tou dimoun. Mersi Mr Speaker. Mersi Onorab *as well*. Wi konsernan sa bann demann pour retourn servis lo Lentandans sirtou ant Quatre Bornes e anba Bazarca.

Wi nou'n gannyen sa let ki'n sinyen par plizyer dimoun, sa petisyon. E ankor nou'n *go back*, parey nou pe dir, nou'n regard nou bann statistik nou bann data, akòz nou bann, nou pirman *data driven* par ler.

E osi nou anvoy bann lenspekter pou regarde, ki rezon e si i annan sa lenportans. Alors wi nou'n anvoy dimoun pou regarde e parey tou bann landrwa, kot nou annan en pe bann *resource constraint*, ki nou tant pou fer, nou tant pour distribye nou bann resours. E lo Lentandans dan *weekend* sirtou, nou annan sa *shuttle service* ki pe anmenn bann dimoun e lasemenn osi tou. Nou pran *maximum* dimoun pou nou monte.

Wi nou okouran i annan bann touris ki al anba lo lans. Me statistics pe montre nou ki kantite tiket ki nou pe, kantite tranzaksyon ki nou pe fer, i pa ozordi tro sa varyab pour nou an fer

desann en gran bis 60 *seat* an desandan lo Lentandans.

E nou fer sa koneksyon, sirtou dan *weekend* lo Lentandans. E par kont nou ava osi si annan ankor sa bann *issues*, nou pou bezwen rezwenn pour regarde ki mannyer nou kapab diskite *further*, pour nou amelyor si i nesese, oubyen pou fer konnen ki nou pozisyon lo Lentandans.

MR SPEAKER

Mersi. Mersi *CEO*. Minis i le azoute.

MINISTER ANTONY DERJACQUES

Mersi Mr Speaker. Prenon kont prezan ki Minister prezan i konnen i annan en petisyon, nou ava demann en kopi avek *SPTC*. E nou ava travay avek *SPTC* pou nou get ki servis pe aktyelman ganny donnen.

E si i annan okenn amelyorasyon, ki nou kapab fer avek sa servis pour bann zabitan. Mersi Mr Speaker.

MR SPEAKER

Mersi wi Onorab Mondon. Terminen silvouple.

HON TERENCE MONDON

Wi Mr Speaker. Zot pa'n reponn mon kestyon, kan ki *SPTC* pou pare pou zwenn zabitan Lentandans, pou nou kapab diskite pou vwar osi bann solisyon ki nou kapab osi ede kontribye? Mersi.

MR SPEAKER

Mersi Minis. Eski *panel* i kapab donn en dat kan?

MINISTER ANTONY DERJACQUES

Nou ava fer li dan sa mwan avan lafen Oktob. Solman mon ti ava kontan ganny en kopi avek sa rapor ki *SPTC* ek son bann *statistics*. E sa i ava ganny donnen avek *PS Andre* ek zon bann enzenyer ek son bann dimoun, pou al lo teren osi pou *monitor* pou gete.

Akoz sa i form parti zot travay pou *oversight* lo bann *SOEs*. E mon anvizaze ki i ava ganny fer avan lafen Oktob. Mersi.

MR SPEAKER

Bon lezot Manm silvouple gard zot kestyon lo size kestyon orizinal. Mon dir sa aköz kestyon letan, mon pa kapab tro- Onorab Henrie?

HON GERVAIS HENRIE

Mersi Mr Speaker. Baze lo difikilte ki ozordi Takamaka i vwar zot ladan, e ki en kestyon i bezwen vin devan Lasanble, mon anvi demann ki bann mwayen ki *SPTC* i servi pou kominik ek zabitan pou dir i annan sa bann sanzman ki pe arive.

E ki alor dimoun i konpran e zot korpore kot zot kapab. Dan menm e zot aziste zisteman. E dan dezyenm vole, ki mannyer li *SPTC* i *monitor*, i *monitor*, *whether* sa sanzman ki in fer i marse e i kit en laport pou dimoun kapab donn zot *feedback*.

Akoz mon lenpresyon i se ki souvandfwa bann desizyon in ganny pran dan biro - dan mon distrik i annan en kantite difikilte avek *SPTC* aköz sa - e ou vwar par egzantp en petisyon ki Minis pa vwar, konmsi i annan en mank kominikasyon. Mersi.

MR SPEAKER

Panel Minis.

MINISTER ANTONY DERJACQUES

Eski *Chief Operating Officer* i kapab reponn?

MR SPEAKER

We *CEO*. *Sorry*.

**CHIEF OPERATIONS OFFICER SPTC
GEFFY ZIALOR**

Mersi Mr Speaker. Mersi Onorab. Mersi Minis. Mwayen kominikasyon ki annan sirtou sak fwa nou pou annan *diversion* dans servis, *SPTC* i fer li son zefor pour

li kominik sa bann sanzman sirtou lo medya normal, *as well as* medya sosyal.

E osi ki nou tant pou fer, nou tant pour nou servi nou sistenm, *public announcing* lo *bus terminal* kot nou koz avek bann dimoun ki pe servi bis *at least* pou fer konnen egzakteman ki pe pase.

E nou annan osi en pe bann lyen, avek nou bann distrik otan posib. Mersi.

MR SPEAKER

Mersi. Onorab Roucou. Ou kestyon.

HON MICHEL ROUCOU

Mersi Mr Speaker. Bonzour a tous. Minis si ou kapab dir avek nou, eski i annan ankor bann lezot larout ki *SPTC* pe revwar pou zot revwar zot servis? Mersi.

MR SPEAKER

Ok sa i pa lo kestyon Takamaka Onorab Roucou. Eski *panel* i kapab reponn sa dan en laliny silvouple. Akoz mon annan, nou bezwen avanse.

CHIEF OPERATIONS OFFICER SPTC GEFY ZIALOR

Ok mersi Mr Speaker. Mersi Onorab. Sa bann legzersis i plizoumwèn en pe dinamik en. Si annan okenn lazistaz ki pou fer. E i pour tou dabor, i *data driven*, e nou bezwen fer sir nou ase efikas lo nou servis.

E alors si annan okenn lazistaz ki pou lemoman, petet i pa dan mon lespri poudir nou annan lazistaz ki pe al ganny fer. Sa nou ava fer kominikasyon, *as we move along*. Mersi.

MR SPEAKER

Mersi. Nou a gard kestyon lo kestyon orizinal silvouple. Onorab Ernesta.

HON PAUL ERNESTA

Mersi Mr Speaker. Mr Speaker dan menm laliny nou kontiny lo kestyon orizinal, kestyon ki Onorab Mondon in anmennen, i annan sa servis ki osi anler Takamaka St Ange.

Eski *CEO* zot pa mazin pou rezourd sa problemn, konekte sa bis ansanm ki fer en sel *shuttle from* Takamaka anler St Ange, i desann i pran sa bann dimoun Lentandans, ki a kapab ede rezourd sa bann problemn.

Akoz sa bann dimoun zot osi zot menm, zot pe debark Anse Aux Pins. Ki olye zot ava debark Anse Aux Pins, bis a kapab met zot anvil pou kapab rezourd sa problemn.

MR SPEAKER

Mersi.

HON PAUL ERNESTA

E an menm tan lo sa laliny, ti a bon non-selman reste avek zabitan Lentandans. Fer sa miting letan pe zwenn *Minister* avek tou zabitan ou kapab ganny en pli bon perspektiv lo keksoz mannyer i kapab rezourd sa problemn servis bis dan distrik. Mersi.

MR SPEAKER

Mersi Minis.

MINISTER ANTONY DERJACQUES

Mr Speaker. Eski *Chief Operating Officer* Mr Zialor i kapab reponn osi?

MR SPEAKER

Wi. Nou a pas laparol Mr Zialor.

CHIEF OPERATIONS OFFICER SPTC GEFY ZIALOR

Mersi Mr Speaker. Mersi Minis. Wi i annan sa, sa servis ki ou pe dir St Ange Estate ki byensir nou pe nou'n mazin, e nou pe fer osi tou serten - sirtou manrmay lekol bomaten. Nou fek konekte li nou, nou pe konekte li avek Lentandans.

Parey nou'n dir nou ava rezwenn, nou ava revwar, sa servis laba Lentandans ki mannyer nou kapab amelyor li plis. An prenon kont ki nou bezwen *be enn pti* pe pli efikas. E *avoid* annan bann servis ki nou pa pe - i kout

nou bokou plis, ki letan nou pe *operate* li. Mersi.

MR SPEAKER

Mersi. Bon mon krwar nou'n ganny en bon pe detay lo size Lentandans. Mon pas lo prosen kestyon 141. Onorab, 141 Mr Andre i la, Mr Zialor mon krwar i lib pour li fer son depar. E osi Mr Herath, si ou ti a kontan kekfwa, zot ti a kontan pas letan lo travay ki devan zot dan biro, oubyen dan semen. Mersi.

Bon, kestyon 141 Onorab Francois Adelaide

HON FRANCOIS ADELAIDE

Mersi Mr Speaker. Bonzour tou dimoun espesyalman bann drayver *taxi*, ki pe ekout Lasanble Nasyonal ozordi. Minis mon kestyon i al koumsa:-

Eski Minis responsab pour Transpor lo Later, i kapab eksplik Lasanble si regilasyon a propo *meter* dan *taxi* e tarif par kilomet an zeneral dan Sesel i egziste e si wi, akoz i pa ganny aplike?

MR SPEAKER

Minis ou repons.

MINISTER ANTONY DERJACQUES

Mersi Mr Speaker e Onorab osi. Wi, i annan en regilasyon *Road Transport Taxi Regulations* ki govern loperasyon en *taxi*. Sa i ganny ranforsi, par en lot regilasyon ki apel, *Road Transport Taxi Licenses Regulations*, ki ganny administre par Lotorite *License*.

Regilasyon 17 *Road Transport Regulations Taxi*, i fer provizyon pou etabli bann tarif pou *taxi*, Mahé, Praslin e La Digue dan son *schedule 2*.

E se osi anba regilasyon 19, i fer li obligatwar, ki tou transpor ki servi koman *taxi*, i bezwen enstal en *meter*. Sa tarif, pa pe ganny aplike akoz bann drayver *taxi*, pa met on zot *meter* letan kliyan anbarke, ouswa kliyan pa pe oblig zot drayver *taxi* pou met on zot *meter*.

E bann *taxi drivers* alor, i annandler bann pasaze osi, i fer zot prop pri. I enportan pou note ki en *operator taxi*, pa kapab sarz en dimoun plis ki sa pri ki'n ganny demontre lo *meter*. Par kont, zot kapab sarz pli ba si zot anvi.

Anba seksyon 24(2) *Road Transport Act*, i annan lofans ase serye ki enkli lefe ki en drayver pa servi son *meter*, pa respekte sa limit lo pri, pa met son siny *taxi* lo son transpor, e ki fer li kapab ganny pini ziskan bann lanmann R10mil, e osi al dan prizyon.

A sa moman Mr Speaker, bann Lalwa pe ganny amande pou reflekte en nouvo tarif, e sa osi i ava ogmant bann lanmann sorti R10mil pou vin R20mil.

Mr Speaker, pou donn en plis lenformasyon Minister Transpor, ki etabli bann pri tarif *taxi*, an konsiltasyon avek Lasosyasyon *Taxi*, e lezot *partner* tel ki *Licensing* e Minister *Tourism*. Sa tarif i R50 pou premye kilomet, e R30 pour sak kilomet adisyannel.

An se moman Lalwa pe ganny amande, pour reflekte en nouvo tarif. Sa nouvo propozisyon, sete pou entrodwir en nouvo fason pou sarz en kliyan, ki apel *a reducing rate*. Ki mannyer sa i marse, se olye ki tarif i etabli, en pri pou premye kilomet, e apre en lot pri, pou sak kilomet adisyannel, sa nouvo sistenm i entrodwir, en pri pou premye kilomet, e en lot pri pou sa 4 prosen kilomet. Sa i kontinyen pou tou lezot 5 kilomet adisyannel ki en *taxi* i roule.

Alors sa sistenm pou pri redwi pou sak bann kilomet adisyannel ki dan sa vwayaz. Par legzanp, si ou sorti anvil pou al Anse Aux Pins, ki apepre 13kilomet, avek sa propozisyon tarif parey, i ete konmela ou ti pou pey *comme swivan*:-

Premye kilomet R50, pour sak bann kilomet adisyannel, ou pou pey R40 ki fer en total R530. Sa pou ariv Anse Aux Pins, sorti lavil.

Avek sa nouvo propozisyon i ti pou *comme swivan*:-

Premye kilomet R50, sa premye 4 kilomet ki swiv R40 par kilomet ki fer R160, sa lot 5 kilomet R35 par kilomet ki fer R175. Sa lot 3 kilomet, R30 par kilomet ki fer R90. An total R475, konpare avek sa premye R500.

Avek sa nouvo sistenm, pri pou desann. Mon anvì osi repet ankor ki, nouvo tarif in ganny diskite dan *Cabinet*, ti annan lanons lo *State House News*. Solman i avek Minister prezan pe travay lo bann amannman pou fer li vin en regilasyon. Mersi Mr Speaker.

MR SPEAKER

Mersi. Wi Onorab Adelaide, ou siplèmanter.

HON FRANCOIS ADELAIDE

Mersi Minis pour ou larepons. En ta lenformasyon ki en pe difisil pou asimile la pou lemoman. Me selman avek letan nou ava fer li. Zis petet pou lenformasyon piblik. Akoz dimoun i anvì reganny konfyans dan bann *taxi*, akoz i en fason deplase, ki aksesib. E zis nou bezwen retourn sa konfyans. Minis petet ou kapab dir nou, apepre avan Desann ki tou sa bann keksoz, nouvo regilasyon i a sorti? Pour ki petet Desann Seselwa i a komans reservi *taxi* ankor en kou. Mersi.

MR SPEAKER

Mersi. Minis?

MINISTER ANTONY DERJACQUES

Wi Mr Speaker. *PS* in dir mwan avan Desann, solman oli ki pe travay direktèman lo la. Kekfwa i annan okenn lenformasyon adisyonnèl. Mr Speaker eski *PS* Andre i kapab koze?

MR SPEAKER

Minis. Wi *PS* ou kapab azoute.

PS PATRICK ANDRE

Mersi Mr Speaker. Bonzour, tou Onorab. Wi parey ki'n ganny enformen, nou pe travay an etrwat kolaborasyon ek

Lasosyasyon *Taxi*, pour nou kapab finaliz sa tarif.

I annan enn de bann *issues* ki nou ankor pe finalize, avek zot. E an menm tan pour nou kapab met sa tarif an aplikasyon, nou pou bezwen fer serten modifikasyon avek sa bann *taxi meter* ki egziste.

Pour nou entrodwir sa nouvo sistenm. Nou bezwen met en nouvo *chip*, e re-program sa bann *meter* pour nou kapab asire ki sa nouvo tarif i entegre dan tou sistenm lo Mahé, Praslin e osi La Digue. Mersi Mr Speaker.

MR SPEAKER

Mersi. Wi Minis.

MINISTER ANTONY DERJACQUES

Mon anvì lans en lapel, avek tou bann piblik, manm piblik, ki pran bann *taxi*. Ki ler zot anbank dan en *taxi*, espesyalman ek bann nouvo tarif mete lafen sa lannen ki pe vin dan bann regilasyon. Zot osi zot annan zot annan zot drwa pour zot demande ki sa *meter* i ganny *switch on*.

Nou, nou pe met dan regilasyon. E nou pe mete ki annefe, i vin en lofans, si zot pa met li *on*. E si zot pa donn ou en resi, se zot ki kapab *monitor*, se zot ki kapab rod ki sa bann regilasyon i ganny anforis.

E se zot ki kapab fer *complaint* kot Minister Transpor. E espesyalman kot *Licensing*. Si zot koman bann manm piblik, zot pa *safeguard* zot drwa, pou annan labi. An menm tan mon fer lapel ek bann *taxi drivers*, pou pran kont ki sa Gouvernman in reouver pei, Erport in ouver.

I annan plis travay pour zot akoz touris Sesel pe ogmante. I annan bokou plis biznes, ki'n *come online*. I annan ase travay pou bann *taxis*, ki anvì vremen travay e pa stasyonnen pou 10erdan en landrwa par egzanp lo Erport.

Partou dan lemondan ban *taxi drivers* zanmen i aret roule. Zot monte desann, menm dan en kwen semen zot

pick up en dimoun, zot *drop* li en kilomet. E nou pa kapab ariv en staz, kot par egzanp lo Erport, si ou pa pe al plis ki 10 kilomet ouswa 8 kilomet, zot pa pou reste la pour 10erdtan zis pour zot ganny en touris ouswa en Seselwa, pou zot ganny en pri R1500 - R2000 apre zot antre kot zot.

I pa koumsa ki *taxis* i devret *operate*. Mon konnen i annan plis ki 500 zot. E mon konnen ti annan bann letan ki lafous in mir, e Eleksyon pe vini, tou dimoun i ganny en *loan* kot *DBS* pou aste en loto nef. E pour zot fer en *taxi*.

Prezan dan enn pti pei parey Sesel, nou annan 500 *taxi* ki bokou, ki tro bokou, nou pa kapab kontinyen dan sa fason. *Taxi drivers* i devret pe travay pe roule, e pa pe stasyonnen pe esper en dimoun ouswa de dimoun dan en zournen travay.

Alor mon demann ban *taxi drivers*, pou fer en travay ki bokou pli bon e efikas. E mon demann piblik, pour zot osi anforse e pran zot drwa dan zot lanmen, e koumsa keksoz i kapab vin bokou pli efikas. Mersi.

MR SPEAKER

Mersi. Minis nou aprezan pas lo siplemanter. Onorab Pillay.

HON SEBASTIEN PILLAY

Mers Mr Speaker. Mr Speaker eski Minis i kapab dir nou. Prenon kont bann lenformasyon, ki ou pe donn nou e mwan osi mon pe get sa Lalwa.

E lefe ki nou'n *merge road Transport Commissioner* avek Departman Transpor. Eski zot kapab dir nou, konbyen *meter* i annan dan bann *taxi* ozordi? Konbyen *meter* i annan dan bann *taxi* ozordi. Eski tou *taxi* i annan en *meter* ozordi?

E mon dezyenm kestyon ou'n dir ou'n antreprann bann diskisyon, depi kan ou'n antreprann bann diskisyon avek Lasosyasyon *Taxi*? E lekel ki ansarz oubyen ki sipoze pran kontrol sityasyon an sa ki konsern sa *size metering*. Eski

se lasosyasyon *taxi*, oubyen se Departman Transpor Mr Speaker?

Akoz mon pe ganny lenformasyon Mr Speaker, par plizyer *taxi drivers* ki pe dir zot napa *meter*. So kwa egzaktaman ki nou pou *chip* ladan Mr Speaker?

MR SPEAKER

Mersi. Minis.

MINISTER ANTONY DERJACQUES

Mersi Mr Speaker eski *PS* Andre i kapab reponn.

MR SPEAKER

Yes, *PS*.

PS PATRICK ANDRE

Mersi Mr Speaker. Bon mersi Onorab pou ou kestyon. Bon pou premye kestyon kot i konsern lakantite *taxi meter* ki annan dan bann *taxi*. Mon kapab dir plis ki 80 pousan bann *taxi*, ki egziste zot annan bann *meter*.

Me zot pa pe, swa zot in retir zot bann *meter* dan zot transpor li menm. Sof bann nouvo operater, pandan san dernyen 1an edmi -2an ki zot napa *meter* dan zot *taxi* li menm li. *Ok?* An sa ki konsern diskisyon avek lasosyasyon, sa diskisyon in kontinyen pandan plizyer lannen. E pour sa bann dernyen letan la, nou'n antre avan ki nou ti prezant sa papye avek *Cabinet*, ti annan bann diskisyon ki nou ti fer, depi 2019-21-22 avek Lasosyasyon *Taxi* e osi avek lezot partener ki annan.

E diskisyon, i kontinyen avek lasosyasyon. An sa ki konsern lekel ki responsab pour *taxi meter*. Se normalman sete *Road Transport Commission* ki ti responsab.

Be la in merge avek Departman Transpor. E setadir, Departman Transpor i pran sa *full* responsabilite, kot i konsern sa bann *issues taxi meter*, pou fer sir ki *taxi meter* i *available*, pou fer sir ki bann *taxi meter* i ganny kalibre letan i nesaser.

E osi annan nou lazans ki nesese pou fer bann reparasyon lo bann *taxi meter* ler i annan sa bann nesese pou annan. E parey nou'n dir avek sa nouvo amannman ki pe vini, nou'n deza fini an kontak avek sa lakonpanyen ki founi nou sa bann *meter* ki nou pe servi la.

E sa bann pri ki pou ganny determinen pou ganny met dan en *chip*, ki kot apre pou nou kapab remet li dan sa bann *taxi meter*, pou nou kapab fer sir ki tou sa bann *taxi meter*, i annan sa *chip* apropiye.

E programmen pou kapab met sa nouvo sistenm tarif ki pe ganny met an aplikasyon. Mersi Mr Speaker.

MR SPEAKER

Mersi. Wi be permet nou bouze silvouple, mon annan lezot Manm ki pe atann.

HON SEBATIEN PILLAY

Mersi Mr Speaker. Mon le permet nou bouze akoz pou nou kapab konpran en keksoz. Eski nou kapab ganny en lasirans avek Minis Mr Speaker atraver ou, ki Lasanble Nasyon pou ganny en dokiman, ki dir nou konbyen *meter* i annan dan bann *taxi*. E kote zot pou ganny Bidze zisteman pou aste sa bann *chip* ki zot pe koz lo la, oubyen *meter* adisyonnèl ki zot sipoze met dan bann *taxi*?

Rezon mon dir sa Mr Speaker, se akoz ler mwan mon'n dan Gouvènmman, menm zafer in vini. E nou kontinyen ale vini, ale vini, ale vini ek sa problem.

E i paret pou en dimoun ki'n pa'n ganny elekte paret mwan mon pli konekte...

MR SPEAKER

Annou les *PS* reponn. Silvouple.

HON SEBATIEN PILLAY

... so i enportan ki nou ganny sa lasirans... nou ganny sa lasirans ek Gouvènmman lo la Mr Speaker.

MR SPEAKER

Mersi Onorab Pillay ou pe gat nou letan. *PS* eski ou pou kapab donn sa lenformasyon ki Onorab Pillay in fer referans avek.

PS PATRICK ANDRE

Mersi Mr Speaker. Wi nou kapab etabli tou sa bann lalis, tou sa bann operater *taxi* ki annan en *meter*. E tou sa bann operater *taxi* osi ki napa en *meter* dan zot transpor.

Lo kote bidzeter sa laranzman entèrn, dan Bidze egziste, nou pe fini finaliz sa ansanm avek Minister Finans, ki mannyer pou nou kapab *sort out* sa *issue*. Mersi Mr Speaker.

MR SPEAKER

Bon mon a sey pran ankor enn de siplemanter. Onorab Samynadin.

HON KELLY SAMYNADIN

Mersi Mr Speaker. Bonzour Minis avek ou delegasyon. Minis avek devlopman dan teknolozi, plizyer biznes e lorganizasyon pe rod fason inovativ pou amelyor zot servis ki zot donnen atraver lentrodiksyon bann aplikasyon.

Eski i annan en konvèrsasyon, ant Gouvènmman e Lasosyasyon *Taxi*, pou zot osi bouz dan sa laliny pou zot vin pli aksesib, osi byen ki mentenir en pri kontrol, e standar dan tarif ki pe ganny aplike?

En pe parey *Uber app* ki egziste dan serten pei. Mersi.

MR SPEAKER

Mersi Onorab. Minis.

MINISTER ANTONY DERJACQUES

Mersi Mr Speaker. Plizyer fwa ler nou'n zwenn e mon'n pran par dan enn de sa bann miting, toultan lo nou *agenda* se sa seksyon kot nou pe sey *improve* bann servis, e nou pe sey ankouraz bann *taxi drivers* osi, pou zot amelyor zot servis. E osi pou bouze.

I annan demann pour plizyer lot servis. Par egzanp *luxury cars*, bann *HV* ki anvi antre dan *taxi service*. Bann diskisyon ki napa ase travay pour zot, bann diskisyon ki annan *moratorium* e gard sa *moratorium*. Pa les lot dimoun *join* akoz i annan deza 500 zot.

Toultan sa diskisyon i lo la, ki mannyer nou pou *improve* e teknolozi i enn bann keksoz. Zot per annandler ki nou kapab liberalize e les bann dimoun pran kontrol sa sekter, annan bokou *taxi* ki kontrole par en lakonpanyen.

Toultan i annan sa bann diskisyon, e mon kapab dir ou i *very lively*. Akoz bann *taxi drivers* ek zot asosyasyon, toultan zot annan en pwennvi lo tou keksoz. Ou kapab konn sa osi, e nou vwar sa partou dan lemonn. *Taxi drivers* zot *very vocal*, zot konn zot drwa. E zot bann dimoun ki for e ki kapab travay dir.

E wi alor i annan sa diskisyon lo *digitalization*, e lo *efficiency*. Mersi Mr Speaker.

MR SPEAKER

Mersi. Mon ava apel Onorab Uranie, son kestyon.

HON ROCKY URANIE

Mersi Mr Speaker. Minis mon ti anvi konnen kan ki konsiltasyon ti fer, La Digue bann drayver *taxi* konsernan nouvo tarif?

E eski sa bann drayver *taxi*, ler zot pou servi *meter* zot in dakor, zot in santi pou vyab pou zot kapab ganny ase larzan pou repey zot *loan*? Mersi.

MR SPEAKER

Thank you. Minis.

MINISTER ANTONY DERJACQUES

Mr Speaker eski *PS* Andre i kapab reponn sa kestyon.

MR SPEAKER

PS Andre wi.

PS PATRICK ANDRE

Mersi Mr Speaker. Bon dan ka La Digue, lasosyasyon ti nomin en reprezantan sorti La Digue, ki ti asiz lo bann diskisyon ki nou ti fer. So se atraver sa reprezantan ki ti prezan dan nou bann miting ki sa bann diskisyon in ganny fer. E bann diskisyon pri zistans ensidswit ti osi, etabli.

Sa osi ti aplik pour Praslin osi tou. Ti annan en reprezantan, lo Praslin osi tou. Parey osi pou bann reprezantan lo Mahé. Kot tou sa bann diskisyon pri ki zot pe sarze, e bann pri ki ti pe ganny propoze ti ganny diskite.

So in annan bann diskisyon avek bann reprezantan bann operater *taxi*, lo Praslin lo Mahé, e lo La Digue. Mersi Mr Speaker.

MR SPEAKER

Mersi. Kot mon ete la, Onorab Labonte ou kestyon.

HON ANDY LABONTE

Mersi Mr Speaker. Bonn apre midi Minis avek ou *panel*. Bon dapre larepons ki nou'n gannyen, se ki i annan en Bidze ki'n ganny mete pour entern pour aste *meter*. Me si mon mazin tre byen, e dernyen fwa ki bann *meter* ti ganny aste bann nouvo *meter*, ti an 2015-2016.

E *taxi drivers* in plizoumwen peye pour sa bann *meter*. E eski zot kapab donn en konfirmasyon, poudir sa bann *meter* i fonksyonnel. E ler zot pe etabli bann pri, bann nouvo pri eski zot pe pran kont tou depans ki en *taxi operator* i fer pour li kapab *operate* son biznes, oubyen zot pe get zis sa pri *fuel* li menm li.

Apre mon dernyen kestyon, a la lezer, eski zot pe mazin pou al dan sa laliny, petet pou afis serten pri. Sirtou kot bann *taxi bay* prensipal, parey lo Erport ki kapab dir, poudir be *ok* pour sorti lo Erport pou al *Inter Island Jetty* i kout tan, sorti Beau Vallon pou al tel landrwa i kout tan.

Dan lespri pour nou redonn konfyans Seselwa ek viziter, dan nou bann *taxi driver* ki pe fer vreman en travay onnet e byen dan sa pei? Mersi.

MR SPEAKER

Mersi Minis.

MINISTER ANTONY DERJACQUES

Mersi Mr Speaker. An sa ki konsern bann pri, sa ki nou'n propoze i parey mon'n donn dan premye larepons. Kot i komans par en sif ki premye kilomet R50. Dezyenm 4 kilomet, dezyenmman sa lot 4 kilomet R40. Lot senk kilomet R35 e apre sa R35, 5 kilomet i vin R30. E sa i ganny met dan lenformasyon i dan sa *chip* ki al dan sa *meter*.

E mon'n donn apepre konbyen i arive, sorti par egzantp Anse Aux Pins pou vin anvil, ki vin R475. Alors si sa *meter* ek sa *chip* ki anrezistre sa ban lenformasyon, ki dir ou aktyelman konbyen ler ou sorti en landrwa, pou ariv par egzantp anvil, pou kout ou.

An sa ki konsern bann pri, nou gide par bann depans ki bann *taxi drivers* i fer. Par egzantp pri ou *taxi* ler ou ti aste, lasirans ki ou pe peye tou le lannen. *License* ki ou pe peye koman en *taxi driver*, pri pou teste ou veikil, lentere lo okenn *loan* ki ou'n pran pou aste ou loto.

Pri *fuel* ki ou'n depanse, depans pou fer mentenir ou veikil. Sa i bann *routine* menntenens. Saler pou en drayver *taxi* ki nou'n kapab kalkil i apepre R12mil par mwan. Alor nou pran sa an konsiderasyon, an gro. Pri larou, pri *driving license*, pri *spare parts*, pri *road fund license*, e se depresyasyon ou transpor, sa *taxi* li menm li.

Mr Speaker si annan okenn lot bout *PS* Andre osi i kapab tous lo la.

MR SPEAKER

PS si ou annan silvouple, fer li vit. Mon bezwen letan pou en dernyen kestyon.

PS PATRICK ANDRE

Mersi Mr Speaker. An sa ki konsern kondisyon bann *meter taxi*. Definitivman la letan nou pou komans sa *process*, sak bann operater *taxi* i bezwen anmenn zot *meter* kot Departman Transpor.

Kot nou pou verifie, tyeke si i pe fonksyonnen oubyen non. Si i pa pe fonksyonnen, nou *sort out*, son bann problemm ki annan. Me si i pe fonksyonnen byen, nek zis nou pou met sa nouvo *chip* dan sa bann *taxi*, e rekaliibre li e apre zot kapab servi zot *meter*.

I pou arive ki annan bann dimoun ki zot *meter* in kase. Dorenavan si zot *meter* in kase lo zot menm, zot, zot pou bezwen aste nouvo *meter* pour ranplase dan zot *taxi*. Mersi Mr Speaker.

MR SPEAKER

Mersi. Onorab mon bezwen bouze *sorry*. Nou pou avanse, mon annan zis ase letan pou pran en dernyen kestyon.

Selman nou bezwen apel Mr Garry Albert.

Mersi bonzour e byenveni Mr Garry Albert, *Chief Executive Officer Seychelles Civil Aviation Authority*. Pour sa kestyon ki lo *Order Paper* 142, Onorab Audrey Vidot.

HON AUDREY VIDOT

Mersi Mr Speaker. Bonzour Minis avek ou delegasyon, tou Manm Onorab. Tou dimoun ki a lekout espesyalman bann drayver *taxi*. Mon kestyon i lir *comme swivan*: -

Apre ki in annan plizyer konsern parmi *taxi drivers* e resaman Prezidan li menm in fer resorti ki i annan problemm Erport par bann *taxi drivers*, eski Minis i kapab enform sa Lasanble ki son Gouvernman in fer pour adres e rezourd sa bann problemm? Mersi Mr Speaker.

MR SPEAKER

Mersi. Minis.

MR SPEAKER

Mersi. Minis.

MINISTER ANTONY DERJAQUES

Mersi Mr Speaker. I nou Gouvernman, pa zis pou mwan. Mr Speaker pandan sa bann dernyen lannen SCAA i kontinyelman an diskisyon avek Lasosyasyon *Taxi* konsernan sityasyon lo *Airport*.

SCAA in met en zofisye permanan dan bann *toilets* pou fer sir ki napa okenn drayver *taxi* ki vin bennyen lo son propriyete. I osi annan en zofisye ki pase detanzantan pou note lekel bann drayver ki pe dormi dan zot loto dan *parking*. I osi annan konplent ki'n ganny fer avek Lotorite ek *license* avek Lapolis lo sa bann size.

Si sa sityasyon pa amelyore, SCAA pou restrikte aske bann drayver pour ki zot park zis lo *perimeter Airport* pou asire ki i annan plis lord ek disiplin dan *Airport*. Bann drayver in deza ganny averti ki zot pa devret pe asiz e fer tapaz devan bann servis komersyal tel ki devan *Sey Bar*. *Sey Bar* i sa restoran ki dan larantre.

Schedule 3 i etabli en *code of conduct* pou tou bann drayver *taxi*. Lapolis ek Lotorite *License* i annan Lotorite pou patrole, arete e sanksyon okenn drayver ki pe komet okenn lofans anba *Road Transport Taxi Licenses Regulations*, seksyon 24(2) e *Road Transport Act*. E i annan bann penalti.

Mr Speaker mon anvi azoute e dir ek tou bann *taxi drivers* ki travay lo *Airport*, ki SCAA in fer en kantite in grandi sa landrwa kot zot park, in amelyor sityasyon, Gouvernman in reouver *Airport*, bann *Airlines* nouvo nou pe travay pou zot vini e i annan enn de ki'n vini e i annan ankor ki pe vini.

Touris pe ogmante e nou pe ariv bann sif ki pre avek 2019, e alors bann biznes dan bann lotel dan bann *guesthouse* partou i annan. Touris i pa zis lo *Airport* - touris i partou Mahe, Praslin ek La Digue.

Alor mon sipli avek bann *taxi drivers* ankor enn fwa, pa zis park pou

10erdtan ouswa dormi dan zot loto lo *Airport*, pou zot anmas en pasaze ki zot sarz en gro pri apre zot al kot zot, en pasaze ouswa 2 par zour. Komans en lot metod travay, rod en fason ki zot debourye, ki sa loto pa zis park, ki zot fer letour, ki zot anmas bann Seselwa partou e zot sarz bann pri ki pou dan regilasyon, bann pri ki rezonnab.

Si ou sarz tro o, Seselwa pa pou pran *taxi*, Seselwa pou pran sa ki nou apel *taxi* prive, seselwa pou al dan bann lot *car hire*. Akoz en *car hire* konmela i R700 par zour, e si ou pe al sarz en dimoun pou en *trip* plis ki R700, sa Seselwa pou pran en *car hire* ki i kapab roul ladan pou en zournen antye li ek son fanmir.

Alor mon fer en demann, mon lans en demann ankor enn fwa ki nou, nou konn nou drwa koman manm piblik ler nou pran en *taxi*; e de ki bann *taxi drivers* i osi vin pli profesyonnel pli efikas e nou, nou pou travay byen pou nou fasilite zot travay koman bann *taxi drivers*. Mersi Mr Speaker.

MR SPEAKER

Mersi. Ou siplamanter Onorab Vidot?

HON AUDREY VIDOT

Mersi Mr Speaker. Mersi Minis pou ou larepons. Minis swivan ou dernyen komanter ki ou'n dir ki zot oule fer en fason pou ed bann *taxi drivers* fer byen zot louvraz.

Eski zot in rod en fason pou zot regard konsern kot bann *taxi drivers* in dir poudir i annan bann *omnibus* ki pa neserman swiv menm regilasyon avek bann *H1* e zot pe fer kours kot *Airport*. Eski zot pe adres sa osi?

Ki aksyon ki zot pe pran avek bann *omnibus* ki pe fer bann kours? E ou'n konnen poudir dan lavil kot *taxi stand* i annan bann landrwa kot bann *taxi drivers* i kapab asize apard ki asiz dan zot transpor en zournen oubyen letan pe esper kours.

Kwa ki kot *Airport* provizyon in ganny fer pou fasilite bann *taxi drivers* annan en landrwa pou zot osi asize pou esper kliyan, letan i vini pou zot fer zot bann kours?

E dernyerman Minis kot *Airport* nou konpran poudir *toilet* fasilite *toilet* i ganny servi par travayer, i ganny servi par kliyan ki vin lo *Airport* oubyen ki pe sorti *Airport*, i pa zis *taxi drivers* ki pe servi *toilet*.

So eski letan ou'n dir mwan ou pe met en Zofisyè permanan, e i pou annan en legzersis ki zot pou fer pou vwar si vremen zis *taxi drivers* ki pe fer sa bann aksyon kot bann fasilite *toilet* e si zot war poudir, si zot pe met en Zofisyè permanan eski *taxi drivers* osi pou ankor kapab servi fasilite *toilet* prenon kont ki zot pe esper kliyan lo *Airport*? Mersi.

MR SPEAKER

Mersi. Minis.

MINISTER ANTONY DERJAQUES

Mersi Mr Speaker. Mon ava koz an zeneral, apre PS Andre i pou kapab antre an partikilye lo *omnibus* e bann nouvo servis ki nou'n ofer *omnibus*. E CEO Mr Albert i kapab koz lo bann lot fasilite ki'n ganny donnen avek bann *taxi drivers*, pou amelyor zot sityasyon enkli plis *parking space*.

Mr Speaker dan nouvo *Public Transpor Policy*, nou'n kouver par egzanp tou seksyon ki enkli *omnibus*. *Omnibus* in ganny dir ki nou Polisi lo *Public Transportation* in ganny liberalize, e zot osi zot kapab antre atraver bann proze ki zot soumet avek nou dan *public mass transportation* an konpetisyon direk avek *SPTC*.

Alor nou'n grandi sa landrwa pou zot *operate* ki zot devret viz lo vin pli gro, pli efikas e transport bokou plis dimoun. Savedir nou pe tir bann restriksyon lo bann *omnibus*. Nou pa ankouraz zot pou desann anba pou al *compete* ek bann pli pti veikil, bann veikil *taxi*. Nou pa

ankouraz sa ditou e PS Andre i ava elabore lo la.

An sa ki konsern *toilet* - zis mon ava dir lo *Airport* ki sa *staff* permanan dan bann *toilet* i la pou fer sir napa bann nwizans par egzanp pou vin, okenn dimoun ki sey vin benny dan lavabo, ouswa okenn dimoun ki servi sa dan en fason ki pa normal, ki pa rezonnab.

Taxi drivers i annan drwa servi fasilite ki enkli *toilet* lo *Airport*. Solman nou pa rekomande ki ou dormi, e ler ou konnen ki ou pe vini ete 3er edmi, 4er bomaten ou tay dan twalet ou al bennyen, bros ledan, dan ou servyet, ou pe marse konmsi ou kot ou, fodre sa pa ariv ankor. Nou annan tou bann portre kot zot dormi, kot zot servi sa landrwa koman se zot.

E se pa sa, nou tou nou vwayaze, nou tou ou pas lo bann *Airport*, e nou war ki mannyer bann servis i ganny servi dan en fason profesyonnel e avek respe. E se sa ki nou anvi avek nou *Airport*. E son lakle se ki i annan biznes partou Mahe. Biznes i pa zis lo *Airport*. Ou pa sipoze pe *spend* 8erdtan dormi lo *Airport* pou zis en pasaze. Ou sipoze en *taxi* ou, ou sipoze pe donn servis tou dimoun Anse Aux Pins, Cascade;- konmsi ou sipoze pe sirkile, ou sipoze pe anmas 20 dimoun, 30 dimoun.

Onorab ou'n vwayaz dan en kantite pei espesyalman koman en Onorab Manm Lasanble Nasyonan, e mon asir ou ler ou pas lo bann *Airport* ou war bann loto pe vini pe ale, dimoun i anbarke i ale e *taxi* i retournen deswit i annan dimoun i pran i ale. I pa stasyonn la e i pa dormi la e sirtou i pa servi sa lasanmben parey i servi sa enn kot li. Mersi Mr Speaker.

MR SPEAKER

Mersi. PS avek CEO pou azoute silvouple. Annou fer li bref.

PS PATRICK ANDRE

Mersi Mr Speaker. Mon a koz lo *omnibus issues*. Normalman *omnibus* i annan son prop regilasyon e parey Minis in fek fer resorti i annan en nouvo Polisi ki pe fini finalize ki pe ganny aprouve par *Cabinet* dan sa direksyon.

Omnibus i restrikte dan son ban loperasyon ki i fer. I pa sipoze pe *compete* avek *taxi operators* pou vin lo *stadium* oubyen lo *Airport*, oubyen dan bann stasyon kot lotel pou vin *pickup* en pasaze koumsa.

Normalman zot baze lo bann Kontra ki ganny fer, zot kapab anmenn parey bann *funeral groups*, *team*, zot fer *staff transport*. E osi parey nou'n war letan ki *SPTC* in sorti dan Kontra *Omnibus Operators* in ganny sa loportinite pou li antre dan Kontra pou saroy bann travayer lotel oubyen nenport ki lenstityon ki annan bann biznes, *ok?*

Zot osi kapab antre dan Kontra avek bann *DMCs*, si *DMCs* son kapasite pa sifi, zot kapab touzour *contract out* bann *taxi operators* pou fer sa servis adisyonnèl. Sirtou osi dan ban ka kot i annan bato touris ki vini ou war en kantite sa bann enteraksyon ki antre.

Zot osi zot pe transport bann etidyan pos-segonder pou bann lenstityon ki annan zot prop Bidze pou transpor parey *Nursing School*, parey *Tourism Academy* pou nonm enn de. So sa i en pti pe bann loperasyon ki *omnibus* i kapab fer anba Lalwa ki deza egziste.

So nou, nou pe fini finaliz zot Polisi avek bann nouvo regilasyon ki pou vin an plas. E nou espere ki sa bann lafen sa lannen, sa bann travay pou'n ganny finalize e nou ava annan nou en nouvo regilasyon ki'n ganny amande, e en nouvo Polisi pou ou kapab swiv. Mersi Mr Speaker.

MR SPEAKER

Mersi. *CEO* ti pou azout serten detay.

CEO SCAA GARRY ALBERT

Mersi Mr Speaker. Bonzour tou bann Manm Onorab. Mersi Onorab pou ou kestyon.

An repons kestyon lo landrwa ki bann *taxi* drayver i kapab asize, espere an atandan kours, pou lemoman nou annan 2 landrwa ki *taxi* drayver i kapab stasyonnen *Airport*. Enn direkteman an sortan *arrival*, i annan apepre 5 *slot* e la osi i annan landrwa asize ki bann *taxi* drayver i espere.

Aprè nou annan dezyenm landrwa ki *taxi* drayver i espere se kot *carpark* kot pye kalis. E nou'n annan nou miting avek bann *taxi* drayver dan lepase e sa i enn bann *request* ki zot in met devan ki zot ti a kontan en dezyenm landrwa stasyonnen ki kouver. E nou pe pran konsiderasyon sa.

Nou pe pran konsiderasyon kot nou pe fer en pti *kiosk* kot zot kapab ganny en landrwa pi zot kapab asize espere e nou pe *plan* ki sa i ganny enplimante lannen prosen. Zis pour fer rapel osi ki i deza annan en landrwa kot zot espere, me nou pe al fer en dezyenm landrwa pou zot kapab espere.

Dezyenm kestyon lo kote *toilet*. Nou, nou'n fer kler avek en bann *taxi* drayver ki *SCAA* pa defann okenn *stakeholders* servi *toilet*. Tou dimoun i kapab servi *toilet* e sa i la pou zot tou, travayer, touris, pasaze, *taxi* drayver, travayer *Airport and so forth*, tou dimoun i kapab servi. Me sa ki nou demande ki se zot servi li byen, servi li byen e annan respe pou bann fasilite ki nou met a dispozisyon.

Akoz nou'n vwar, nou'n vwar, nou travayer i vwar labi ki ganny fer par bann *taxi* drayver menm. Akoz par egzanp letan dernyen avyon i ale nou bann *cleaners* i pase, i netway tou bann *toilet* e ekspekte ki personn pa pou servi ziska landmen bomaten akoz *Airport* i *more or less* fer, me akoz napa aktivite.

Me ler pasaze i retournen dan bann, i komans servi *toilet* dan bann 4er, 5er bomaten e *cleaners* osi i komans arive dan sa bann ler, zot vwar sa kantite

dezord ki annan dan *toilet* e kestyon i demande be lekel ki'n servi *toilet* dan sa bann granmaten e zot in vwar.

E parfwa bann *cleaners* menm i vin zwenn bann *taxi* drayver pe pran *shower* dan *toilet*. I annan en fasilite kot ou kapab pran ou *shower*, sa i *ok* sa, me pou bann ki pe fer li dan lavabo, pe fer dezord e zot menm dir ek sa bann *cleaners* "la nou'n fer dezord la pou ou netwaye, si napa dezord ou pou napa saler!"

Me sa i bann remark ki en pe demotive pou bann travayer ki fer bokou. *Airport* i gran e nou napa sa kantite travayer, e nou demann bann *taxi* drayver, pa zis *taxi* drayver me tou bann *stakeholders Airport* ki silvouple annou servi li byen. E aköz nou anvi gard sa nivo lapropte parey nou vwar dan tou bann *toilet*.

E parey Minis in fer sorti SCAA gradyelman pe komans met en *permanent attendant* dan tou bann *toilet*, parey nou vwar dan plizyer *Airport* atraver lemond, ki en fason ki tou dimoun ki servi sa fasilite i vwar li prop a tou moman. Mersi.

MR SPEAKER

Mersi. Nou *out of time*. Ale mon donn ou 30 segonn Onorab.

HON AUDREY VIDOT

Mersi. Mr Speaker parey mon dir dan mon kestyon, kwa ki pe ganny fer pou rezourd? Parey zot in met serten - nou konnen poudir wi, zot pe servi fasilite zot bezwen servi li byen.

Pou li pa repet ankor i bezwen annan aksyon ki ganny pran avek sa enn ki pe kase. Kwa ki zot pou fer avek sa dimoun si zot war, nou pe tir larzan dan fon pou pey en travayer pou veye, kwa ki zot pe fer?

MR SPEAKER

Mersi Onorab. Eski *panel* i annan en repons?

CEO SCAA GARRY ALBERT

Mersi Onorab. Parey dan plizyer miting ki nou'n fer avek bann *taxi* drayver. Nou'n dir zot, zot in fer bokou demann avek SCAA dan leparse. Zot in anvi plis *parking*, nou'n met a dispozisyon. E zot in demande ki par egzanp bann nouvo fasilite ki zot kapab servi. Aköz ti annan konplent aköz zot al kot restoran *and so on*. Nou dir be sa i a dispozisyon tou dimoun.

Me nou osi ekspekte ki koman adilt nou merit pran nou responsabilite. Nou pa kapab ekspekte SCAA al *remind* bann adilt 30an, 40an, 50an ki mannyer pou servi en *toilet*. Nou, nou dir sa i bann lesan ki ou aprann depi ler ou sorti lakour ou paran, i monte ou ki mannyer pou servi fasilite. Mon pa krwar i annan okenn *taxi* drayver ouswa okenn adilt ki ler i kot li i pran son *shower* dan lavabo kot li.

E ler ou vin *Airport* nou pe demande pou senpleman servi sa bann fasilite parey bann adilt ki annan lesan, ki konpran, ki annan savwar viv. Aköz si ou'n vin dan sa Lendistri *Tourism* ou'n pas dan serten *training* avek letid ki ou'n gannyan avan ou *license taxi* ki mannyer ou pou deservi kliyan.

I annan kliyan i vini i dir ou i pa asire ki sa en *taxi* drayver, aköz i war li tou devergonde. Parey nou ler nou al dan en pei, nou gete nou anvi asire ki nou pe al anbark dan en *taxi* ki *safe*, be kliyan osi i fer sa *assessment*.

E nou, nou bezwen donn koudmen pou promet limaz nou pei. Nou pa kapab ekspekte SCAA, nou bann prop travayer pou al gete lekel ki pe bennyan, lekel ki *flush toilet*, lekel ki pe fer se si.

E i menm arive *taxi* drayver i pase anba terminal avek en boulwar elektrik, i pe rode kote i pou ganny en *socket* pou li bwi son delo! *Comme* dir, mwan mon ti a kontan ki tou dimoun enkli Manm Lasanble ler bann *taxi* drayver i vin koz avek zot, annou servi sa loportinite pou nou edik sa bann dimoun, pou dir i

annan en serten nivo konportman ki ganny respekté.

Me non, pa pou anvoy boul dan kare SCAA pou dir avek SCAA i nou pou fer pou nou edik sa bann grannwanr ki manner pou servi *toilet*. Mersi Mr Speaker.

(laughter)

MR SPEAKER

Mersi. Bon nou *out of time*, nou'n terminen. Mon remersye Minis e son delegasyon. Mon dir zot bon kouraz pou kontinyasyon zot travay. Nou a pran poz la nou a rebran travay 2er aköz nou *behind schedule*. Mersi pou sa pti letan ki zot in donn mwan dan zot ler dezennen. Mersi.

(BREAK)

MR SPEAKER

Bonn apre midi tou dimoun. Nou a rebran travay pou apre midi. Madanm raporter nou ava apel Minis Devika Vidot. Bonn apre midi e byenveni Minis Devika Vidot, Minis pou Lenvestisman Lantreprenarya ek Lendistri. E dan son delegasyon Mr Roy Collie *CEO Industrial Estate Authority*. Mr Barry Assary *Deputy CEO*. Mersi pou zwenn nou pou sesyon kestyon apre midi. E nou al lo kestyon 143 Onorab Francois Adelaide.

HON FRANCOIS ADELAIDE

Mersi Mr Speaker. Bonn apre midi Mr Speaker. Bonn apre midi Minis ek ou delegasyon. E tou bann dimoun ki a lekout. Minister Vidot mon kestyon i koumsa pou ou.

Eski Minis responsab pour Departman Lantreprenarya i kapab donn detay apropo en *Grant* anviron \$800mil ki Gouvernman Sesel in sipoze gannyen avek (ADB) *African Development Bank* dan proze *FAPA* pour siport devlopman bann *Small and Medium Enterprises (SMEs)* sirtou dan sa lepok difisil? Mersi Mr Speaker.

MR SPEAKER

Mersi Onorab. Minis ou repons silvouple.

MINISTER DEVIKA VIDOT

Mersi Mr Speaker. Bonn apre midi Mr Speaker. Tou bann Manm Onorab ek tou dimoun ki a lekout.

Mr Speaker dapre lenformasyon ki mon'n resevwar, an 2018 Sesel ti resevwar en fasilite atraver *African Development Bank (AFDB)* nonmen '*Seychelles MSME Development Project*. ' Obzektif zeneral sa proze, ti pou siport reform Gouvernman pou promouvwar devlopman pti e mwayen lantrepriz dan Sesel.

Sa proze ti annan de lobzektif prensipal;-

Premye, formilasyon en stratezi devlopman pti e mwayen biznes.

Dezyenm, ranforsi kapasite de Lazans ki travay direkteman avek promosyon pri e mwayen biznes dan Sesel.

Sa se *Small Business Finance Agency (SBFA)* e sa Lazans ti ofer kredi pti e mwayen biznes e *Small Enterprise Promotion Agency (SEnPA)* ki asir promosyon e devlopman pti e mwayen biznes. Sa fasilite ti anform en *Grant* ki ti ariv en to anviron \$800mil e Gouvernman lo son par ti kontribye adisyonnelman \$200mil.

Proze ti konpri 5 diferan konponan. Premye konponan ti viz anver preparasyon stratezi devlopman pti e mwayen biznes pour Sesel. Sa ti konpri formilasyon sa stratezi, peyman pou konsiltan pou fer *Industrial Estate Management* pou fer en pe travay lo la. E osi travay pou revwar *Lalwa Licensing*.

Dezyenm konponan, ti santralize otour ranforsi kapasite enstitisyonnelman *SEnPA*.

Trwazyenm konponan ti pou ranforsi kapasite enstitisyonnelman *SBFA* e katriyenm ti pou devlop e enstal en *Information Management System* pou

SEnPA e *SBFA*, savedir en sistenm nimerik.

Senkyenm konponan Mr Speaker to vize, ti larzan depanse pou kordinasyon proze. Dapre lenformasyon resevwar proze ti'n sipoze terminen an Zen 2020.

Dezyenm fasilite resevwar atraver *AFDB*, i en fasilite ki son program i en pti pe parey sa enn premye ki mon'n nonmen an term finansman, kot Gouvernman i kontribye anviron \$200mil e nou resevwar en *Grant* anviron \$800mil e Lagreman pou sa enn ti finalize an Mars 2020.

Lobzektif zeneral sa enn proze, se pour siport zefor Gouvernman pou diversifye lekonomi atraver devlopman Lekonomi Ble, avek lanfaz pou devlop sekter biyo teknolozi lamarin e kre loportinite biznes travay par anmenn linovasyon dan sa sekter.

Sa don ki Gouvernman in gannyen, i atraver Departman Lekonomi Ble e i vize pou finans sipor teknik pou bann mwayen e pti lantrepriz dan sa sekter. Pou osi ranforsi kapasite bann lenstitisyon piblik e biznes prive; ogmant lenformasyon lo loportinite biznes atraver en platform lenformasyon e ofer formasyon teknik e finansyel pou bann mwayen e pti lantrepriz.

Sa proze i ekspekte konplete pandan en peryod 36mwan e parey mon nonmen pou en valer total \$1milyon. Mersi Mr Speaker.

MR SPEAKER

Mersi Minis. E siplemanter Onorab Adelaide.

HON FRANCOIS ADELAIDE

Mersi Mr Speaker. Minis mersi pou ou larepons byen detaye. Petet lo sa premye donasyon nou ti gannyen, mon oule demann ou kantite larzan ki petet si ou annan lenformasyon ki kantite larzan in ganny depanse pou sa premye?

An menm tan pou sa dezyenm osi, ki kantite zot in depanse la? E eski

tou sa bann kriter ouswa sa bann rekomandasyon, par egzanp ou pe dir pour annan sa sistenm elektronik pou tou bann dimoun kapab petet akse sa bann servi lo la, eski tousala in fini met an plas?

Aprè ler mon ti pe gete ti ana sa zafer pou ankouraz bann madanm pou petet antre dan lantreprenarya, eski nou lo bon semen? E eski nou pe fer sir ki nou kapab tir en bon groser kopo lo sa *Grant* kantmenm i pa fini be solman pou benefis bann Seselwa? Mersi.

MR SPEAKER

Mersi Onorab. Minis.

MINISTER DEVIKA VIDOT

Mersi Mr Speaker. Mersi Onorab pou ou bann kestyon. Pou premye konponan en sonm \$119mil,521 ti ganny depanse savedir en ekivalan apepre 1.7milyon. Pour dezyenm konponan ranforsi kapasite enstitisyonnel, en sonm \$108mil,122.

Trwazyenm konponan ankor pou ranforsi kapasite *SBFA* en sonm \$60mil 411 e katriyenm konponan sa konponan kot ti annan *management information system* ki ti ganny prepare e donnen avek Gouvernman sa ti ganny fer a en sonm \$148mil 352.

E senkyenm konponan ti vize a kordinasyon proze e li en sonm \$106mil 488 to ganny depanse. E sa bann *figures* mon'n resevwar atraver *audited financial statements*.

An sa ki konsern bann rekomandasyon ki ti ganny fer resorti e eski in ganny enplimante?

Onorab annefe i fer en pe letan la e mon pe rod en pe lenformasyon an sa ki konsern sa proze, e ki bann konponan ki'n ganny, ki bann konponan ki'n fini ganny enplimante ki bann rekomandasyon ki'n ganny tire atraver sa proze, ki'n ganny enplimante. I ankor pa vreman kler, me selman an sa ki konsern par egzanp, ou'n fer referans avek sa *MIS system*, sa sistenm

nimerik ki *SEnPA* e *SBFA* ti'n sipoze gannyen ki nou ti ganny \$148mil 352 savedir ekivalan \$2.1milyon *Seychelles Rupees (sorry)* R2.1milyon Sesel. Sa de sistenm zot in ganny fer, zot in ganny prezante me selman i pa'n zanmen ganny servi.

So sa morso ki la mon kapab donn ou konfirmasyon lo la. Pou leres keksoz leres konponan, sa stratezi sa dokiman stratezi, sa osi mon pa ankor ganny sans vwar li. Mon'n ganny lenformasyon ki i annan serten letid ki ti ganny fer - parey mon'n nonmen an premye dan premye konponan, *component one* ki ti annan *Industrial Estates Management*.

Mon ganny en konpran poudir ti annan en analiz - en *situation analyst* eski ki ti ganny fer e serten rekomandasyon ki ti ganny fer. An sa ki konsern *Licenses Act* ti annan revu ki ti ganny fer e i annan konponan kot ti annan rekomandasyon pou entrodwir en *hybrid system*.

Pou sa enn la, mon sezi poudir sa i an en rekomandasyon ki'n finalman ganny enplimante, e mon okouran parske i ti pas devan *Cabinet of Ministers* pli boner.

So sa i en pti pe sityasyon sa proze. E mon ankor pe sey mon mye pou mwan ganny plis lenformasyon lo la, me parey mon dir keksoz ki mon kapab konfirman i an sa ki konsern sa sistenm nimerik.

E mon en pti pe sagren - en pti pe dezapwente parske i bokou larzan ki'n ganny donnen pou nou kapab met anver en sistenm nimerik, ki ti pou vreman ede avek parey mon ti fer resorti pli boner letan mon ti isi dan dernyen *sitting*, kot i ti pou fasilite nou ganny en bon *database* ki nou pou kapab vwar ki kantite konponan *MSMEs* i annan dan Sesel. E zisteman swivre zot bann progre, me malerezman sa pa'n ganny fer. Mersi.

MR SPEAKER

Mersi Minis. Nou aprezan pran Onorab Esparon ou siplamanter?

HON REGINA ESPARON

Mersi Mr Speaker. Bonn apre midi tou dimoun a lekout. Minis vi ki en konponan sa sipor dan sa *Grant* sete pou *train* zenn e met lanfaz lo bann madanm dan sekter *marine biotechnology*, parey ou'n fek fer resorti dan ou larepons.

Eski Gouvernman i annan plan pou met bann fasilite finansye a zot dispozisyon, pou kapab ankouraz e fasilite sa bann zenn madanm ki'n ganny *train*, pou ganny akse ek finans pou kapab devlop zot biznes sirtou pou bann madanm dan sekter maritim? Akoz par pratik sa normalman i asosye avek bann zonn? Mersi.

MR SPEAKER

Mersi. Minis.

MINISTER DEVIKA VIDOT

Mersi Mr Speaker. Mr Speaker mon zis anvi fer en klarifikasyon an sa ki konsern ki sa bann proze pou Lasanble Nasyonal e manm piblik konpran byen. Nou pe koz 2 proze separe. E sa enn premye ki vize ant sa keston ki Onorab Adelaide in demande sa ti en premye proze ki ti apel *MSME Development Project*. Sa enn dezyenm ki Onorab Esparon pe demann mwan lo la, sa i sa *marine biotechnology project*.

E wi, zis pou konfirman Onorab wi i annan serten eleman kot nou pou konsantre byen lo madanm, *train* madanm, ansanm dan sa domenn. Annefe sa proze parey mon'n fer resorti Lagreman in ganny sinyen an Mars 2020, me selman pou serten rezon pli tar, mon'n ganny lenformasyon ki proze in ganny retarde. E alor si ou mazin byen nou, nou ti'n vin dan lofis Novanm 2020.

E letan nou ti vini, se la soz ti pe komans deroule. I annan serten konponan ki ankor dan faz swa i ankor

dan semen pe rode konsiltan pou fer vin fer lenplimantasyon, konponan ki nou'n kapab bouze avek la an se moman se sa konponan *business technology incubator* - *business incubator*.

E sa mon kapab konfirman poudir konsiltan in fini ganny angaze. Konsiltan in fini vin fer vizit Sesel, nou pe fer konsiltasyon. Annefe in fini retourn dan son pei la, me selman i pou annan serten peryod ankor ki i pou bezwen redesann pou li kontinyen fer konsiltasyon. E sa konponan i viz ver etabli en lankadremman pour bann biznes - swa bann *startups* ki zot anvi antre dan sa sekter, pou zot ganny sa formasyon pou zot ganny gidans atraver en programm byen balanse.

E la mon zis anvi fer resorti e fer relevans avek sa *Capital Grants Scheme* ki Gouvernman in remet a dispozisyon sa lannen, e an se moman i ouver. E nou pe marye sa de keksoz ansanm.

So nou pe servi sa *Grant* ki nou'n gannyen;- savedir fasilite anba sa *Grant* e nou pe marye li avek programm ki Gouvernman in etabli li osi, pou nou kapab ganny sa ki nou apel *synergy* - kre sa *synergy* ant sa 2 programm. Savedir dimoun ki ganny sa finansman i kapab pas atraver sa formasyon, pou fer sir poudir sa nide inovatif - ki swa en madanm.

Byensir nou pe met bokou lanfaz lo madanm - me ki en madanm ouswa en msye, en zenn ki antite dan sa programm, ki pou fer ki pou son nide biznes ki i vin avek, i al plis ki zis en nide;- ki i ganny sa finansman i ganny sa sipor osi - sa *mentorship* ki son nide i aktyelman vin en biznes profitab dan le fitir. Mersi.

MR SPEAKER

Mersi Minis. Kestyon Onorab Rosie Bistoquet.

HON ROSIE BISTOQUET

Mersi Mr Speaker. Bonn apre midi Minis avek ou delegasyon. Bonn apre midi tou

bann Onorab. Minis anba sa dezyenm *Grant* la ki pou *Blue Economy*, i annan dan sa proze ki sipoze siport bann sekter piblik ek operater prive. Petet Minis si ou kapab dir nou konbyen sekter prive avek operater sekter piblik ek operater prive, ki'n ganny ranforsi anba sa *Grant*?

Apre ki lezot partener apard ki *African Bank* ki lezot pei ki kontribiter dan sa - ki'n aktivman siport sa fon, e ki zot kontribisyon? Mersi.

MR SPEAKER

Mersi. Minis.

MINISTER DEVIKA VIDOT

Mersi Mr Speaker. Mersi Onorab pou ou kestyon. Parey mon'n fer resorti sa en dezyenm proze i fek pe ganny met annan enplimantasyon. Alor la kantite *figure* egzakt mon pou napa an se moman, akoz i ankor annan bann negosyasyon ensidswit, ki nou ankor pe fer pou met programm an mars.

An sa ki konsern bann lezot partener - an se moman la i zis sa *African Development Bank* ki pe donn sa finansman. Mon ti pe fer resorti dan mon dernyen larepons avek Onorab Esparon, kot mon'n fer referans avek sa *incubator* - sa *business incubator*.

E en konponan dan sa proze se ki sa konponan i sipoze ed bann dimoun ki pe komans zot biznes, pou zot kapab fer resers e devlopman e byensir ganny sa bann gidans.

Me defayans ki mon'n vwar personnelman letan administrativ oparavan e byensir ti oparavan ti pe negosye pou ganny sa proze, se ki zot pa'n enkorpor en konponan teknik ladan, kot bann dimoun ki pe al dan sa laliny biznes, zot ganny sa loportinite pou zot fer *research and development*. Savedir annan fasilite avek bann lab, avek bann lekipman, ki zot kapab vremen teste zot bann prodwi ki zot vin avek.

Mon a donn ou en legzanp dizon en dimoun in vwar serten *species* anba

lanmer ok, serten lespe ki in kapab servi pou fer swa en kek latizann, ouswa ou konnen swa i kapab en lespe gomon par egzant, kot i annan *properties* ki'n kapab devlop swa en keksoz pou fer avek *makeup* ouswa pou fer latizann. E i enportan ki sa dimoun i ganny en akse avek en lab, avek fasilite pou li kapab fer bann *runs*, fer resers pou li kapab fer en prodwi ki bon kalite. E se sa ki manke dan sa program.

So letan mon'n vini mon osi mon'n vin erit en program ki'n fini ganny travay lo la ankor, e mon pe swiv sa lenplimantasyon. E la mon'n vwar sa bann defayans. Ki mwan mon'n fer lo mon kote se ki mon pe angaze avek profite letan mon ganny bann moman pou fer bann langazman avek bann lorganizasyon, tel ki parey *World Bank* ki fek vin dan pei, pa tro lontan.

E mon pe vwar ki mannyer zot, zot pou kapab ed nou pou agrandi petet parey kot *SBS* zot *already* annan lab. Savedir i annan debaz, me kwa ki zot kapab finans nou pou nou kapab agrandi sa fasilite, ki ava donn loportinite sa bann dimoun ki dan biznes, pou zot ganny akse avek fasilite lab pou zot fer resers e devlopman.

Pour ki letan zot fer zot prodwi i ava en prodwi ki lo standar;- ki ava en prodwi ki annan kalite. E i ava en prodwir ki zot ava met lo marse e pour kwa pa prodwi ki zot kapab eksporte? Mersi.

MR SPEAKER

Mersi Minis. Bon nou bezwen bouz lo prosen kestyon. E limero 144 Onorab Kelly Samynadin.

HON KELLY SAMYNADIN

Mersi Mr Speaker. Bonn apre midi Minis avek ou delegasyon. Minis mon kestyon i lir koumsa;

An vi ki dan Bidze 2022 i annan en alokasyon R42milyon ki'n ganny bidzete anver *Industrial Estate Authority*, eski Minis i kapab dir sa Lasanble,

premyerman lekel bann proze primordyal anba sa Bidze, e ki sityasyon sa bann proze?

E dezyenman, kan ki proze *One District One Project* pour demare dan distrik Au Cap? E eski i annan okenn kontrent ki zot pe rankontre dan sa demars?

MR SPEAKER

Mersi Onorab. Minis, repons.

MINISTER DEVIKA VIDOT

Mersi Mr Speaker. Mersi Onorab pou ou kestyon. Onorab Bidze ki *Industrial Estates Authority* ti gannyen a en total environ 42milyon ti konpri alokasyon pou proze *zone 19 - zone 20* kot nou ti'n resevwar environ 10.2milyon. Fasilite *parking* nou Providence pou fer drenaz serten landrwa pou fer louvraz *survey*, travay pou fer semen *zone 6* Providence e travay lenfrastruktir lo *Eve Island*.

E ti annan en konponan osi ki ti'n ganny mete dan Bidze, ki fer li ariv en total environ 42milyon e sa ti relye avek *industrial park*, me sa ti pou ganny donner atraver en *loan* ouswa en *Grant facility*.

Bon, parmi sa bann proze i annan 3 kib primordyal ki nou'n met bokou lanfaz lo la, an se moman, sa se *zone 19, zone 20 Infrastructure Project*. Sa proze i konpri fer semen servis litilite e sa proze i deza an mars. Ti annan en reportaz lo *SBC* pli boner sa lannen, kot piblik in kapab vwar, e byensir bann dimoun i pe pase zot vwar ki progre ki pe pase lo sa morso semen.

E an plis ki sa byen semen nou vwar fizikman ki pe ganny fer pou *exit* sorti Providence pou ariv lo *highway*, me i annan osi akse avek litilite sa osi i son gro konponan dan sa proze, ki malgre nou pa pe vwar avek lizye, me fer pase bann kab ensidswit sa i en konponan sa proze.

E dezyenm proze ki nou pe ki primordyal pou nou se *zone 6*, kot ankor nou pe anvizaze fer semen e drenaz dan

Providence. Mon fer resorti ki sa proze in enn ki lontan in lo *shelf* e nou'n kapab finalman met li an Mars, *tender* in fini ganny pibliye. E an se moman la, nou pe swiv prosedir bann lezot prosedir ki *tender* i ganny demande ;- savedir seleksyon kontrakter evalyasyon e tousala.

Trwazyenm proze, i proze *Eve Island* kot ankor semen en proze kot semen ek drenaz premye faz i pe ganny fer e sa i ankor an mars.

An sa ki konsern *One District One Project*, pou rezon konsern bidzeter proze *One District One Project* i pa ankor zanmen ganny finanse anba Bidze Gouvernman *unfortunately*, alors nou'n bezwen anliny avek demars pou nou al ver *PPP* pou finans sa bann proze.

E nou'n ganny retar pou fer sa proze an vi labsans en Lezisasyon formel ki pou govern sa bann tel proze. Me tou dernyerman nou'n decide ki nou pa pou kapab, nou pou bezwen kontinyen bouze e atraver bann diskisyon ki *IEA* in gannyen avek Minister Finans nou'n kapab travay lo bann model *PPP*. Avek byensir ki anliny avek zot bann Polisi.

E an vi kontrent, nou'n agree ki nou pou travay lo 2 proze *pilot* pou komanse ;- savedir dan 2 distrik e Au Cap e Perseverance nou swazir enn dan sid e enn dan Nor. Nou pou demar avek 2 proze. E zisteman nou bezwen pou nou kapab finaliz bann dokimantasyon fer sir poudir taso i an plas. I annan bann *survey works* ki'n ganny fer.

Pou distrik Perseverance sa in fini ganny fer e an se moman i kot *Planning* pou fer anrezistre. E Au Cap nou pa ankor komans sa travay.

Byensir an menm tan nou travay lo bann dokimantasyon ki bezwen al kot *P.O.U.*, pou fer sir ki letan nou fer piblikasyon tou keksoz on i anliny i annord. E nou *time frame* ki nou'n mete se avan lannen fini nou pou'n kapab pibliy sa '*Expression of interest.*' Mersi.

MR SPEAKER

Mersi Minis. Ou siplemanter Onorab Samynadin.

HON KELLY SAMYNADIN

Mersi Mr Speaker. Minis apre en vizit ki Prezidan ti fer tar lannen pase dan *Zone* Endistriyel Providence, ti annan bann diferan *challenges* ki ti ganny met devan pou lakoz retar bann proze lenfrastruktir tel ki bann issues *encroachment*, *legal dumping*, kot serten later pa ankor ganny devlope, ensi ki bann konsern am a k konsern bann Lagreman *lease*.

Swivan sa, eski nou kapab ganny en kontrandi lo bann travay ki'n ganny fer pou remet sa bann konsern? E dezyenmman anliny avek sa *pilot project* ki ou'n fek mansyonnen, malgre defayans an sa ki konsern Lezisasyon *PPP*, eski in annan okenn lenvestiser ki prezant zot lentere anver proze *One District One Project* dan distrik Au Cap, e i wi konbyen ki'n vin devan e dan ki fason ki zot pe mazin envestir? Mersi.

MR SPEAKER

Mersi Onorab. Minis.

MINISTER DEVIKA VIDOT

Mersi Mr Speaker. Mersi Onorab pou ou bann kestyon. Bon, letan Prezidan ti fer vizit e i ti annan bokou bann kontrent ki nou ti met devan li e ki i ti enportan ki i ti vi fer sa vizit pou li vwar vremen kwa ki nou pe fer fas avek. E i ti dekrir ki menm pandan vizit ki Providence ti dan en leta ondire ki pa'n ganny sa lentansyon ki i ti'n merite okour tou sa bann lannen.

E mon kontan pou dir ki avek sipor ki nou'n gannyen, e byensir lo mon kote e sipor tim ki mon'n gannyen kot *IEA*, problemn an sa ki konsern enfrastruktir sa i en keksoz ki nou pe fini bouze avek.

Letan Prezidan ti pe fer son vizit si mon pe tronpe sa proze ki ti annan sa bout proze *zone 19*, *zone 20* bann *infrastructure project* ki ti'n ganny met

on-hold, akoz ti annan bann kontansyon avek bann kontrakter e sa in fini ganny rezourd, nou'n kapab re pibliy *tender*, nou'n ganny kontrakter i pe dele son travay.

E si tou keksoz i al byen, avan lannen i fini i pou'n fini. Lo kote *illegal dumping*, sa osi i en keksoz ki *IEA* i pran o serye. I annan serten notis ki zot in fer piblikasyon, zot in pibliye pou averti annan *tenants* egzakteman ki mannyer zot pou azir anver zot later.

E i annan fasilite ki *IEA* in met a zot sipozisyon osi. Nou'n war kot i annan bann *containers* ki zis ganny plase ki kas bann *pavement* ensidswit. Sa osi nou'n al lo medya, nou'n eksplike, nou'n fer sorti notis parske a lafen dizour nou pou bezwen retourn kot Gouvernman ankor, pou nou kapab re rod finansman pou nou kapab refer sa bann proze ki met ankor bokou retar. So i annan en kantite bann *improvements* ki nou'n kapab fer.

An sa ki konsern bann *encroachment*, bann dimoun ki zis in vini i met zot bann keksoz lo later, e later ki pa pou zot, ouswa li osi i annan bokou lenstans kot bann taso i ganny retire, sa i en keksoz ki tou lazournen nou pou bezwen dil avek.

So nou'n *apply* pou dan Bidze ki pe vini, pou nou pa'n ganny finansman pou nou ganny en dimoun ki kapab fer *survey*, ouswa akse avek finansman pou nou kapab kontinyelman fer *survey* pour ki i a tou moman *IEA* i konnen poudir, dizon tel *parcel number* la i la son 4 taso e sa i son bout later.

Parske pa bliye letan en dimoun i ganny son *Lease Agreement*, i ganny li son *square meter* ki ekrir lo son *Lease Agreement* e i pey son *rent in accordance* to sa met kare ki in ganny donnen ki'n ekrir lo son *Lease Agreement*.

E letan i bouz taso, letan i agrandi, letan i pran plis lespas ki i sipoze, i vadir ki i pa pe pey Gouvernman sa ki i sipoze peye. So sa osi i en keksoz ki nou'n fer sir nou pe fer nou mye pou

nou kapab adrese. An sa ki konsern Au Cap, malerezman proze pou Au Cap nou pa ankor resevwar en proze *from* bann dimoun.

Dimoun wi letan zot konnen i annan sa bout lespas, zot eksprim lentere me selman verbalman, e napa proze ki'n aktyelman ganny soumet avek lofis. Mersi.

MR SPEAKER

Nou a pran siplemanter Onorab Aglae.

HON EGBERT AGLAE

Mersi Mr Speaker. Bonn apre midi Minis, *CEO* e lot. Minis lo kote size *One District One Project*, mon ti a kontan petet demann ou eklersi Lasanble, premyerman ki bann kriter ki zot pou servi, ler Finans i permet pou kapab *at least* bann distrik petet ki annan priyorite i kapab ganny gete? Akoz mon tan ou nonm Au Cap ek Perseverance petet ki kriter ki ou pou servi?

Dezyenm Minis i konsern larzan ki'n ganny Bidze ou'n nonmen sirtou Providence, Minis eski zot pe mazin osi pou konsider bann lezot semen dan Providence, ki annan ki depi lontan i annan sa bann servis ki sirtou *workshops*, sirtou kot i aranz bato.

E de fwa mon al laba dan rezyon ler ou kit kot *PUC sewage treatment*, mon bezwen kit loto al apye ou pa pou kapab ale dan ou transpor latab. Akoz si lapli in tonbe, ou pou pas dan en labou ou pou regret ou transpor, eski sa osi i kapab ganny konsidere dan zot proze, vi ki i annan en proze e lanmenm la obor semen ki zot pe fer? Mersi.

MR SPEAKER

Mersi Onorab. Minis, osi bref ki ou kapab silvouple.

MINISTER DEVIKA VIDOT

Mersi Mr Speaker. Mersi Onorab pou ou kestyon. An sa ki konsern kriter, Onorab parey mon'n fer resorti nou pe travay avek Minister Finans pou regarde

egzakteman ki bann kriter ki nou pou etabli pou fer sa '*Expression of interest* e tan ki nou pa ganny *green light* avek *POU*, ensidwit nou pa vreman kapab fer deklarasyon lo sa bann kriter.

Me rezon ki nou'n komans, nou'n *pilot* pou sa 2 distrik Au Cap ek Perseverance, set akoz zot ti zot later mannyer mon pe ganny an konpran ti'n pare en pe pli annord, pli fasil, pli fasil. So nou'n deside al avek sa de. Me selman pa *worry*, *once* ki nou'n kapab ganny byen nou lipye lo sa 2 *then*, nou pou kapab lans avek tou leres.

An sa ki konsern Providence sa semen ki ou pe mansyonn lo la, sa i form parti a proze *zone 19*, *zone 20* ki pe an se moman travay lo la. Saverdir i pou ganny kouver dan sa morso proze. Petet i ava annan zis en pri morso ki al ver kot *UCPS* in konble, *UCPS* kot Morin e nou pe fer provizyon pou nou kapab kontinyen sa. Mersi.

MR SPEAKER

Mersi. Mon pou bouz lo bann kestyon ki reste. Mon annan 2 kestyon ki lo menm size apepre lo Zil Eve. Mon pe mazinen ki zot riske mars lo kanmarad. Alor mon pou pran sa 2 kestyon mon pou pran repons Minis ansanm.

Onorab Gill i a poz son kestyon Onorab Woodcock i apoz son kestyon Minis i a reponn mannyer in prepare pou reponn tou lede e apre nou a kapab *save* lo kestyon siplemanter. Mersi. Onorab Gill ou kestyon.

HON CHURCHILL GILL

Mersi Mr Speaker. Bonn apre midi Minis avek ou delegasyon. Kestyon i lir koumsa;

Pou Benefis bann dimounn ki pe esper *tender* lo zil Eve, eski Minis i kapab donn detay sa Lasanble lo ki kalite lenfrastriktir ki pe ganny fer lo Zil Eve, avan ki sa bann kare later i ganny met lo *tender*? E kan ki sa bann travay i espekte konplete? Mersi.

MR SPEAKER

Mersi Onorab Gill. Onorab Woodcock poz ou kestyon silvouple.

HON WAVEL WOODCOCK

Mersi Mr Speaker. Minis mon kestyon i *comme* swivan;

Eski Minis i kapab enform Lasanble: Kan ki alokasyon later pou ganny fer Ile Eve e ki zistans son Minister in arive pou rebran bann later Ile Eve, ki'n ganny *lease* pou plizyer lannen, me ki pa'n ganny devlope? Mersi.

MR SPEAKER

Mersi. Minis ou larepons.

MINISTER DEVIKA VIDOT

Mersi Mr Speaker. Mersi tou le de Manm Onorab pou zot kestyon. Mon a komans premye avek donn detay lo kalite lenfrastriktir ki pe ganny fer lo Zil Eve, e en pti pe lo bilan, lo ki mannyer progre.

Bon prensipalman lenfrastriktir ki pe ganny fer, i par rapor avek semen e drenaz lo sa zil. E i enportan poi mon fer resorti a sa pwen, ki in annan bokou travay ki'n deza konplete menm ki pa vizyel me mon ava zis eksplike.

Premyerman nou'n bezwen fer *re design* e *redesign* plan semen pou Zil Eve, e mon'n eksplike oparavan aköz. Sa i aköz plan servi litilite pa ti'n ganny konsevwar pou sa zil. E nou'n osi profite pou aranz serten konponan lo plan semen, kot in ed nou sov en pe kou, kot ti annan landrwa kot en bout later ti pe ganny deservi par plis ki en semen, so mon kapab fer reasiran plan e fer pla en e pli pratik.

So en rezilta tousala nou'n bezwen re organiz plan travay avek kontrakter. Sa osi ti annan negosyasyon nou ti'n bezwen re antreprann avek kontrakter. E byensir aköz plan litilite pa ti dan Bidze i pa ti'n ganny bidzete, alor nou'n bezwen rod en fason fer demars ki mannyer nou kapab ganny finansman, pou nou kapab fer sa travay.

E nou'n kapab solisit sipor avek *PUC* e zot ti ed nou pou apwent en konsiltan pou destin plan servis litilite.

E an se moman progre ki'n ganny fer lo Zil Eve li menm, ki vizyel se semen ki'n ganny prepare, in ganny *level* i annan anviron apepre en 700met semen e i annan son drenaz ki al avek. So sa in fini ganny fer. Bon travay ki an se moman i an progre e kan i pou konplete?

Parey mon'n eksplike, nou'n bezwen rod konsiltan pou fer *design* pou lenfrastruktir e sa i an se moman pe ganny fer. Nou'n resevwar en premye plan preliminar pou sa bann *design* me sa i bezwen ganny finalize.

Dapre Kontra orizinal nou ti'n sipoze ganny plan an Septanm, me selman nou'n bezwen met en pe retar lo la. Rezon pou sa se zis aköz lo kote Zil Eve i annan sa proze Kato Nwanr ki li osi i pe ganny konsevwar e letan planifikasyon pe ganny fer bann Lazans tel parey *PUC* e *SIYA - Seychelles Infrastructure Agency*, in fer resorti ki i pli meter i nou kapab entegre sa bann servis pou tou le de zil.

E alor nou'n dakor ki nou ava fer li, parske nou vwar benefis ki sa de gran proze pou anmennen. E letan nou pou entegre sa bann servis i ava pli bon e pli *cost effective* pou nou e se pour sa rezon ki nou'n bezwen met en pe retar lo sa *design*. E nou'n ganny konfirmasyon avek konsiltan ki sa travay, i pou kapab fini fer avan i pou konplete avan lannen i fini.

E an rezilta byensir travay *design*, nou'n vwar ki nou pou bezwen rod e fer bann *easement* lo serten bann morso later. E savedir fer provizyon pou agrandi semen dan serten landrwa, pou nou kapab ganny bann koridor pou nou kapab fer pase sa bann lenfrastruktir.

E an rezilta sa nou'n bezwen refer travay *survey* ankor, parske parey ou okouran Onorab, i esansyel ki tou taso i vizib pour ki letan i annan bann vizit ki ganny fer avek bann dimoun, bann aplikan ki'n *successful*, zot kapab vwar

demarkasyon zot later, vwar zot bann taso. E alors sa ti travay ki pe ganny fer.

E an se moman kontrakter i pa pe aret, i pe kontiny travay. I annan ankor morso preparasyon semen e *levelling* ki bezwen ganny fer, e i pe fer sa. I annan anviron en 1000ekek met semen e drenaz ki bezwen ganny fer.

Me parey ou pou konstata nou pa pou kapab *proceed* avek met koltar tan ki *design* servis litilite i pare. Sa i aköz nou bezwen konnen si i pou annan landrwa kot bann servis litilite pou pas atraver semen.

E si sa i arive, alor si nou met koltar nou pou bezwen klase pou remete, so nou pe *avoid* sa. E se pour sa rezon ki i enportan ki nou espere ki sa travay i fini ganny fer. Bon nou eksepte ki parey mon dir travay i konplete ver lafen sa lannen.

Me selman an sa ki konsern *tender* pou nou kapab met bann later lo *tender* pou larepons ki kestyon Onorab Woodcock in demande, nou anvi fer li pandan mwan Oktob. Aköz nou konstata poudir i pou annan dele letan ki letan nou fer lavertisman, i annan seleksyon ki pou ganny fer.

E alor nou anvi fer li an *parallel* ki *by the time* bann premye faz travay in fini *by* lafen lannen, nou osi nou'n fini pare avek nou bann seleksyon pou nou bann aplikan.

Ou'n demann kestyon Onorab Woodcock, an sa ki konsern bann later, bann *lease*, bann later ki pa'n ganny devlope e ki aksyon ki nou'n fer ki nou'n pran?

Bon ti annan 74 bout later ki ti'n ganny anrezistre, ki ti'n ganny donnen e ladan ti annan 30 morso later ki pa ti ankor ganny devlope. E *IEA* in anvoy zot tou *notice of breach* savedir le neserer in ganny fer pou nou kapab pran serten lepa pou nou reganny sa bann later.

E dan sa 30 i annan 9 ki'n ganny laprouvasyon pou zot devlop zot later anba bann kondisyon ki strik;- savedir zot in deside pou zot retourn kot nou e

demann nou en *extension*. E ladan i annan 2 ki'n dakor pou zot rann later, akoz zot pa enterese pou zot kontinyen. I annan 18 ki nou pe kontinyen swiv nou prosedir pou nou kennsel e i annan enn ladan ki *lease* in fini kennsel. Mersi.

MR SPEAKER

Nou a pran kestyon siplemanter, bann loter kestyon premye. Onorab Gill.

HON CHURCHILL GILL

Mersi Mr Speaker. Mersi Minis pou ou detay. Minis pou sa travay lenfrastruktir ki ou'n koz lo la, eski sa travay i pou selman bann *plot* later ki pa ankor *allocate* ki pou al *allocate* oubyen i pou Zil Eve antye enkli bann later ki deza anan bann dimou ki pe *occupy* sa bann later?

Rezon ki mon demann sa akoz le letan lapliZ il Eve antye i inonde e se sa ki mon pe gete si dan sa devlopman ki apre nou bezwen refer desen i pe anmas Zil Eve antye?

Apre dezyenman si anka i pa pe anmas Zil Eve antye, eski zot in annan konversasyon ek tou bann dimoun ki pa tonm dan sa kategori ki pe al dan *tender* pou sa bann dimoun kapab fer en travay laba, pour ki ler bann *plot* in fini donner e bann keksoz i *up and running*, nou pa vwar sa bann kantite *flood* ki ler en dimoun i ava al servi sa bann servis zot pou bezwen war zot pe pas ladan? Mersi.

MR SPEAKER

Mersi Onorab. Minis.

MINISTER DEVIKA VIDOT

Mersi Mr Speaker. Mersi Onorab pou ou bann kestyon. Bon pou klarifye i annan sa morso zil lo kote Norwa - savedir ki ou pran dizon si ou pe al pas akote *SEYPEC* ensidswit antye la. So i annan later la ki'n fini deza ganny *allocate*. Savedir pou reponn ou kestyon sa travay i pou osi benefisyè bann dimoun ki'n deza annan later. Savedir

nou pe fer sa *store water drain* apre zot pou ganny zot semen.

E i annan lezot morso lo Zil Eve ki pli en pe pli lo sid ki vir en pti pe pli avek lo kote ou konnen lo lot kote zil, e sa li i pou lo en dezyenm faz. Me selman nou, nou'n pran konsiderasyon i lo en dezyenm faz.

Akse avek bann servis litilite, ki bann bout later i annan la an se moman ki pe fonksyonnen? Nou kapab dir sa i bann akse tanporer. Parske lo en zil endistriyel, ou bezwen fer sir poudir bann tiyo, bann kab elektrisite i pe pas byen dan bann koridor ki ganny byen proteze ensidswit.

So sa osi i annan en lot fas ki nou pou al ladan. E nou'n fer le neserer ek Finans e ki letan Bidze i ava vin devan zot lafen sa lannen la, nou pou vwar egzaktaman kwa ki nou'n met dan Bidze e i pou pli kler pou ou. Me selman nou'n pran tou konsiderasyon. Wi mersi.

MR SPEAKER

Mersi. Onorab Woodcock ou siplemanter.

HON WAVEL WOODCOCK

Minis mon apresye sa lord ki ou Minister e *IEA* pe mete dan sa dezord ki ti annan Zil Eve. Mon premye kestyon i ti annan sa *issue encroachment* lo Zil Eve, si ou ti kapab donn nou en pe detay lo si zot in kapab rezourd sa bann *issue encroachment*? Apre si ou pou kapab donn nou detay lo konbyen later apepre ki pou al ganny *allocate* an Oktob?

E finalman i annan en bon groser later ki en lakonpanyen konstriksyon ti pe - ti'n gannyen pou fer proze lo Praslin, me zot ankor pe tenir sa later ki en pti pe plis ki 5mil met kare. Mon krwar mon'n aprann poudir i pli gran ki sa, ki zistans zot pe ale sa lakonpanyen son proze in fini, me sa later i ankor la.

Ki zistans zot in arive pou rebran sa bann later, pou zot kapab *subdivide* e fer alokasyon avek bann biznes ki annan lo Praslin? Mersi.

MR SPEAKER

Mersi. Minis.

MINISTER DEVIKA VIDOT

Mersi Mr Speaker. Mersi Onorab pou ou bann kestyon. I annan bann *encroachment* wi, ti annan bokou ban *issues*. E *IEA* in fer le nesese pou kapab dil avek sa bann *encroachment*, pou fer sir poudir nou kapab fer provizyon pou semen e fer provizyon pou fer bann koridor pou bann servis pas ladan.

Me selman Onorab i annan ankor en gro travay ki nou bezwen fer an sa ki konsern refer *survey*, fer sir poudir tou taso i an plas. Sa i aköz letan travay ti pe ganny fer, i annan serten taso ki'n sorti ki'n ganny *relocate*, i annan ki'n perdi net.

So a tou pri nou bezwen vwar ki nou bezwen re al fer sa bann *survey*, e se sa ki met retar bokou fwa. La par egzanp pou bann later kapab al lo *tender*, i esansyel ki sa bann travay in fini ganny fer pou nou kapab. Me selman nou pe pouse ki nou pe fer en *gamble* kot nou ava sey met lo *tender*, pour ki letan bann seleksyon, bann prosedir seleksyon i fini ganny fer, e tou travay *survey* in kapab ganny fer an menm moman. Me selman nou pe pouse.

E nou'n fini fer demars ki sa bann travay i komanse. So nou krwar nou lo target pou nou kapab arive fer sa. Letan tou demars i fini, tou travay in fini ganny fer, nou ekspekte ki i annan anviron en 45 morso later ki nou kapab met lo *tender*.

E an sa ki konsern sa morso later ki sa lakonpanyen konstriksiyon ki ti pe *occupied*, sa *size*, sa *case* i kot Biro *Attorney Zeneral*. Annefe Gouvernman in fini annan en plan demarke pou sa landrwa e alor nou pou komans avek nou plan osito posib. Mersi.

MR SPEAKER

Mersi. Bon mon pe *plan* pou termin sa 3er. Mon annan 2 manm ki'n lev lanmen pou siplemanter annou fer bann kestyon bref. Vit silvouple. Onorab Loizeau.

HON NORBERT LOIZEAU

Ok. Mersi Mr Speaker. Bonzour Minis ek ou delegasyon. Vitman Mr Speaker, mon anvi demann Minis, vi ki toultan mon'n koz lo dezord ki annan lo bann landrwa parey Providence, eski Minis i kapab dir mwan si lo Ile Eve, pou annan bann demarkasyon kote bann kategori biznes pou ganny mete, ouswa i pou en dezord total kot sakenn pou fini ganny son later pou vini pou fer nenport ki, nenport kwa kot in ganny son later?

E dezyenmman Mr Speaker, mon anvi demann Minis dan en vizit ki nou ti fer avek *COGA* lo Ile Eve, nou ti ganny dir ki pou annan en *overhead bridge* ki pou konekte Ile Eve avek devan kot Ladministrasyon Distrik.

Sa pou ede an ka en *emergency* Mr Speaker, pou anpese annan sa dezord parey Providence kot nou annan zis en antre kot loto i antre sorti, e la mon'n war ki Minis zot in met en pe lord dan sa dezord ki annan sa lot semen lot kote pou fer.

Eski avan sa bann alokasyon tou sa bann lenfrastruktir parey sa semen *overhead bridge* pou fini ganny fer, pour ki an ka si i annan en *emergency* i ava annan en lot landrwa sorti pou bann biznes lo Ile Eve? Mersi.

MR SPEAKER

Mersi. Minis, *yes* lord ek pon pou sorti?

MINISTER DEVIKA VIDOT

Mersi Mr Speaker. Mersi Onorab pou ou kestyon. Onorab mon kapab dir ou poudir mon krwar parmi enn bann premye keksoz ki mon ti demande pou fer refer, se *land use plan*, pou fer sir poudir Ile Eve pa vi parey Providence. Sa mon garanti ou e mon mazin dat osi egzaktaman ki mon ti fer sa miting ti le 23 Desanm 2020.

Bon avek Zil Eve travay ki'n ganny fer an se moman i fer ki, i annan demarkasyon spesifik lo bann kalite aktivite ki pou ganny antreprann lo zil. Par egzanp bann aktivite ki annan pou fer avek lamarin, sa in ganny son landrwa spesifik;- ki annan pou fer avek otomekanik, *carpentry*, *metal works*, konstriksyon e osi nou'n byen sir fer provizyon pou bann pou *land use* pou bann *processing* – bann fasilite, *manufacturing*.

Akoz Gouvernman pe met bokou lanfaz lo valer azoute, e alor nou alokasyon resours i ale anliny avek sa. So nou'n fer sir nou'n fer demarkasyon, e nou'n fer provizyon pou sa bann tel aktivite.

An sa ki konsern *bridge* ki pou fer;- an se moman i ankor annan diskisyon, diskisyon i *ongoing* lo kote egzaktman ki sa *bridge* pou ganny fer. Byensir sa i en keksoz ki in preokip nou, nou osi.

E ki nou pe fer se ki an menm tan i nou pe regard sa kalifikasyon Kato Nwanr ki mannyer sa morso later pe ganny devlope, nou osi pe regarde ki mannyer nou kapab entegre en pti pe devlopman lo Baie Ste Anne e apre fer en koneksyon pou ariv lo Zil Eve. Me tousala i ankor dan diskisyon. Mersi.

MR SPEAKER

Mersi Minis. Onorab Pillay.

HON SEBASTIEN PILLAY

Mersi Mr Speaker. Mon ti a kontan demann en klarifikasyon *regarding* Ile Eve. Ou'n mansyonn i an en konsiltan ki pe fer sa travay pou Lenfrastriktir ki pe *provide* serten dokiman, mon ti a kontan ou donn nou lenformasyon lo lekel sa konsiltan?

Prezan mon'n osi note ki dan *Mid-year Review* e dan Bidze ki pe vini i annan en alokasyon R11milyon ki pe ganny mete, e aparaman dapre Minister Finans sa larzan i sipoze al ver *IEA* pou

devlopman lenfrastriktir lo Zil Eve. Eski ou kapab konfirmen si sa i leka?

Akoz dan en miting ki nou nou'n gannyen *FPAC* ek Minister Finans, sa i lenformasyon ki nou, nou'n gannyen avek Minister Finans. Mon ti oule klarifye. E prezan eski sa pou permet ou konplet bann travay enfrastriktir ki ou annan? E prenon kont prezant en konsern in ganny souleve vizavi sirtou bann kontrakter *class 2*, sa problemn i egziste lo Mahe - mon prezimen sa bann problemn osi i egziste lo Praslin.

An sa ki konsern alokasyon teren pou sa bann kontrakter annan ranplasman, pou met zot bann materyo konstriksyon e bokou zot pe grandi, pe devlope dan nou lentansyon.

Eski dan planifikasyon ou Minister, zot pe osi prevwar pou annan serten alokasyon later, ki pou met a dispozisyon bann kontrakter *class 2* ki lo Praslin ki ava fasilite sa bann kontrakter? Mon pa oule debord lo Mahe Mr Speaker, aköz mon ti demann sa kestyon. Me si i posib pou Minis donn nou okenn lendikasyon lo Mahe osi, an sa ki konsern bann kontrakter *class 2* mon ti ava apresye. Mersi.

MR SPEAKER

Mersi Onorab. Minis?

MINISTER DEVIKA VIDOT

Mersi Mr Speaker. Mersi Onorab pou ou bann kestyon. Bon pou konfirmen konsiltan ki pe fer travay *design plan* lilitite lo *Eve Island* i *GIBBs Consultancy*.

Dezyenm kestyon ki ganny demande an sa ki konsern sa 11milyon, ou'n dir mwan 11 milyon mon krwar i ariv apepre 11.5milyon. E sa larzan in ganny mete dan *Mid-year Review* aköz premyerman sa larzan i ale avek proze *zone 19*, ek *zone 20* lenfrastriktir.

E mon fer resorti poudir sa pa ti'n ganny pran kont oparavan e in ganny met a mon latansyon tou dernyerman. E alor nou'n bezwen e i pa ti oule fer provizyon avan e nou'n bezwen al kot

Minister Finans pou fer sir ki nou kapab ganny sa finansman pou nou rod lekkipman ki pou al pou deservi *zone 29* e *zone 20*. So sa napa naryen pou fer avek Zil Eve.

An sa ki konsern alokasyon later pou bann kontrakter, wi Mr Speaker lo Zil Eve nou'n fer provizyon *land use* i annan demarkasyon pou bann kontrakter;- savedir bann *class 2* - kontrakter *class 2* pou ganny posibilite zot osi pou zot partisipe e pou zot kapab benefisyse.

An sa ki konsern lo Mahe, wi, nou ti'n *designate* en landrwa lo *zone 20 extension*, ki an se moman i napa okenn litilite i pa posib pou nou fer alokasyon desizyon, parske semen ensidswit, enfrastruktir i pa ankor pare. Mersi.

MR SPEAKER

Mersi. Mon annan 2 minit Onorab Pillay. Silvouple zis klarifikasyon.

HON SEBASTIEN PILLAY

Mersi Mr Speaker. Mr Speaker eski Minis prenon kont ki sa bann dimoun zot bann kontrakter, zot bann dimoun ki dan konstriksyon? Eski *IEA* oubyen ou Minister in konsider antre dan en laranzman oubyen en lagreman avek zot?

Ki zot menm zot, zot ante e fer bann travay ki annan pou fer? Akoz anfen kont *whatever* prodwi ki zot gannyen pou benefisyse zot, *and then* sa i ava ganny *workout* prezan lo pwennvi *lease and rent* eksetera.

Mon krwar lesansyel i ava tir sa presyon lo *IEA* pou zot fer sa e i ava met sa *onus* lo sa bann dimoun ki pou le ganny akse avek sa teren. Eski sa i en keksoz ki zot in konsidere dan zot plan? Mersi.

MR SPEAKER

Mersi. Minis.

MINISTER DEVIKA VIDOT

Mersi Mr Speaker. Mersi Onorab pou ou kestyon. Onorab wi nou'n fini fer sa refleksyon. Nou'n fer sa refleksyon en pe nenk lannen pase.

Annefe e rezilta se ki, konsey ki nou'n gannyen atraver Departman Lenfrastruktir, Lazans Lenfrastruktir se ki danze avek les sa bann kontrakter antreprann louveraz zot menm, i kapab kre dezord kot i annan bann ki pou en pe pli lwen. Ouswa i pou kre dezord an term standar osi, standar louveraz kot enn son standar louveraz pa pou parey avek lot.

So nou ti ganny *advice* pour ki nou antreprann en sel travay. E byensir ki nou'n fer, nou'n sey rod en fason ankor pou nou pa fye lo Bidze - nou'n rod en fason kot nou ti lans en *request* pou regarde lekel ki enterese pou partisipe, pou regarde lekel ki pare pou zot kontribye, fer en *deposit* pou kontribye pour ki nou kapab pran sa larzan e fer lenfrastruktir avek.

E la Gouvernman ki ti pou antreprann tou keksoz, pou fer sir ki tou keksoz i ganny fer dan en fason ki dan lord. Ankor nou'n ganny en pe *challenge* avek sa. Me nou pe rod fason ki mannyer nou pou kapab travay. E fer en fason ki sa bann dimoun i kapab ganny en alokasyon zot bann later e fer semen e fer alokasyon. Mersi.

MR SPEAKER

Mersi Minis. Avek sa nou a termin sesyon kestyon. Mon remersye Minis ek son delegasyon e mon swet zot bon kontinyasyon.

Pou bann Manm mon krwar i pou pli ekonomik pou nou pran poz la e rebran 3er edmi, koumsa nou a kapab kontinyen. (Madam Clerk i sanble mwan ki sa mikro ki Minis ti pe servi la i annan en problemm avek. Mon tann li grense tanzantan, si ou kapab fer teknisyen regarde letan nou dan *break*). Nou aprann poz nou a rezwenn 3er edmi.

(BREAK)

MR SPEAKER

Avan nou *move* lo *Bill* en pti *item* pou met nou annord mon krwar, lo *Order Paper* nou annan *Statement* Minis Hassan, me pou son lenkonvenyans li menm i demande pou fer sa demen akoz i annan lezot preokipasyon ozordi. So nou bezwen *move* pou sanz lord, *item* lo *Order Paper*.

Which means ki mon pran rekour avek *Order 97(1)* pou *suspend Order 25*, alor pou sanz, pou permet nou pran *Bill* avan *Statement by the Minister*. So si sa i annakor, nou a kapab prosede. Eski nou bezwen vote lo sa? Mon *ok*. Dan sa ka nou bezwen en Mosyon. En Mosyon silvouple.

HON BERNARD GEORGES

Mersi Mr Speaker. Bonn apre midi Mr Speaker. Mr Speaker anba *order 97* nou *Standing Orders*, mon *move* ki ou donn permisyon pou sispann *Order 25(2)* pou permet ki lord biznes pa ganny swiv e ki en *Bill* i ganny pran avan en *Statement* pou bann rezon ki ou'n fek donner. Mersi Mr Speaker.

MR SPEAKER

Mersi. Mon a ganny segonde? Onorab Arissol.

HON SANDY ARISSOL

Bonn apre midi Mr Speaker. Mosyon in ganny segonde. Mersi.

MR SPEAKER

Wi nou a vote lo sa Mosyon, Manm ki an faver lev lanmen silvouple? Mersi. Manm ki kont? Mersi. Lo Mosyon pou *suspend Order 25* pou sanz lord biznes lo *Order Paper*, 21 Manm in vot pour, 0 kont e 8 abstansyon. Sa Mosyon in aprouve. Lasanble i a kapab prosede.

Madanm raporter ou ava apel Minis pou *Bill* silvouple. Bon, bonn apre midi pou Minis ki'n zwenn nou pou *Bill Climate Adaptation Trust*. E dan son delegasyon mon *welcome* osi Mr Frank

Ally *Attorney General*, madanm Marie-May Jeremie *Chief Executive Officer* dan *Seychelles Conservation and Climate Adaptation Trusts* e Ms Donna Muganhiri *Assistant Principal Legal Draftsperson AG's Office*.

Mersi pou zwenn nou. *Panel* e nou leskiz pou fer zot atann en pe lontan. Nou ava al lo *Bill* e nou ava apel *LGB* - oubyen dan ou kote *LGB* lekel ki pou fer *Second Reading*? Ou menm? *Ok*? Onorab Georges *please proceed*.

HON BERNARD GEORGES

Bonn apre midi Mr Speaker. Bonn apre midi Minis, *Attorney General*, *CEO* e *Legal Draftsperson*. Mr Speaker anba *Order 69(2)* nou *Standing Orders* mon *move* ki *Conservation and Climate Adaptation Trust of Seychelles (Amendment) Bill 2022* i ganny lir en Dezyenm Fwa. Mersi.

MR SPEAKER

Mersi. Mon a ganny segonnman silvouple? Onorab Henrie.

HON GERVAIS HENRIE

Bonn apre midi tou dimoun. Mr Speaker *motion seconded*.

MR SPEAKER

Mersi. Mon pou kontinyen avek *Bill*. Minis mon ava apel ou pou prezant *Bill*.

MINISTER FLAVIEN JOUBERT

Bonn apre midi Mr Speaker. Mersi Mr Speaker. Bonn apre midi bann Manm Lasanble Nasyonal e osi bann dimoun ki pe ekoute ozordi apre midi.

Mr Speaker Lalwa lo Fon pou Konservasyon e Adaptasyon Klima - *the Conservation and Climate Adaptation Trust of Seychelles Act 2015* ti ganny enakte pou fasilite sa premye *Seychelles Debt-For-Nature Swap Agreement* ki enn premye tel tranzaksyon dan lemonn ki ti ganny relye avek proteksyon losean.

Sa Lalwa ti kre en lorganizasyon ki ti apel *Seychelles Conservation and*

Climate Adaptation Trust ki nou apel li *SeyCCAT*. E i annan plizyer komitman anba sa laranzman, e sa ti enkli pou fer Sesel deklar efektivman zwer 30 poursan son teritwar Maritim koman bann landrwa proteze, e an retour Sesel ti pou ganny lavalè \$21.6milyon Ameriken, son det ki ti pou ganny restriktire.

Annakor avek komitman fer dan sa tranzaksyon 30poursan nou *zone* eksklisiv ekonomik in ganny deklare koman bann *zone* proteze, atraver dezinyasyon ki ti finalize le 26 Mars 2020.

E sa in fer ki nou reisi realiz komitman ki Gouvernman ti annan pou *attend* lobzektif Nasyon-z-Ini pou konserv e servi losean dan en fason soutenab. E sa i kolekte avek bann *SDG* - bann *goal* pou devlopman dirab 14. E nou'n osi zwenn nou target anba konvansyon biodiversite e nou'n menm kapab re afirm langazman pei anver realizasyon azanda pou Lekonomi Ble.

Mr Speaker, an vi ki nou'n fini deklar bann landrwa ki proteze dan nou lanmer, nou'n aprezan ariv sa faz kot i neser pou nou efektivman zer sa 30poursan nou *zone* ekonomik eksklizif, par pran linisyativ tel ki enplimantasyon nou *Marine Special Plan*. *SeyCCAT* i zwe en rol enportan dan realizasyon sa bann lobzektif, e alor nou krwar i tre enportan pou revwar sa Lalwa ki deza an fors.

Avek bi pou amelyor loperasyon *SeyCCAT*, pou fer ki i pli byen kapab zwe sa rol, revizyon Lalwa *SeyCCAT* se osi pou aranz e koriz serten defayans ki annan dan sa Lalwa konsernen divers size e klarifye bann provizyon sa Lalwa kot i neser.

Mon aprezan Mr Speaker pas lo bann amannman ki'n ganny propoze. Sa lamannman premyerman i pou permet *SeyCCAT* pou eksplor plis sours finansman apard ki sa *endowment fund*, *revolving fund* e *additional endowment fund*. Sa i vedir ki *SeyCCAT* i kapab eksplor e zer nenport *bond endowment*

lenvestisman, finansman prive, garanti oubyen sekirite pou benefis konservasyon lanvironnman adaptasyon e mitigasyon kont bann lefe sanzman klima, ouswa ki relye avek Lekonomi Ble.

Mr Speaker dan lepase, in toultan difisil pou nou ganny finansman vize ver konservasyon lanvironnman e sa difikilte in ganny agrave par lefe pandemik *COVID-19*. An plis ki sa, lefe ki Sesel i aprezan en pei ki annan en stati avek reveni eleve;- savedir i en *high income status*, nou bann kantite kalite finansman in osi redwir.

Pour sa rezon i enportan pou asire ki Lalwa pa kre plis baryer finansyel pou *SeyCCAT* kapab mobiliz finans, sorti dan sekter prive, pou okenn finans ki ganny fer koman donasyon atraver bann lapros linisyativ ouswa bann *blended finance approach*.

Sa Prozedlwa i annan bi pou klarifye e agrandi posibilite e porte bann Seselwa ki kalifye, pou ganny led finansyer donnen par *SeyCCAT*. Sa i relye avek sa bann *eligible criteria for payment*, ki egziste anba seksyon 23 Lalwa prensipal. Avek lamannman, en *Grant* ki sorti kot *debt swap* oubyen larzan ki sorti dan nenport ki fon, ki ganny administre par *SeyCCAT*, i kapab ganny distribye koman en *Grant* pou arive akonplir okenn lobzektif ki relye avek rol *SeyCCAT*. Sa i par egzanp lenplimantasyon sa *marine special plan* e lezot plan parey.

An plis ki i osi permet ki *Grant* sorti kot *SeyCCAT*, i ganny servi pou kouver kou loperasyon oubyen kou *administrative* bann Minister, Departman e Lazans Gouvernman, pou asiste avek zesyon sa 30poursan nou lanmer ki ganny dezinyen koman *zone* proteze, e pou kontribye dan devlopman Lekonomi Ble.

Tou sa pe ganny fer pou kapab fer plis resours vin pli aksesib, pou sa bann ki bezwen dan pei. Sa Prozedlwa i osi anmenn klarifikasyon lo laplikasyon

Public Finance Management Act, 2022. Vi ki serten bann larzan ki *SeyCCAT* i administre pa sorti dan fon piblik, nou pe propoze ki zot ganny adrese diferaman avek bann larzan ki sorti direk dan fon piblik.

Pou adres sa, propozisyon se ki nou retir referans avek *Public Finance Management Act* e ranplas li avek sa term regilasyon. Lentansyon i pou kre sa rezim diferan pou larzan ki sorti dan fon piblik, e en lot lentansyon se pour kre de rezim diferan pou larzan ki sorti dan fon piblik, e en lot pou bann larzan ki sorti dan fon prive.

Mr Speaker parey zot kapab remarke dan seksyon 24 sa provizyon, pou selman aret ganny aplike, kan sa bann nouvo regilasyon i ganny met an plas par Minister responsab pou Finans. Sa bann menm regilasyon pou ganny aprouve osi par Lasanble Nasyonal.

Sa Prozedlwa i osi propoz serten lamanman an relasyon avek *Board Direkter*. E i entrodwir en konsepsyon ki permet obzervater prezant dan miting *Board* ki en pratik ki pa tro byen ganny fer e ki pou e nou anmenn en pli o nivo transparans dan travay sa *Trust*.

Propozisyon i osi annan bi pou ogmant poursantaz ki sorti dan larzan *debt swap*, ki kapab ganny servi pou kouvert bann depans *administrative* sa *Trust*. E sa i pou ede pour ki sa *Trust* i kapab kontinyen fonksyonnen san ki i war li dan difikilte finansyel, pou siport son bann staff menm si i en pti gin ki i bezwen pou li fonksyonnen.

Adisyonneman nou pe propoze ki sa nesese ki i annan an se moman, anba seksyon 26 Lalwa *SeyCCAT*, ki dir ki plan travay e Bidze *SeyCCAT* i ganny i bezwen ganny prezant devan Lasanble Nasyonal i ganny aboli.

SeyCCAT pa'n zanmen depi son kreasyon prezant son plan travay e Bidze dan Lasanble Nasyonal, e mon'n ganny met okouran ki en Lazans ki pa depan lo Bidze, pa prezant zot plan travay e Bidze dan Lasanble Nasyonal.

Lasanble Nasyonal i toultan rezerv drwa pou fer demann pou okenn sa bann kalite lenformasyon si zot war i nesese.

Tou-le-z-an bann rapor odit i ganny pibliye e i ganny mete lo sit sa lorganizasyon pou lenformasyon tou piblik, enkli Lasanble Nasyonal. An plis ki sa, sa Prozedlwa i osi annan bi pou reviz serten definisyon ki egziste dan Lalwa an se moman.

Par egzanp sa Prozedlwa i annan pour bi reviz definisyon '*protected area*' pou aliny li avek *Nature Reserves and Conservancy Act, 2022*. Tit sa Lalwa e tit lorganizasyon parey in dekrir dan Lalwa pe osi ganny revize. Par egzanp sa *Trust* i koni koman *Seychelles Conservation and Climate Adaptation Trust (SeyCCAT)*, me dan Lalwa sa *Trust* i apel *Conservation and Climate Adaptation Trust of Seychelles*.

An se moman bann Kontra, logo, piblikasyon ek lezot materyo, i refer e servi non *SeyCCAT*, e nou anvi ki Lalwa i osi reflekte sa. Mersi Mr Speaker. Nou ava aprezan reponn okenn kestyon e klarifikasyon ki Lasanble Nasyonal i annan lo sa size. Mersi.

MR SPEAKER

Mersi Minis. Eski mon kapab demande lekel Manm ki oule entervenir, zis pou mwan kapab balans en pe letan? Lev lanmen silvouple? Byen pou le moman mon napa bokou Manm, alors mon a les ale. Mon sipoze Onorab Hoareau i ava komanse.

HON JOHN HOAREAU

Mersi Mr Speaker. Bonn apre midi tou dimoun e lekout enkli mon bann koleg Onorab. Mr Speaker sa *Bill* ki devan nou i prensipalman pe adres bann mankman administrative, pour ki i donn plis lotonomi sa lorganizasyon li menm.

Premyerman parey Minis in fer resorti, son non sa lorganizasyon i bezwen ganny met anliny avek son *logo* e met anliny avek son non ki ganny servi lo tou bann Kontra Legal. Alor parey nou

ti konn li koman *SeyCCAT*, prezan tou referans pou ganny fer avek *Conservation and Climate Adaptation Trust Fund of Seychelles*.

Mr Speaker i enportan pou nou konpran en pti pe ki rol sa lorganizasyon - en pti pe dan plis detay. *Conservation and Climate Adaptation Trust of Seychelles*, parey i ganny mete lo son tit sa *Bill*, anba 5(a), (b), (c) lo son *mother Bill*, i dir nou poudir sa lorganizasyon in ganny kree pou li zer bann *endowment fund*, ki ganny donner anba sa program lesanz det pou konservasyon lanatir, ki Sesel i annan ki anviron en montan \$21milyon. E ki sa pou ganny donner par faz pandan en letan 20an.

Nou oule fer resorti ki sa lorganizasyon in ariv *6years down the line* la depi ler in ganny lanse e son bann bi prensipal se pour annan zerans lo lekspansyon bann *zone* proteze e lezot aktivite, ki annan pou fer avek proteksyon, konservasyon e mentenans biodiversite. E osi ede pour anmenn konesans syantifik e pou siport bann mezir mitigasyon ek adaptasyon lo sanzman klima.

An vi ki sa lorganizasyon i ganny osi bann reveni par bann *philanthropy* enternasyonal, parey *Nature Conservancy* ki en lorganizasyon enternasyonal baze Lanmerik, me selman si i osi annan ki son *Headquarters* i baze Lanmerik me i annan osi brans isi Sesel *GEF, Global Environmental Fund, UNDP*, menm Leonardo Dicaprio *Foundation* in fer kontribisyon. *Western Indian Ocean, Marine Science Association* osi fer kontribisyon, *Oak Foundation, Global Island Partnership* e lezot ankor.

Alor i enportan ki sa Lalwa ki nou pe gete la ozordi ki nou pe al aprouve ozordi, i permet sa bann striktir ek bann Polisi ek bann mekanizm finansyel, pou zer sa bann reveni dan en fason transparan e anliny avek bann gidans sa bann lorganizasyon doner, oubyen bann

donater - si oule - e osi bann standar enternasyonal.

Se pour se la, bokou lotonomi pe ganny donner avek sa *Board*, pour ki i kapab zwer sa bann *fund according* en pti pe *to* sa bann regilasyon oubyen Polisi ki sa bann bayer defon i pe dirize.

Mr Speaker se pour se la osi ki nou vwar poudir *Nature Conservancy* i annan en plas lo sa *Board*, en plas permanan lo sa *Board*, ki si oule i demontre kantite langazman zot annan avek sa lorganizasyon *SeyCCAT* ki nou ti konn li koman *SeyCCAT*. E osi ki kantite larzan zot pe mete, zot pe donner dan sa fon.

Mr Speaker mon ti a kontan ki *panel* ler i fer son *summing-up*, i donn nou en pe lide lo ki fason bann *oversight* lo sa bann larzan i ganny fer, an vi ki zot pe retir *Public Finance Management Agency* dan sa zwe, oubyen dan sa rol koman pou fer *oversight*.

So parey Minis in dir nou poudir pou annan 2 rezim regilasyon, enn ki pour annan sirveyans lo sa bout *public fund*, lot ki pou annan *oversight* lo *private fund*, so nou, nou ti oule konnen lekel ki pou annan sa *role oversight* lo sa 2 *set of* regilasyon ler i ganny enplimante.

Mr Speaker nou kapab konstate poudir sa lorganizasyon depi ler in ganny kree, in donn bokou *Grants*, e zis an 2021 zot in donn 54 *Grants* an tou. Ladan i annan 7 *Small Grants* ki zot donner ki apepre ki son *total amount* ki apepre R100mil, i annan apepre 37 ki son *total amount* i kapab ariv ziske 1milyon e i annan 10 ki'n ganny donner ki son *total amount* i kapab ariv ziske 2milyon.

So si ou pe gete sa *requested value of Grants* i ariv a en montan R49.6milyon. Be i annan bokou konplent lo size akse avek sa bann *Grant*, sirtou sa bann ptipti lorganizasyon, bann ptipti *NGOs* ki napa gran konesans lo ki fason pou akse sa *fund*, aköz i annan serten birokrasi -

serten komplikasyon an vi ki zot bann *operating manuals* i ase konplike.

Parey mon'n dir, i anliny avek rekomandasyon sirtou sa bann baryer defon ki i donn sa bann larzan. Me selman mon krwar poudir isi lo nivo lokal nou devret kapab senplifye serten keksoz, pou donn plis akse sa bann pti *NGO* pou zot kapab akse sa bann fon, e ki sa larzan i kapab *trickle down* pou ariv dan kominote en pe plis.

Mr Speaker lokalman sa lorganizasyon i annan bokou partener lokal;- par egzanp *Seychelles Maritime, Seychelles Planning* parey in ganny dir, Guy Morel *Institut, e CEPS, Chamber of Commerce and Industry, Island Conservation Society*, e lezot ankor.

I osi Mr Speaker anba son *Blue Investment Fund* ki ganny zere par *DBS* i annan apepre \$700mil ki ganny mete pou siport *island life and Blue Economy*. E pou kapab *secure the Seychelles Blue Future*. Mr Speaker mon osi konsernen avek poursantaz *annual budget* ki pe ganny servi pou bann *expense* administratif.

Parey in ganny dir i pe sorti 25 pou vin a 30poursan maksimonm. So petet ankor dan leksplikasyon, si Minis ti kapab donn nou en pe detay ki bann *administrative expenses* ki zot pe prevwar pou kapab - zot pou kapab depans sa bann larzan oubyen sa logmantasyon ki zot in mete?

Mr Speaker mon pa pou lontan lo sa *Bill* parey mon'n dir, e mwan dan son *entirety* mon war i en *Bill* ki tre byen, aköz i pe met annord serten lankadremen administratif. E i pe osi permet *the scope of funding* sa lorganizasyon pou agrandi bokou plis, pou li kapab parey in dir poudir *this is a revolving fund*.

Alor ou bezwen remet larzan ladan, so nou bezwen rod larzan avek bann baryer defon bann dimoun ki pare pou ede, e petet osi pli tar *why not* pou agrandi *scope of financing*, olye zis dan *nature conservancy* pou lamarin petet pli

tar i kapab pou bouz lo proteksyon bann *protected areas* lo later osi, e dan en fason ki sa larzan i ava annan en pli gran lesel kot i ganny servi pou benefis pei.

Mr Speaker avek sa mon a remerisi ou. Mersi.

MR SPEAKER

Mersi Onorab. Prezan mon apel Onorab Cosgrow pou son lentervansyon.

HON WALLACE COSGROW

Mersi Mr Speaker. Bonn apre midi Mr Speaker. Minis, tou Manm Onorab e tou dimoun ki pe ekoute.

Mr Speaker dabor avan mon *proceed further*, mon ti a kontan met devan Lasanble e manm piblik osi ki pe ekoute, mon - pa vreman lentere me solman mon ti deza enn bann *Chairperson SeyCCAT* dan mon fonksyon oparavan, so mon ti *Chairperson SeyCCAT* pou apepre 2an, en pti pe plis ki 2an.

E i en lorganizasyon ki mon'n enterakte bokou avek pandan mon *previous* pozisyon. I en lorganizasyon ki mon'n ganny sans travay avek, enterakte avek e i en lorganizasyon ki pou mwan i annan bokou fitir Sesel, sirtou dan domenn *management of nou ocean space, marine resources* e tousala.

Mr Speaker mon'n komans koumsa, aköz mon krwar i enportan pou eksplik en pti pe serten *scene*. E i osi enportan pou *remind* piblik Seselwa dan ki konteks e ki mannyer *SeyCCAT* ti ganny formen. E la i annan bann dimoun ki fer en kantite travay oparavan bann pionye *SeyCCAT* si nou kapab dir koumsa.

Pa neserman pionye *SeyCCAT*, me selman pionye sa ki Onorab John Hoareau fek dir taler, dezinyasyon nou teritwar maren, 30poursan nou teritwar maren dan *zone* proteksyon, travay ki sa bann dimoun in fer avek par egzanp dan *nature conservancy*, travay an relasyon avek *debt swap* pou sa 30poursan.

So in annan - *SeyCCAT* in en keksoz ki'n sorti dan sa bann travay ki'n ganny fer dan lefase pour enn premye bi sete *debt swap*, sete pou dil avek serten det ki Sesel ti annan. Nou lot bi osi sete pou protez nou losean an vi avek bann diferan *goals* bann diferan bi ki par egzanp Nasyon-z-Ini in mete e bann lezot lorganizasyon ankor.

Now, parey mon'n dir *SeyCCAT* ti ganny formen pou fer en bi prensipal. Sa letan enn bi prensipal sete pou ou *manage the proceeds of the debt swap*. E ti annan nesesite pou kapab annan en lorganizasyon ki pa gouvènmantal en pti pe an deor Gouvernman, kot ler sa bann larzan i antre i annan en mekanizm ki *monitor e manage* sa bann finansman.

So *SeyCCAT* ti ganny kree dan sa loptik, me *of course over the years - over the years SeyCCAT* in travay *alongside* bokou lezot partner ti ganny *setup* premyerman;- ti annan en prosedir *setup* kot mon rapel sa letan nou ti annan en etranze ki ti pe *run SeyCCAT* - en *CEO* etranze.

Nou ti napa petet or petet ou ti santi petet dan sa letan ti bezwen annan en nesesite pou *the setting up of* sa lorganizasyon, ki nou ti bezwen *set* en leksperitiz. Me mon *happy* poudir apre sa nou'n nobou annan nou en *CEO* Seselwa e la osi nou annan nou en lot *CEO* Seselwa ki pe *take the lead* dan *SeyCCAT*.

I montre bann diferan *capacity building* ki nou'n fer dan sa domenn, e konfyans ki dimoun i annan dan nou bann zenn profesyonnel Seselwa, pou *run* en tel lorganizasyon. Dayer zot en lorganizasyon ki afilye avek bokou bann lezot lorganizasyon enternasyonal parey mon'n dir, en lorganizasyon ki i pe resevwar *funding* par bann lorganizasyon.

E osi bann konpanyen enternasyonal tre, tre repite;- bann lakonpanyen, bann *philanthropist* par egzanp ki annan, si zot annan sa kantite

larzan. E si ou war ozordi *SeyCCAT* pe kapab benefisye e nou annan nou tou en *management* si oule lokal, konmsi i *speaks volume of* parey Angle i dir *of* sa lorganizasyon li menm, e keksoz ki sa lorganizasyon pe fer.

Mr Speaker i annan en nesesite pou *SeyCCAT* evolye dan lafason ki i pe fer keksoz. Pa evolye akoz pa ti bon, me evolye akoz mannyer bann keksoz pe vin devan *SeyCCAT*. Bann loportinite ki prezante devan *SeyCCAT*, bann loportinite finansman par egzanp, ki enportan ki ler ti ganny konsevwar petet serten keksoz pa ti pe ganny mazin lo la.

Me ozordi loportinite finansman par egzanp *from* bann diferan lenstitisyon enternasyonal, bann gro, gro lenstitisyon ki dil avek par egzanp *Ocean Protection, Marine Protection, Research* e tou sa. Zot bann lorganizasyon ki pe donn larzan ki pe investir dan bann diferan nivo proteksyon *around the world*.

E Sesel sa komitman ki i ti fer pou protez 30poursan nou teritwar maritim e enn ki pa'n ganny si mon oule dir, pa oule dir negligize. Me selman i enn ki'n byen ganny resevwar ki'n byen ganny vwar par bann lorganizasyon enternasyonal. I enn parmi bann premye si mon pa tronpe e bokou pei ozordi pe get atraver Sesel e zot pe *aspire* pou zot fer sa ki Sesel in fer.

E dimoun i get *SeyCCAT* koman sa mekanizm, sa lorganizasyon ki li osi o sant *management* tou sa bann finansman ki'n ganny met a nou dispozisyon.

SeyCCAT ozordi avek sa bann finansman e osi avek finansman ki i pe gannyen avek sa bann diferan lorganizasyon, i pe nobou bouz dan en lot letap prezan ki i pe osi donn finansman bann zenn antreprenner, or bann antreprenner dan sa *field marine research, Blue Economy*, bann diferan keksoz ki annan pou fer avek konservasyon losean, konservasyon lanmer.

E parey nou konnen *SeyCCAT* tou le lannen i *run* en *cycle funding*, sa ki nou apel bann *Grants* anba *Blue Grants Fund* e zot donn loportinite anba bann *Small Grant* pou bann diferan pti biznes lokal, bann pti nide biznes lokal ki annan pou fer avek lamarin, avek proteksyon lamarin e osi resers par egzanp dan lamarin pou zot kapab *apply* sa bann pti larzan e pou zot kapab pous en nide devan.

So sa i en keksoz ki pe ganny fer pou en pe letan. E avek petet levolisyon *SeyCCAT* ek bann diferan keksoz ki zot kapab anmennen dan zot fason ki zot *operate*, mon pe swete ki *SeyCCAT* i ava kapab anmas *or* pa anmase.

Me i ava kapab ganny loportinite ganny plis larzan, ki i ava kapab permet li donn *or expend* son levantay *Grants* avek petet swa pli gro *Grants* *or* avek plis dimoun, ki nou a kapab finalman devlop sa sekter *Blue Economy*, *Marine Blue Research*, *Marine Protection* dan son lanplere parey nou anvi devlop li.

E dayer parey nou'n dir nou'n protez 30poursan nou lanmer. E mon krwar i enportan ki nou annan kapasite pou nou kapab *manage*, zer sa 30 poursan ki nou'n proteze. So *SeyCCAT* i kle ladan li. I annan lezot lorganizasyon ki pe osi travay dan sa laliny, me *SeyCCAT* i kle aköz *SeyCCAT* i kapab *source funding from* bann landrwa kot i annan.

Larzan i annan en kantite partou, me ou bezwen en repitasyon, ou bezwen en lorganizasyon avek en bon repitasyon pou kapab atir *DA* bann kalite *funding*. E mon krwar *over the years* *SeyCCAT* in nobou annan sa repitasyon e menm anmenn sa repitasyon alaoter, kot ozordi ou bann diferan lorganizasyon ki pe dil ek zot i annan konfyans dan zot.

Me selman Mr Speaker mon ti a kontan met lanfaz, mon'n koz en pti pe lo sa bann *Blue Grants Fund*.

Mon ti a kontan met lanfaz lo sa bann *fund*, lo sa bann larzan ki zot *disburse* avek bann diferan antreprenere,

ouswa dimoun ki vin *seek* sa bann *funding*. An mezir ki zot revwar zot fason loperasyon, an mezir ki zot revwar par egzanp la zot Lalwa, pou kapab fer zot anmas plis larzan, e fonksyonn dan en fason en pe pli lib, pou zot kapab ed plis dimoun, mon ti a kontan ki zot vwar posibilite oubyen en pti pe plis sa bann *funding*.

Mon konnen zot annan bann *requirements* ase *stringent* aköz i larzan investiser, i larzan ki bezwen ganny *account for*. Me solman pete vwar par egzanp bann mekanizm kot zot kapab ed en dimoun pou li *access* sa bann larzan. Aköz i annan dimoun i annan nide, me solman zot pa neserman kapab met li lo en papye, pou kapab *access* en *fund*. Si mon pa tronpe ti annan serten lasistans dan sa domenn. Be solman petet si ou kapab vwar ki mannyer nou fasilit li en pe plis.

Si nou kapab osi rod en fason mannyer nou an mezir nou ale, *increase* la kantite larzan ki nou donnen, aköz keksoz i pa neserman bon marse e dimoun petet, depans ennlere i al, pou ganny en *Grant* depans i al dan bann diferan ladministratif lot, lot, lot, ki finalman ou pa kapab konsantre lo sa *Grant* li menm, e fer ganny rezilta atraver sa ki'n gannyen.

So si *SeyCCAT* i kapab prevwar tousala e met lanfaz lo donn en pti pe plis, agrandi en pti pe zot portfolyo, zot levantay, get en pti pe bann lezot landrwa kot zot kapab donn en koudmen fer bann loperasyon travay ki annan pou fer. Get bokou bann zenn aköz i annan en kantite zenn avek nide, get bokou bann zenn.

CEO i konnen, i annan en kantite bann zenn dan domenn lanvironnman ozordi ki petet dan nou letan pa ti parey. Me ozordi i annan en kantite bann dimoun ki vreman, vreman enterese dan domenn lanvironnman, dan domenn resers, ouswa dan domenn biznes menm li menm dan lespas lamarin. So mon konnen zot pe fer, me selman ler nou

revwar sa Lalwa, silvouple sey rod en fason ki mannyer nou kapab *expand* sa levantay, *expand* sa *funding* e pour ki Seselwa i benefisyé osi - lekonomi mon met li Lekonomi Ble an zeneral, i osi benefisyé dan sa laliny.

Avek sa Mr Speaker mon krwar ki i enportan ki *SeyCCAT* i evolue. E mon pa krwar ki son evolision pou aret la, mon krwar i en lorganizasyon ki annan en lavenir briyan. E dayer i en kreasyon, i en kreasyon *United Seychelles*. Mersi bokou Mr Speaker.

MR SPEAKER

Mersi Onorab. Mon apel *Leader* Lopozision Onorab Pillay.

HON SEBASTIEN PILLAY

Mersi Mr Speaker. Bonn apre midi Mr Speaker. Bonn apre midi Minis avek ou delegasyon e bonn apre midi tou bann koleg Onorab ki pe ekout nou.

Mr Speaker mon'n ekout atantivman prezantasyon Minis e mon'n ekout prezantasyon ki'n ganny fer par Manm *Bills Committee* ki'n koze an premye e mon'n ekout sa enn prezantasyon ki'n ganny fer par Onorab Cosgrow. Byensir Onorab Cosgrow ki annan leksperyans dan sa domenn, aköz in travay dan Gouvernman e in en dimoun ki'n tre konpetan dan Gouvernman.

E mon krwar Onorab Cosgrow i annan en pwen ler i dir ki kreasyon *United Seychelles* i byen, aköz *track record* lo proteksyon lanvironnman, e lo travay ki'n ganny fer dan proteksyon lanvironnman, i montre klerman ki sa in ganny anmennen pandan sa plizyer lannen ki parti ki mon reprezante in o pouwar.

Ler prezan nou pe bouz dan en lot direksyon, nou pe ariv dan en letap en pe pli modern, dan rol ki sa bann fon i bezwen zwe, mon krwar mon sitye mon largiman Minis dan en perspektiv kot *whilst* ou pou annan en lankadreman

formel ki *manage* proteksyon lanvironnman - savedir en Minister.

Ou bezwen osi annan en lankadreman en pe pli si oule *fluid* - en lankadreman en pe pli *souple* ki pa konform avek menm kalite rizidite ki en lankadreman gouvènmantal, ki annan tou son Polisi, ki annan tou son kontrol, i travay ladan e kot ou plito les bann- si oule eksper enterakte avek rol en lentansyon ki sa lorganizasyon i bezwen zwe.

E mon krwar se sa largiman prensipal ki ler mon'n ekout Minis mon'n tant pou mon konpran. Me selman i pa eskize ki mon annan detrwa konsern. Ler mon'n fer resers e mon'n regard Lalwa aktyel ek bann lamannman ki pe ganny propoze, mon vwar ki mannyer in annan si oule en *attempt* pou fer keksoz en pe pli fasil, me osi donn en pe plis lotonomi sa *Board* Direkter - sa konpozision e tir li anba sa *framework* en pe pli rizid ki ti egziste avan.

E mon krwar Onorab Cosgrow in fer le pwen, ki kot i ti komanse avek kot nou ete i de diferan letap e sa i byen. E mon krwar mon bezwen dir ki, ankor enn fwa in annan en travay ki'n ganny fer. Mon oule remersye bann dimoun ki'n travay lo sa Prozedlwa pou li ariv devan Lasanble.

Par kont ler mon'n al regard prezan bann proze e mon apresye lefe ki ou kapab ganny akse ase fasil avek bann proze *online*, en *website* ki ou kapab al ladan e dekouver ki kalite proze ki'n ganny fer, mon'n enterese, mon'n vwar ki i annan proze dan plizyer domenn.

Lo premye lye mon ti a kontan ki Minis i met devan Seselwa an zeneral, ki akse avek sa fon avek sa kalite finansman, i ouver avek tou dimoun. Mon dir sa, aköz mon annan en konsern ler mon regard bann endividi oubyen bann antite - mon napa naryen kont sa mon krwar mon felisit sa bann endividi ki'n pran sa linisyativ - i annan ladan ki mon konn zot personnelman - me mon

santi, eski petet alors si vi ki nou pe *move* dan en direksyon pou fer sa lorganizasyon pli *souple*; eski i bezwen annan osi en lentansyon pou anmenn li en pe pli pre avek lezot kategori endividi, ki malgre zot pou kapab fer en proze e antreprann en proze, e petet annan en nesosite kot zot pou bezwen serten sipor pou prepar sa lentansyon proze.

Mon dir sa aköz Mr Speaker, ler ou al lo sa *website* ou vwar bann diferan proze ki'n ganny *funded*. Mon'n war enn ki annan lo devlopman *hatchery and Culture of Tropical Echinoderm*. Zot koz lo si oule *sea cucumber*. E mon krwar sa i enteresan, aköz i en keksoz ki enportan pou nou pou vwar *whether aqua culture* i en keksoz posib an term *sea cucumber* e ki mannyer sa i kapab vin *commercially viable* pou nou pei.

Me petet osi kapab annan lezot *areas* ki annan lezot dimoun ki annan en leksperyans, me probableman *when it comes to the scientific expertise*, sa dimoun pou napa. E ki mannyer alors i annan en platform ki ganny kree - pa neserman atraver *SeyCCAT* pa neserman atraver sa ki nou pe koz lo la - me atraver Minister ki siport travay ki *SeyCCAT* i anvi fer.

Aköz mon prezimen tou bann eksper dan lanvironnman ozordi - ki mon annan gran respe pou zot - la mazorite zot i trouve byensir dan Minister Lanvironnman. E nou'n investir en kantite dan *train* zot e mon krwar nou ekspertiz dan sa domenn i *second to none* dan bokou pei.

E annefe si mon'n ekout byen bokou lezot pei, par egzanp *Maldives*, resaman *Maldives* i *keen* pou li etabli en striktir parey pou nou, ki malgre tou sa mouvman ki *Maldives* in fer, i pa'n arive kapab fer li, e mon krwar i pou depan i pe rod fason pou li servi *knowledge based* ki egziste Sesel, pou li kapab etabli sa ki pou li. Sa i en pwen ki mon ti a kontan fer.

En dezyenm pwen ler mon vin lo sa Prozedlwa li menm, mon'n note dan

sa konpozisyon e dan sa lamannman ki'n fer avek seksyon 7, i pou annan Minis, apre i pou annan en lot dimoun ki *of The Nature Conservancy*, mon pa konnen *The Nature Conservancy*, i kwa, nou pe koz *The Nature Conservancy*, an zeneral oubyen *The Nature Conservancy*, koman en antite? Mon pa tro ganny en konpran.

So si nou pe koz li an zeneral, mon ti ava ekspekte ki *a presentative of nature conservancy*, aköz ler nou'n ekrir li la mon ti pe annan antisipasyon pou mon demann mon lekor si *within* Minister Lanvironnman, oubyen Departman *Climate Change* i egziste en antite ki ou kapab konsider li koman en *Nature Conservancy Association* eksetera, be mon pa krwar i annan. So, mon ti a kontan ki nou ganny en klarifikasyon.

Me prezan mon vwar poudir sa 7 Direkter pou ganny apwente par sa 2 *ex officio* Direkter. Pou mwan konmsi mon ti a kontan ganny en pe plis leksplikasyon ki mannyer sa i marse.

Minis Flavien Joubert i en Minis ki'n enterakte avek Lanvironnman pandan plizyer lannen e in en profesyonnel dan son domenn pandan plizyer lannen, e i konpran en pe sa sityasyon. Me demen nou kapab ganny nou en Minis e i posib aköz *être* en Minis i plito en rol Polisi, ki napa menm leksperyans travay dan domenn lanvironnman.

E aköz Onorab Cosgrow li osi son kote osi i ti'n en Minis ki'n dan domenn lapas e in *garner* leksperyans ki'n permet li pou li *segue into* lanvironnman.

So sa ki mon pe met devan Lasanble la se en konsern lo lafason ki nou pou konpoz sa *Board*. Konmsi ler nou dir, poudir sa 2 dimoun ki pou swazir sa bann Direkter, pou mwan mon santi poudir be zot swazir 7 Direkter ki ganny aprouve par sa 2 *ex officio* *Directors* e 3 Direkter pou ganny nominen par Gouvernman.

Me konmsi lekel sa antite Gouvernman ki pou nominate sa 3 Direkter? Be Minis pa i li menm Gouvernman? Mon pa konnen si mon pe fer kler konmsi. Mon pwen i se ki Minis i deza li menm Gouvernman i deza pe nominate Gouvernman apre nou dir 3 pou ganny *nominate* par Gouvernman. So lekel sa Gouvernman prezan ki pou *nominate* sa lot 3?

So i enportan konmsi pou nou fer kler, aköz mon krwar dan konpozisyon bann *Board* dorenavan, sirtou bann *Board* ki annan pou fer avek en fon, e sirtou en fon ki prezan Lasanble Nasyonal pou napa en *direct input or outlook* lo la, i pou enportan ki nou etabli en sistenm kot sa bann Direkter i annan en *oversight* mekanizm, ki ganny met an plas pou asire ki sa fon i ganny servi.

Mon lot pwen i vin kot nou pe koz lo *Non-Governmental Organisations*. Mon ti a kontan ganny en leksplikasyon lo ki manner sa bann *Non-Governmental Organisations* pou vin ansanm pou nomin sa 4 Direkter. Eski nou pe dir sa pou ganny fer par *CEPS* ki *platform* pou bann *Non-Governmental Organisations*? Oubyen eski i pou ganny fer par bann diferan *Non-Governmental Organisations* ki dan Lanvironnman?

Me si sa i leka *then* i pou, si mon leksperyans in *serve* mon *right*, i par vremen difisil pou fer tou dimoun tonm dakor lo en dimoun dan bann sekter lanvironnman. Aköz sak dimoun parfwa i santi pou dir mon en pti pe pli eksper ki sa enn dan sa enn domenn, dan sa enn domenn, dan sa enn domenn.

So petet ti ava bon nou klarifye, aköz ler nou pe fer son konpozisyon demen nou pa ti a kontan annan kestyon konpozisyon, aköz son lentansyon i en bon lentansyon *in the first place*.

Prezan mon vin lo sa pwen plan travay Lasanble Nasyonal e *oversight*. *SeyCCAT* i sa larzan i kapab egziste aköz travay ki Lasanble Nasyonal i fer. Ki

manner sa aköz se Lasanble Nasyonal ki aprouv Bidze Gouvernman an total, ki fer ki ou Gouvernman i kapab met larzan dan bann proze ki anmenn proteksyon lanvironnman, ki fer ki nou Gouvernman i kapab realiz son lobzektif dan proteksyon lanvironnman e san Lasanble Nasyonal sa pa pou arive.

So okenn keksoz ki vin *value added* avek sa ki Lasanble Nasyonal i *provide*, then i tonm koman en keksoz ki direkteman konekte avek amelyor lavi Seselwa. E reprezantasyon Seselwa i ganny fer par Lasanble Nasyonal.

Therefore, mon war li en pe drol lo ki manner prezan Lasanble Nasyonal pou annan en *interface* avek sa lorganizasyon, si nou dir nou oule bouz devan. Aköz par egzanzp mon pran rol ki *IAC* i bezwen zwe ozordi. *IAC* i annan en rol en pe plis larz pou li zwe, e sa i probableman en dosye ki devret annan en kontak direk avek *IAC* ki ganny *maintained*.

Aköz definitivman an sa ki konsern tou bann korperasyon, tou bann langazman lo en nivo enternasyonal, i pou annan en *involvement IAC* a en moman donnen. E alors nou pa kapab *write-off* konpletman Lasanble Nasyonal dan sa proses, menm si nou'n dir ki *Public Enterprise Monitoring Commission* pa pou kapab vin fer sa.

E mon pa swiv sa largiman ki si ou pa en *budget dependent entity*, Lasanble Nasyonal napa en *oversight* lo ou. Non. Mon pa krwar sa, aköz ou egziste aköz Lasanble nasyonal i permet ou egziste! Annefe si nou pa pas sa Lalwa koman en Lasanble ou pa pou egziste.

So si statitwarman ou egziste aköz Lasanble Nasyonal, *it follows* ki alors Lasanble Nasyonal i bezwen annan en loblizasyon statitwar pou li annan en *form of oversight* lo sa ki sa lorganizasyon i sipoze pe fer.

E mon konpran largiman Minis, me mon ti a kontan osi i regard li *from*

perspektiv ki mon prezant devan li, e ki manyer nou kapab reini le 2 perspektiv ki i ava annan en - si oule en kontak ki ganny garde - en koneksyon ki ganny garde avek rol ki Lasanble Nasyonal i bezwen zwe, avek an sa ki konsern pa zis *oversight*, me promouvwar travay ki Gouvernman i fer.

Akoz par egzanp *let's say* demen en Manm i oule vin avek en *Private Members Bill* ki annan pou fer avek proteksyon lanvironnman. E si i en Lalwa ki pa pe met okenn *charge* lo *Consolidated Funds*, i pou en Lalwa ki pou kapab vin devan Lasanble. Me si i kapab vin devan Lasanble e sa Lalwa i kapab en lenpak lo *SeyCCAT*.

So dan mon perspektiv ki mon pe vwar, mon pe santi ki i devret annan en *thought process* ki vin avek, asire ki Lasanble Nasyonal i annan en rol pou li zwe dan sa konteks. Prezan Mr Speaker mon vin lo mon dernyen pwen e sa i en pwen ki souvandfwa mon tann Ziz Renaud koz lo la, e i en pwen an sa ki konsern si oule en perspektiv drwa imen e en perspektiv proteksyon lanvironnman.

I annan serten largiman, serten *school of thought* ki dir ki si par egzanp koman en pei, nou decide par egzanp pou anpes nou popilasyon fer serten aktivite dan serten landrwa, nou pe *deny* li avek son drwa pou li ganny en reveni, oubyen en *economic gain from* sa ki son pei i kapab *provide*.

E pou mwan sa i en keksoz enportan ki nou bezwen met an perspektiv dan sa ki nou pe fer, aköz esansyelman par egzanp si demen ou dir ek detrwa peser Seselwa *ok* ou pa ganny drwa lapas dan serten landrwa lo Mahe Plateau, ou pou pe *deny* sa bann peser avek en fason pou zot ganny en *income* lo Mahe Plateau.

E Ziz Renaud ti fer sa diskisyon sirtou an relasyon avek *debt swap*, mon rapel premye fwa ki nou ti koman koz lo la, e ti annan serten largiman for ki *Human Rights Commission* ti sipoze pe

fer lo la. So eski Minis dan konfigerasyon, dan *going forward* ou pe mazin lenplikasyon?

Akoz sa bann keksoz i koman vin pli evidan, i komans vin pli enportan pou konsidere, ki manyer nou asire ki *whilst* ki nou pe kontinyen devlope koman en Nasyon, koman en pei, nou kontinyen protez lanvironnman nou kontinyen gard nou *tract record*, nou osi kontinyen fer sir poudir nou popilasyon i kapab kontinyen grandi, fer bann aktivite ekonomik ki permet kreasyon larises, ki permet devlopman ekonomik nou pei.

Tout an prenon kont ki nou bezwen *still* kontinyen protez lanvironnman. Ki manyer nou pou mentenir e *strike* sa balans ki nou bezwen mentenir Mr Speaker.

E sa i enportan pou Minis konsidere, aköz mon santi poudir sa lorganizasyon i enn ki tre enportan. E mon kontan sa lantouzyazm, sa pozitivite ki vin avek travay ki sa lorganizasyon in fer.

E mon ankouraz sa, *but at the same time* koman en Lezislater i osi e mon rol pou met an plas bann konsern e bann sizesyon ki mon krwar nou kapab fer pou nou *improve* konteks ki manyer sa *organisation* i fonksyonnen.

Avek sa Mr Speaker, mon krwar ki mon ava esper Minis pou donn nou en pe klarifikasyon lo bann pwen ki mon'n *raise*. E mon'n apresye bann *feedback* ki mon'n gannyen lo bann prezantasyon ki'n ganny fer par bann reprezantan *SeyCCAT*, ki'n vin devan *Bills Committee* ki'n koz lo sa Prozedlwa atraver bann Manm *Bills Committee*.

E mon ti a kontan prezan ekout ki manyer Minis i armoniz tou sa bann pwen ki nou'n met devan, pou nou annan en dokiman ki sorti dan Lasanble ki pa reprezant zis pwennvi en kote latab be i reprezant pwennvi lepep Seselwa. Mersi Mr Speaker.

MR SPEAKER

Mersi Onorab Pillay. Mon annan Manm ki'n lev lanmen ankor apre ki mon ti'n demann zot, mon a donn zot laparol. Me selman mon krwar mon a bezwen met en limit letan lo zot. 10minit. Onorab Henrie.

HON GERVAIS HENRIE

Mersi Mr Speaker. Mon krwar ou pa ti'n war mwan atan, akoz mon ti parmi bann premye avan bann dimoun pou lev lanmen, me solman mon ava seye.

Mr Speaker an 2008 lemonn i fer fas avek en kriz ekonomik. Ler mon dir lemonn Sesel osi i parmi. E dan menm lenstans Sesel osi i war li koman en pei i anvi devlope, i anvi sa devlop son sèkter ekonomik an plis ki tourizm, lapès, servis finansyel. Son det in ariv plis ki 150poursan son *DGP*.

Alors Sesel i zwenn son bann krediter pou sey negosye son det e vwala kot sa konseps in antre kot nesans *SeyCCAT* in vini. Kot serten det pei i ganny redwir ouswa i ganny reorganize an retour ki sa bann larzan i ganny servi dan proteksyon lanvironnman.

E kot byen selman dir Sesel tou dilon, ziske ler nou'n *Canada* 3 semenn pase Sesel i ganny felisite koman premye pei dan lemonn pou vin avek sa konseps. Sesel. Ler Sesel ti pe fer fas avek problem det, pa ti zis pou *US* sa. Ler Sesel ti santi poudir i ti anvi protez son lanvironnman pa zis *US* ki ti mazine sa.

Ler bann endividi ti enplike pou travay *behind the scene* avek *Paris Club* e tou sa bann lezot krediter, pa ti zis dimoun *US* sa - ti Seselwa! Ler sa *SeyCCAT* in ganny kree sa bann dimoun ki'n travay avek e dabor mon ava felisit zot, e remersye zot pou travay ki zot in fer ki Sesel pe ganny felisite mon'n dir zot se 3 semenn pase e souvandfwa nou ganny, nou koman Manm Lasanble nou ganny demande pou prezant bann papye, akoz nou sorti Sesel pou partaz sa leksperyans. E nou ganny envite akoz koman Seselwa pa koman Manm *US*. Mwan mon ti prezant en papye *Nova*

Scotia pa akoz mon pa en Manm *US* en Seselwa, alor pou nou vin get sa *Bill* e dir ki sa i kreasyon *US* i mal. I mal, akoz Seselwa ki ti enplike.

Mr Speaker e alor ozordi *SeyCCAT* i la koman *The Conservation Trust Fund*, akoz li ki annan en latas prensipal pou mobiliz resours pou avans konseps Lekonomi Ble e fer sir ki resers i ganny fer, e dimoun i partisip dan sa bann devlopman e zot annan akse avek bann fon e alor mon ava dir zot kontiny sa travay.

Aprezan lamannman ki'n vin devan nou ozordi Mr speaker, mon bezwen dir bann lezot *MDAs* i merit pran sa koman en legzanp fason zot pou travay. Akoz? Ler ou ganny en Lalwa pou ou travay avek koman ou *framework* legal, ou pa kapab les li zis roule - lapousyer e mon pran legzanp *Employment Act* tou letan depi '95 i ankor telkel.

Me *SeyCCAT* 2015 ti pase e la 7an pli tar bann dimoun i pe travay avek sa Lalwa partikilyerman son *Board*, in realize poudir i annan bann *gaps* alor ek *Commission* en *consultancy* pou vwar ki mannyer zot kapab konble sa gap e anmenn bann lamannman pou fer *SeyCCAT* vin pli efektiv e pli proaktiv.

E mon ler mon'n lir sa Lalwa Mr Speaker, mon'n vwar bann lamannman i al dan en sel direksyon, pou donn lotonomi sa *Board* e pou retir lenterferans, ouswa direksyon Egzekitiv direkteman lo sa *Board* e sa i akoz an grann parti se bann dimoun an deor Sesel ki pe kontribye dan finansman bann proze *SeyCCAT*. E enn bann kondisyon ki zot mete poudir Gouvernman fodre reste lwen.

Menm si *SeyCCAT* i en antite pou Sesel, me selman i pa dwatet ganny kontrole e alor se sa ler nou pou regard bokou sa bann lamannman;- par egzanp premye kot zot komanse dan definisyon *NGO*, zot fer li keler poudir en lorganizasyon ki pa anba Kontra okenn Gouvernman.

E apre zot ale pou met 4 manm nominen par NGO e alor ki fer ki bann sekter ki non-gouvernmantral ki pou kontrol sa *Board*. E nou vwar poudir sa *Board* dan son bann lamannman, i fer bokou propozisyon pou li annan plis kontrol lo zesyon *day-to-day running of the Board* Mr Speaker.

E alor par egzanp mon ti ava kontan enn bann kestasyon ki pou mwan demann *panel*, dan en propozisyon lamannman kot bann lezot depans ki *Board* pou aprouve – ladan i meter - “*Such other cost approved by the Board*, e mon anvi konnen ki bann lezot depans ki zot pe mazine, otreman ki sa ki Lalwa in prevwar;- par egzanp kou lantrennman, depans lo *staff*, piblikasyon, kou loperasyon, voyaz transportasyon, eksetera.

En lot propozisyon lamannman enteresan Mr Speaker, i vin dan 6(a) si vitman mon kapab vwar li *tract version 6(a)* dan *amendment to section 6* nou pe koz 6(a) kot i dir ki “*subject to condition that the aggregate of such payment does not exceed 5percent of the annual revenue of the Trust for any fiscal year, or such high amount as may be prescribed by regulations*” e sa i le ganny retire.

So si *Mother Act* ti fer provizyon pou annan en *ceiling* akoz ki *Board* a sa moman i oule retir sa provizyon? I annan osi propozisyon dan lamannman seksyon 12 ki dir “*specified by rules subject to the government policy applicable to the public bodies...*” e nou war ki sa i oule ganny amande, pou li vin “*...as determined by the Board.*”

E deza Lasanble ti annan en pe difikilte avek sa letan par egzanp nou'n diskrit *Fair Trading Bill* avek *Planning Authority*, kot nou ti oule ki bann tel provizyon i annan en larmoni dan sekter piblik, sirtou kot Polisi i diriz serten keksoz, ki fer li kler, transparan an nwanr e blan, e la nou war poudir *Board* i ti oule sanz sa.

I annan osi en propozisyon Mr Speaker, dan propozisyon lamannman seksyon 18 kot i fer referans avek *Public Finance Management Act*. E zisteman parey mon'n dir boner, akoz bokou larzan i ganny donnen par bann dimoun an deor.

E enn bann kondisyon ki zot mete koman sa bann donater de fon, la i pa oule enterferans Legzekitiv me mon'n satisfè ki dan son prezantasyon Minis in dir apre i ava annan regilasyon, ki ava diriz nou ki sorti dan *Consolidated Fund* e bout ki bann donater de fon i donnen.

Mr Speaker osi propozisyon pou dan *repeal and replacement of section 23*, la nou vwar i liste byen bann kondisyon pou ou ganny *Grant*, me dan son *Mother Act* orizinal, nou ti vwar poudir enn bann kondisyon ki ou pa kapab demande, se pou kou administratif pou *run* ou proze - son kou administratif e nou'n aprann poudir in annan e bann lorganizasyon dan lepase ki'n fer bann alokasyon. Me apre zot in ganny difikilte pou zot zer zot proze byen e alor kekfw *Board* in santi poudir be *ok* zot ava navig en pti pe, pou donn en pti pe plis lespas, en pti pe plis led, donk mon ti ava kontan ki *panel* osi i agree lo la.

I annan en propozisyon pou lamannman dan seksyon *amendment to section 25* kot zot oule tir sa bout ‘*who shall cause them to be laid before the National Assembly*’, Mr Speaker sa provizyon avan, i ti pe demann *SeyCCAT* ki lo komansman lannen zot fer en *work plan*;- setadir zot dir pandan lannen 2023 nou pou fer *a, b, c, d*.

Apre zot prepar en Bidze, zot soumet sa avek Minis, e li Minis ti oblize met sa avek Lasanble Nasyonal. Zot pa'n zanmen fer zot menm zot in kas zot prop Lalwa. Me selman mon kapab viv ek sa, akoz mon pa war rezon ki nou Lasanble Nasyonal nou bezwen konnen davans ki zot pe al fer, akoz zot pe al fer sa ki zot pe fer.

Mwan mon ti ava dir donn zot lespas pou zot fer zot travay. E se pour sa rezon ki mon'n soumet en propozisyon lamannman pou entrodwir en nouvo seksyon 28, kot les *SeyCCAT* fer son travay. Me kot ler son bann finansyel in fini, la prezan i prepar en rapor lo son bann aktivite. E avek son *audited account* i fer Lasanble gannyen ki nou ava *still* annan en *oversight* lo ki zot in fer? Akoz zot in fer? Lekel bann antite ki zot in travay avek, konbyen larzan zot in donner, ki sa bann antite in fer? E ki si i annan problem nou kapab prezan travay ek zot pou konsyan zot pou dir be lannen prosenn vey sa, vey sa, vey sa.

E sa i deza fason ki nou pe travay. *FTC, Media Commission, Central Bank*, tousala i bann antite ki donn en rapor Lasanble Nasyon, e nou travay avek zot pou nou kapab touzour annan *oversight* e amelyor travay ki zot pe fer Mr Speaker.

I osi annan propozisyon dan lamannman *amendment to section 26* ki dir ki *“the Trust made in each fiscal year use up to 30percent of the debt swap incomes to meet the administrative expenses of the Trusts.”*

Dan *Mother Act* tou annan ankor en *ceiling* ki mon krwar i ti permet li dan son premye 2an servi *up to 25 percent*, e apre sa 2an i ti *15 percent*, me la zot oule ogmant sa par 30poursan. Ankor i bezwen annan en rezon. E mon swete ki *Board* i kapab egzers kontrol e pa neserman les annan labi dan sa sityasyon 30poursan.

Mr Speaker mon pe sey al vit menm, i reste mwan ankor 2 propozisyon mon oule koz lo la. Dan *amendment to section 31*, nou vwar poudir dan son *Mother Act* i ti fer provizyon ki Minis ti kapab annan serten provizyon, ki donn li en kontrol lo *Board SeyCCAT*, me la zot pe demande ki son *subsection a, b, d* avek *e* i ganny *repeal* e mon ti ava kontan konnen ki mannyer legzistans sa bann *clause* ki pe ganny

retire, to afekte ouswa andikap travay *Board SeyCCAT*.

E finalman Mr Speaker dan seksyon *amendment to section 32* vwala ankor en keksoz ki nou vwar ki mannyer sa enteraksyon *SeyCCAT* avek bann lorganizasyon an deor Sesel i antre. Akoz par egzanp letan zot entrodwir dan savedir i pou vin 23(2) kot mon lir;

“for the purpose of this section the word rules shall be construed as guidelines, that are binding on the Trust and such rules do not form par of the laws of Seychelles.”

E sa ankor i bann lobligasyon enternasyonal ki ganny mete lo sa lorganizasyon, ki pa neserman ganny kouver dan nou bann Lalwa lokal e i pou satisfere bann kondisyon bann dimoun ki donn *SeyCCAT* larzan.

Alor Mr Speaker an konklizyon mon ti ava dir ki *SeyCCAT* travay ki i pe fer nou bezwen kontinyen ankouraz li.

Me parey Onorab Hoareau in dir e lezot Manm ki'n koze, se pour fer li vin en pe pli vizib, en pe pli transparan. Nou konnen poudir in donner enn de *Grant* - an se moman mon war i annan 28 dernyen ki mon'n konte. Me nou toultan vwar poudir i kapab bann dimoun ki i annan sa prezans dan sekter lanvironnman ki pe benefisye.

Alor mon ti ava kontan vwar poudir i al - i regarde ki mannyer i kapab antre en pe plis dan kominote, ki nou bann Manm Lasanble isi ki reprezant bann distrik, nou kapab anmenn sa mesaz kot nou bann dimoun poudir be ou osi tou ou kapab al tap laport laba.

Mon ti a kontan vwar plis zenn lo *Board SeyCCAT*. Par egzanp nou konnen i annan en kantite bann zenn ki enplike dan Lanvironnman, me ler mon pe get son *Board*, mon pe get son bann obzervater konmsi i mank en pe lavwa lazenes.

E so mon ti ava enn bann keksoz ki ti pe trakas mwan Mr Speaker, se akoz souvandfwa bann dimoun ki dan sa Sekter Lanvironnman la, zot bann

dimoun ki kapab annan bann personnalite *very overbearing* en? Zot devan la, zot pou met presyon zot konnen ki zot pe fer - prezan mon ti pe trakase poudir be kekfwa zot kapab manipul SeyCCAT en pti pe.

Be yer mon'n ganny reasirans avek en dimoun ki konn byen, e i dir mon poudir sa CEO la i en dimoun ki for, ki solid e ki'n *cross sword - not in a bad way* - avek sa bann dimoun i kapab met latet avek zot dir mon Onorab mon garanti ou poudir pa trakase SeyCCAT *is in good hands*.

So I wish you and the team all the best e mon swete ki lamannman sa ki nou'n propoze i ganny aksepte. E ki alor nou kapab devlop sa relasyon travay avek SeyCCAT ki pa'n egziste ziska la depi ki sa Lalwa ti pase orizinalman an 2015, e ki vremen SeyCCAT i vin en keksoz fitir ki lazenes Seselwa vremen i ganny e i trouv son plas ladan. Mersi.

MR SPEAKER

Mersi Onorab. Onorab Woodcock.

HON WAVEL WOODCOCK

Mersi Mr Speaker. Mon entervansyon pou tre bref lo sa *Bill*. Annefe Mr Speaker i enportan pou note e fer resorti ki preski tou pei la mazorite pei dan lemond zot akimil det, menm bann gran pei ki parey Lanmerik ozordi i annan bann gro, gro det ki zot bezwen repeye e i responsabilite okenn Gouvernman ki'n akimil det pou zot rod fason pou zot repeye sa bann det.

Annefe mon pa pou bliye poudir zisteman mon pe mazine bann *creditors Paris Club*, mon rapel bann negosyasyon dan lepase anba Gouvernman presedan sete pa lot ki mon rapel ki ti *lead* bann negosyasyon avek *Paris Club*, sete pa lot ki nou Vis-Prezidan ozordi Vis-Prezidan Ahmed Afif sa bann letan i ti PS kot Minis Finans, ki en bann dimoun ki ti *instrumental* pou *lead* negosyasyon pou retir bann det pou

sa bann *debt swap* ki ozordi nou pe benefisyé.

Annefe sa negosyasyon ti lagreman ti tonm an form avek *Paris Club* mon krwar an Fevriye 2015 si mon pa tronpe, se bann negosyasyon ti'n deroul pou en pe letan. E nou tou nou konnen poudir Prezidan Faure i pa ti en teknokrat. E se *more or less PS Afif* sa letan, ki ti *lead* negosyasyon pou retir sa bann det ki nou ti annan annefe R21.4milyon ti ganny negosye pou ganny *swap* parey mon dir, kot sa larzan ti pou ganny servi an proteksyon - *obviously in partnership* avek *Paris Club* pou protez nou *country's marine resources* e osi pou *build* rezilyans kont bann lefe sanzman klima.

So mon pa krwar ki - ler nou pe koz pou nou redwir nou det, i en travay kolektiv ki enkli tou bann profesyonnel ki nou annan dan nou pei e annefe nou Gouvernman ler nou'n pran labar an 2000 - *well* 2an pase in osi nou responsabilite pou nou rod fason pou nou repeye bann det ki nou pei i annan ki enkli en gran det.

Annefe *Air Seychelles* annou pa bliye ti en det anviron R7milyon ki nou Gouvernman ler in vin o pouvwar menm si pa nou ki'n akimil sa det, nou pran li nou responsabilite nou Gouvernman pou nou ede rod en fason pou redwir sa det e in ganny redwir par \$50milyon, det ki Gouvernman presedan in akimile.

E fodre note Mr Speaker ki Gouvernman avan in akimil en kantite det ki nou Gouvernman ozordi i bezwen dil avek. E bann profesyonnel ki avek zot ozordi bokou sa bann profesyonnel i ankor la e zot ankor pe travay zisteman parey nou Vis-Prezidan ozordi ki ti ed zot Gouvernman pou negosye sa det avek *Paris Club*.

Mr Speaker mwan zisteman parey mon'n dir mon pa pou koz longman lo sa *Bill*, me selman mon anvi tous en pti pe lo sa *Blue Grant Fund*, (BGF).

Annefe sa lannen i annan en alokasyon ki zot ti'n fer provizyon pou

ganny *disburse* en sonm R24milyon annefe sa son *any* NGOs, CSOs e menm endividi *biznes* Lorganizasyon *Parastatal*, *Government Agencies*, Departman i kapab *apply* pou ganny sa *funding* anba sa *Grant* i diferan sonm.

Pou bann *Small Grant* i anviron R100mil - i *around* R100mil mon krwar e mon krwar son *medium* i *from 100 thousand to 1* milyon. E pou bann gro proze li pou bann *Large Grant* i en son anviron R2milyon. E zisteman mon konnen mon'n swiv en pe *SeyCCAT* bann *funding* bann *Grant* ki zot in donnen.

E mon konnen zisteman Sanmdi pase mon ti annan en miting avek 2 Lasosyasyon Peser, kot mon'n aprann poudir i annan en sonm ki'n ganny *allocate* pou en proze sa nivo sistenm ki mon konnen in ganny *funded* anba *SeyCCAT* pou sa sistenm ganny enstale lo bann bato lapes endistriyel.

So dan en sans ou en lot, *SeyCCAT* pe zwe en rol pou ede kot i konsern parey mon'n dir - konservasyon lanvironnman, devlopman nou Lekonomi Ble, pou dil avek lenpak sanzman klima. Me mon kestyon e konsern ki'n ganny souleve e menm dan sa miting i annan dimoun ki'n koz ek mwan lo sa size.

E plizyer dimoun in vin kot mwan pe demann mwan ki fason ki zot pou ganny akse avek *funding* avek *SeyCCAT*? Mon krwar la i petet kot nou bezwen petet demann en pe kestyon e mon ti a kontan konnen, en pti pe bann kriter ki zot servi? Akoz i annan bokou bann dimoun ki'n dir mwan anmenn bann konsiltan ouswa bann dimoun ki'n *apply* pou ganny *funding* anba *SeyCCAT*.

Me zot dir si ou pe *apply* pou 1milyon ouswa par lao 2milyon, zot war li difisil pou zot ganny sa *funding*, me selman si i redwir zot demann en sonm ki ba, i pli fasil pou zot ganny en *funding*. Konmsi zot pe dir poudir zot pa pe ganny

en konpran en pti pe ki bann kriter ki pe ganny servi.

Eski ou bezwen serten groser? Eski ou bezwen annan serten afilyasyon enternasyonal? Me petet bann *local based CSOs*, *NGOs* zot, zot pa pe ganny gete parey petet bann lorganizasyon ouswa bann Departman Gouvernman ki en pti pe pli gro?

Konmsi en pti pe sa bann konsern lo fason ki sa bann *Grant* pe ganny donnen. E mwan mon ti a kontan donn ou en parti pe detay en pti pe leksplikasyon ki bann kriter vreman ki zot servi?

Ki mannyer bann dimoun dan nou kominote kekfwa ki annan en proze *coastal*, en proze Lekonomi Ble sirtou bann proze konservasyon - akoz mon annan en kantite *NGO* la, mon pe mazin en zenn group *Fresh Focus* ki zot fer en kantite.

Me selman zot pe rod *how to go about it*? Konmsi i annan er kantite konplikasyon e petet ki neselit leksplikasyon par *SeyCCAT* lo *how to go about it* pou sa bann diferan *CBOs*, *CSOs* e bann *Civil Society Organization*, pou zot kapab ganny akse avek sa bann *Grant* ki pou ed ou menm kou pei sirtou, kot i konsern konservasyon e devlopman Lekonomi Ble dan nou pei. Avek sa 2 mo Mr Speaker mon dir ou mersi.

MR SPEAKER

Mersi Onorab. Bon prezan mon ava envit Minis pou fer son *summing-up*, konklizyon lo deba.

MINISTER FLAVIEN JOUBERT

Mersi Mr Speaker. Mon pou zis pran enn pti moman pou organize bann pwen ki nou'n ganny demande par bann diferan Manm Onorab.

Mr Speaker nou'n ganny plizyer kontribisyon sorti kot bann Manm e mon remerci bann Manm pou zot bann pwen ki zot in fer. Serten vreman detaye. I posib ki mon pou mank serten pwen

par serten Manm. Si mon fer en *mistake*, petet bann Manm i kapab entervenir pour eksplike, ouswa pou repas lo sa bann pwen ki mon manke.

Mon pou komans Mr Speaker, avek bann pwen ki ganny leve par Onorab John Hoareau, e in koz lo plizyer size. Mon'n rikord apepre 5 pwen ki in fer. Premye i annan pou fer avek *oversight*, e mon krwar i annan lezot Manm osi ki'n lev sa pwen. E akoz ki nou pe fer de rezim pour *oversee* sa Lalwa? E ki mannyer sa bann mezir pou ganny met an plas?

Mr Speaker, kot i konsern, sa bann rezim, parey zot a vwar dan Lalwa *SeyCCAT*, e osi sa bann amannman ki nou pe vin avek. Nou le ouver laport pour ki *SeyCCAT* i kapab fer bann demars, pour li ganny plis kontribisyon, sorti kot diferan sours finansman. Sa larzan ki *SeyCCAT* i gannyen, atraver sa *debt swap* i apepre \$200mil par lannen, i pa sifizan li menm pour nou fer tou bann keksoz ki Sesel i merit fer anba sa mekanizm.

Akoz ozordi letan nou pe get ekspansyon bann *zone* proteze, kot i konsern sa 30poursan dan *EEZ*, deza nou pou napa menm si nou pou dir, nou pe ouver laport pour nou kapab finans bann aktivite relye avek sa 30poursan.

Nou pou napa ase larzan pou fer sa bann aktivite. alor i pou bezwen, i pou enportan pour *SeyCCAT* al rod ankor finansman pou siport bann aktivite ki bezwen fer, e siport sa ekspansyon 30 poursan dan *EEZ*.

E sa de rezim i ase, *straight forward*. Bann larzan ki sorti kot Leta Sesel, ki al dan sa fon ki apel *SeyCCAT* e ki annan en porsyon ki ganny distribye pour benefis bann aktivite lanvironnmental, byensir i en larzan ki sorti kot Gouvernman Sesel.

Me selman i pa en larzan ki pe ganny donner par Gouvernman Sesel. I en repeyman pour en det ki ganny fer. Alor, i pa vreman en larzan ki Gouvernman pe met dan *SeyCCAT*,

direkteman. I plito Gouvernman pe repey son det atraver *SeyCCAT*.

E sa nou konnen i en larzan ki sorti kot Leta. E i enportan ki nou kontinyen swiv, bann mezir ki annan ki pou fer avek *Public Finance Management Act*. Akoz i bann larzan ki teknikman i annan en lentere piblik ladan.

Me nou annan osi bann sours finansman etranze, kot sa bann donater zot menm zot pa toultan oule ki Gouvernman i annan swa en kontrol, swa en *oversight* lo sa ki zot pe donner, koman en *Grant* ouswa en don avek Sesel.

E zot ti a voudre ki atraver zot mekanizm, ki zot annan, zot annan en ekivalan sistenm pou *monitor* bann larzan ki zot pe donner. Parfwa sa bann sistenm i osi egzizan. E parfwa pli egzizan ki nou annan dan pei.

Me i *still* reste ki dan bann rapor final, ki *SeyCCAT* i pou prepare, sa bann larzan e son bann rikord ki vin avek, i pou *still* ganny - i pou ankor vizib pou Lasanble Nasyonal. E zot pour kapab, osi konpran egzaktaman kwa ki'n pase dan sa bann sours finansman.

Savedir i pa vedit ki, nou pe annan nou de rezim;- enn ki pour vizib pour pep Seselwa ek Lasanble e lot ki pou envizib. Me plito nou pou annan diferan, rezim pou diferan sours finans. Me selman evantuelman letan nou ralye, tousala anba en rapor pou *SeyCCAT* - son rapor odit ek son bann rapor aktivite sirtou. Akoz Oditer Zeneral pou napa en lizeye ladan. Me son rapor aktivite sa bann, lenformasyon i pou *still* aparet. E kekyon i kapab ganny demande lo la.

Mon pou demann CEO Mr Speaker, pou koz enn pti pe lo bann *Grants* ki'n ganny donner an 2021. Onorab in nonm 54, an 2021 total. Mon a zis demann CEO pou donn en kontrandi, bref lo bann *Grants* ki'n ganny donner anba *Blue Grants Funds*. Mersi.

MR SPEAKER

Minis eskiz mwan i pa annord, pou *CEO* pran laparol, dan sa staz. Si i kapab pas ou sa bann sif e ou kapab pas lo la. Kantmenm i pa soz. Si i pa materyel pou ou, *general merit of the Bill*, letan nou al dan Komite definitivman i a kapab eksplik plis.

MINISTER FLAVIEN JOUBERT

Mr Speaker, mon a donn bann sif briyevman. Ziskan 2021- depi 2017 savedir *Blue Grants Fund* 1 ziskan 5 - 56 proze in ganny finanse ek en valer total R34milyon, ouswa \$2.365milyon.

E la aktyelman nou dan faz, *Blue Grant Fund* nimero 6. E nou ekspekte ki, byento nou pou kapab pe sinyen pou aprouv ankor en seri proze ki pou azout ek sa 56 ki'n deza ganny aprouve.

E sa 56 aktyelman pa tou ki deza konplete, me i annan en bon pe ki zot in fini ganny rapor final. E zot sityasyon finansyel in fini ganny, ganny met annord.

Alor ziska konmela, 56 proze finanse anba *SeyCCAT*. E nou annan e nou en nouvo *batch* ki fini dan sistenm la. I pe ganny evalye. E nou ekspekte ki Novanm nou pou anons nouvo lalis ki pour finansman anba *Blue Grant Fund* sizyenm. Mersi Mr Speaker.

Mr Speaker i annan Onorab, Hoareau in osi koz lo bann *NGOs*. E i annan lezot Onorab osi ki'n koz lo ouver laport, e ouver portfolyo pou plizyer bann *NGOs* ganny akse avek sa fon. Mon'n note ki Onorab Cosgrow in osi, koz lo elarzi portfolyo. Mon'n osi note ki Onorab Woodcock in osi koz lo bann *NGO* pou zot konpran ki mannyer keksoz i ganny fer. E pour zot kapab aks, finansman anba *SeyCCAT*.

SeyCCAT i aktyelman pe revwar, i dan *process* pe revwar son stratezi, pour finansman anba *Blue Grant Fund*, pou adres sa bann size ki annan pou fer avek akse, e avek fasilite li menm. An prenon kont bann leksperyans ki'n ganny fer ziska konmela, avek bann dimoun ki'n deza partisip dan proze.

Avek 56 proze, gro ek ptipti, nou annan ase lenformasyon, pou kapab evalye ki mannyer bann dimoun in pase. Konpran ki bann difikilte ki zot gannyen, konpran listwar sakenn sa bann proze, e apresye osi kapasite ki annan dan pei, pou kapab anbank lo sa bann kalite travay.

Nou a realize ki pa tou dimoun ki kapab fer sa bann travay. Me *SeyCCAT* i annan en fasilite pou aktyelman, akonpany bann ki pe partisip dan proze. E pour asire ki zot kapab ganny, akse avek finansman dan en fason fasil.

Be selman nou bezwen dakor ki ou bezwen annan en *minimum* konesans e en *minimum* kapasite pour ou fer bann proze parey. Akoz letan nou pe get bann, *Grant* ki *SeyCCAT* i pe donner, nou pe koz depi R100mil an montan ziska mon krwar R2milyon.

Alors si ou pe koz en sonm ant 100mil - R2milyon, ou pou bezwen kapab annan en bon kapasite pour ou *manage* finans, e pa vwar ou dan en sityasyon avek ou group, kot ou drwa kekyon kot i konsern lafason ki larzan, in ganny servi.

Alor i enportan ki *SeyCCAT* i travay lo sa sipor, e parey mon'n dir atraver sa revi nou pou kapab travay lo sa sipor. Nou pou kapab anmenn plis sipor, pou bann dimoun ki pe partisip dan sa programm.

Me an menm tan nou bann dimoun osi, fodre ki nou zwenn ansanm, rod bann kapasite pour nou kapab zer sa kalite larzan ki nou pe koze, an term ganny *SeyCCAT*.

Me solman osi, i ti a bon fer remarke Mr Speaker ki *SeyCCAT* pa zanmen donn larzan zis koumsa. *SeyCCAT* i verifie ki ou bann sistenm i annord, i tyeke ki letan in donn ou, premye trans, ou pe aktyelman servi li byen.

E ou kapab kontinyen ganny akse, avek finansman. E in annan de ka resan kot letan verifikasyon in ganny fer, bann zofisye *SeyCCAT* in vwar poudir,

lafason ki larzan in ganny servi, pa toutafe lo sa nivo, alor zot in arete.

E zot in antre an kontak ek sa lorganizasyon pou zot kapab travay avek li, konpran egzakteman kwa ki pe arive, pou evite si ou anvoy ankor larzan, i kapab prezan komans al dan difikilte kot prezan nou pou vwar nou pe bezwen al *investigate*, bezwen al odit bann lorganizasyon.

Konplikasyon manual parey mon dir i annan en revi. Nou ekspekte kapab, annan diferan fason e diferan nivo, ki dimoun i kapab akse sa bann sours finansman dapre zot kapasite, dapre groser zot proze. E sa ki pli pti osi, nou kapab vin ek en sistenm kot zot ganny en sistenm kot i pli senplifye.

La Mr Speaker mon ti a kontan osi, koz lo lefet ki dan lepase nou a rapel ki ti annan en lot *Trust*, ki ti pe siport aktivite lanvironnman e sa se *Environment Trust Fund*. *Environment Trust Fund*, i annan serten sanzman ki'n ganny fer avek son Lalwa. E ozordi *Environment Trust Fund*, i retrouv li en pe kwense anba Departman Lanvironnman.

E nou, nou ti a voudre ki *Environment Trust Fund* i vin sa pli pti sours finansman ki egziste akote *SeyCCAT*, pou siport tou groser group dan lanvironnman dan Sesel, ki fer ki letan en lorganizasyon i annan en pti proze, (nou pe koz bann pti proze parey 25mil, 50mil) li osi i a kapab ganny akse avek. E dan en fason ki bann lorganizasyon i a kapab grosi.

Akoz nou vwar ki bann dimoun zot, ganny leksperyans anmezir zot ale, zot fer premye *round*, zot fer dezyenm *round* ganny leksperyans. E si nou annan en pti sours finansman, zot a kapab komans ptipti zot a kapab fer aktivite, zot ava aprann, zot a kapab komans abitye avek, bann rezim kontrol ki egziste.

E la zot a kapab agrandi, e fer ki zot a devlop plis e kapab, akse bann pli

gro sours. E menm, pour kwa pa en zour akse bann fon - en *Grant* R2milyon?

Poursantaz *Blue Investment Fund* Mr Speaker, mon'n mon pa'n byen atrap, konsern Onorab kot i konsern *Blue Investment Fund*. Me *Blue Investment Fund*, zis pour klarifye - *SeyCCAT* i administre en bout sa fon. *SeyCCAT* i administre sa zis sa bout kot larzan i ganny donner koman *Grant*. E sa i zwenn avek larzan ki *SeyCCAT* pe gannyen sorti dan *debt swap*.

E se pour a rezon ki *CEO*, in eksplike dan dokimantasyon. E mon'n lir sa pli boner. I annan \$700mil ki *available* pour finansman. Sa lot bout *Blue Investment Fund* ki larzan i ganny prete pour bann poze devlopman dan *Blue Economy*, sa i ganny administre par *Blue Economy Department*. E sa i ganny fer atraver *DBS*.

Me selman mon mazine si Lasanble Nasyon al enterese, pou konn en pe plis kwa ki pe pase avek sa sours finansman, nou a kapab, notifie sa Departman e zot a kapab donn Lasanble, lenformasyon pli detaye lo kote zot ete ek sa *Blue Investment Fund*.

Poursantaz Bidze anyel 25-30 pousan pou administrasyon. Sa 30pousan in ganny diskite menm avek *TNC*, *Nature Conservancy* ki en partner prensipal dan *SeyCCAT*. E nou'n dakor ki zot kapab ale lo kote administratif ziskan 30pousan e administratif, bann *cost* i ase, i ase *straight forward*.

I bann *cost* ki asosye, avek mon krwar i annan *payroll*. Prensipalman se pour, siport *payroll* lorganizasyon e apre i bann kou ki nou'n bezwen sibir pour fonksyonnen. Par egzanp lofis, kominikasyon bann *utilities* par egzanp elektrik, eksetera.

E osi i annan en transpor ki ganny mentenir par *SeyCCAT*. E sa i osi kouver son *cost*. Alor nou'n vwar ki letan nou pe get loperasyon sa Sekretarya *SeyCCAT*, nou bezwen aziste enn pti git pour li kapab ganny ase, pou siport pour son aktivite. E *Board* ek *TNC*, in dakor

ki sa i kapab monte pou ariv ziska 30poursan.

Me parey zot vwar dan Lalwa i *up to 30* poursan. I pa vedir ki, toultan zot pour servi 30poursan, sa sonm. I posib ki si i annan ase resours, e si par egzanp bann aktivite pe depann lo bann *Grant* ki ganny servi, ki gannyen avek bann lezot sours. Zot pa pou arive 30poursan of sa reveni *SeyCCAT*.

Lot pwen se lazenes, Onorab Cosgrow in koz lo elarzi portfolyo anba *Blue Grant Fund*, e konsider bokou plis bann linisyativ ki annan pou fer avek lazenes.

Mon krwar i annan en keksoz ki nou bezwen travay lo la en pe plis se, ki mannyer bann zenn i ganny sa konfidans pour zot kapab devlop bann proze, e anbark dan bann, aktivite kot zot kapab akse sa bann sours finansman?

Parey mon'n dir i annan diferan fason pou bann dimoun grosi, zot kapab grosi atraver bann ptipti *Grant*. Ki si nou fer fasilite *available* zot a kapab, aksede. E apre zot ava grandi en pe plis e akse bann pli gro *fund*. Akoz bann lazenes, zot annan bokou lide. Me pa tou ki annan kapasite pou *manage* fon, e pa tou ki annan sa leksperyans pour *manage* bann fon.

Me toudmenm mon krwar, mon pou dakor ki nou kapab dan nou stratezi ki nou pe vin avek dan sa revi, ki byensir, si Manm Lasanble Nasyonal i osi anvi vin en partisipan an sa revi zot a kapab ganny en lopinyon ladan.

Nou pou osi get e ki mannyer, ki bann group ki nou kapab targete, pou ankouraz zot pour partisipe. Sirtou bann group ki dan lepase zot pa'n, zot ganny en pe defavorize dan sa sistenm. E mon krwar i annan en pwen ki, mon'n tann *Leader of the Opposition* koz lo la, se serten dimoun ki ou'n vwar pe partisip dan sa bann proze. E petet i annan lezot group, ki ti merit osi pe ganny akse avek sa fon.

E dan nou stratezi, sa osi nou pou gete, ki mannyer bann diferan dimoun i kapab ganny akse avek sa fon li menm.

Ou'n koz lo - *Leader* Lopoziyon in koz lo akse avek fon. Pli pros avek bann diferan group dan kominote. E fer li pli ouver avek tou bann diferan dimoun, e pour kwa pa donn akse avek, donn sipor pou bann dimoun kapab devlop proze. I annan sa propozisyon pou annan, en parey dan term - bann lorganizasyon ki donn bann don. *En Project Preparation Grant*, e *SeyCCAT* pa ankor dan sa staz kot i pe donn en *Project Preparation Grant*.

Me selman ansanm avek, lezot mezir ki egziste, par egzanp *PTF*, i kapab ariv en staz kot sirtou pou bann gro poze, kot nou pe koz R2milyon, i kapab annan en premye don, ki - Mon'n ganny konfirmasyon ek *CEO*, ki nou'n deza *issue Project Preparation Grant* pou bann proze ki ase konplike.

E ki bezwen sipor pour zot kapab devlop zot kapab devlop zot nide proze. Alors sa mekanizm in deza komans ganny met an aplikasyon. E i annan bann posibilite, kot letan i annan en group, ki i vwar li pe devlop en gro proze, i bezwen sipor en pe pli spesyalize, i kapab demande, pour li ganny en porsyon larzan, ki ganny servi pour preparasyon proze, pou ed li devlope avan, ki i lans dan son soumisyon final.

I annan bout ki Onorab *Leader* Lopoziyon in koz lo la se, presyon sorti kot Minis ouswa, lenfliyans Minis lo kote *SeyCCAT*.

Onorab mon krwar sa pwen kot i konsern, Minis li menm, mon krwar in fer kler i annan prezantasyon ki mon'n ekoute dan lasal la, Minis napa en drwa an plis lo *SeyCCAT*, akoz *SeyCCAT* i sipoze en antite ki debout lo li menm. E ki napa, sa depandans lo okenn personn. Menm si i annan Minis i ganny dezinyen koman sa *ex officio*, ki a latet sa *Board*.

Me selman Minis napa drwa annan, okenn - egzers okenn presyon ki

pa an deor normal lo sa lorganizasyon. Akoz sa lorganizasyon, i sipoze endepandan. E son bann *Board* i sipoze pe *manage* tou son bann biznes e kontrol tou son finans.

Alors lo sa kote, mon kapab reasir Lasanble ki travay Minis i sipoze pou fasilite louvraz, *SeyCCAT* e non pa pou antre e egzers okenn Lotorite dan okenn fason, lo travay ki *SeyCCAT*, i fer.

Lo kote lorganizasyon non-gouvernmental, Onorab in koz en pe lo seksyon 7.

Lo amannman seksyon 7, kot i annan serten, sanzman ki pe ganny fer lo lafason ki bann dimoun i ganny apwente dan pou diriz sa lorganizasyon. Onorab sa pwen mon'n fer enn pti diskisyon vitman avek *Attorney Zeneral*. E i annan en morso ki mon krwar nou pou bezwen koriz enn pti gin ladan. E fer sir ki i kler akoz, petet i napa ase klarite lo lafason ki sa travay pou ganny fer.

Me selman, enn bann keksoz ki kler se ki Minis son prezans lo *SeyCCAT* i otomatik, *basically* ou annan de dimoun ki otomatik lo *SeyCCAT*. Enn se *the Minister* e lot se zofisye, dan *Nature Conservancy*. E apre tou bann dimoun i ganny apwente, apre sa ki ou ganny sa 7 lezot dimoun ki ganny apwente ansanm avek zot. Alor lentansyon sa amannman se pour ou fer sa vin en pe pli fasil pou fer, e non pa annan en sityasyon kot dimoun i en pe konfize lo lekel ki sipoze apwent lekel.

Me si i annan okenn klarifikasyon, nou a met sa dan lanmen *Attorney Zeneral*, i ava re-klarifye, e versyon final sa *Bill* i ava vini, nou kapab vwar si sa satisfere, ouswa si letan ou pe lir li, ou pou vwar li byen kler. Lentansyon se ki ou annan de dimoun, ki otomatikman antre, koman Direkter lo sa *Board*.

E apre i annan en prosesis kot sa 7 lezot i ganny apwente pou konstitye sa *Board* e i fer 9 dimoun lo sa *Board*.

Oversight par Lasanble Nasyonal, parey mon ti'n klarifye pli boner, mon

krwar *Leader* Lopoziyon in fer sorti le pwen, ki enn se ki sa lorganizasyon i ganny, e i egziste, par en desizyon Lasanble Nasyonal, e alor i drwa Lasanble Nasyonal en serten ekspoze lo sa ki li i fer koman en lorganizasyon.

Sa i pa mwan ki pour argimante. Me selman parey ou'n tann Onorab Henrie in eksplike dan son prezantasyon, Deputy Speaker, i pou annan mekanizm par ki Lasanble Nasyonal i kapab vwar egzaktman, e dan en fason byen kler kwa ki sa lorganizasyon pou fer.

Sa lorganizasyon i pa neserman bezwen met son plan travay devan Lasanble ek son Bidze ki pe al servi. Me letan in fer tou son bann aktivite ki i annan pou fer, e letan in fer tou son bann travay evalyasyon, odit lo son bann Bidze, i oblize met devan Minis. E Minis i oblize soumet sa avek Lasanble Nasyonal.

E alor i annan sa posibilite pour Lasanble Nasyonal vwar e kestyonn travay ki *SeyCCAT* in fer. E kestyonn bann rezilta ki'n gannyen, e kestyonn lafason ki bann larzan ki pe ganny anvoye, kot sa *Trust* i ganny servi.

Alor i pou annan sa relasyon ki pou reste, e mon asir ou ki *SeyCCAT*, Lasanble Nasyonal pou toultan vwar kwa ki pase dan sa lorganizasyon, san ki i pou bezwen fer en lot prosedir kot Lasanble Nasyonal i bezwen vin demann li, lenformasyon.

So otomatikman Lasanble Nasyonal, i pou vwar lenformasyon ki *SeyCCAT* i prodwir. E sa i kler dan sa propozisyon ki'n ganny fer e osi, dan sa amannman ki'n ganny propoze par Onorab Deputy Speaker. Lot pwen Mr Speaker se, konpromi ant bann diferan lentere dan lespas maritim Sesel.

E ki mannyer nou pou balans sa size, *human rights* avek proteksyon lanvironnman. *Human Rights* avek proteksyon lanvironnman, Mr Speaker, mwan mon poudir ki i ganny balanse, par lefet ki pou deside lo lekel sa bann

morso dan lespas maritim Sesel, ki vin anba proteksyon.

In annan omwen 250 miting ki'n ganny fer avek bann *focus groups*. Diferan group, avek diferan lentere dan lespas maritim Sesel dan en peryod ase long. E i enn bann prosesis ki'n pli konpreansiv, ki nou'n annan dan pei ziskan ozordi.

E tou rikord tou sa bann lo tou bann konpromi, e tou bann diskisyon i la. E alor letan nou pe koz lo deklar 30poursan nou lespas maritim koman *zone* proteze, sa nou devret vwar li koman en gran konpromi ki'n ganny fer parmi en gran group dimoun, ki'n zwenn pou en kantite letan.

E ki'n pas zot letan pou al dan tou detay sa bann, *zone* e ki'n ganny maksimonm lenformasyon, lo kwa ki pase dan sa bann landrwa.

Alor i pa tro en keksoz ki nou devret pe enkyet akoz, laplipar bann *partners* e mon poudir preski tou bann dimoun ki'n enplike, zot in finalman kapab dakor lo sa bann *zone*. E sa bann *zone* i reflekte parey mon'n dir, i en konpromi nasyonal, dan en fason. Akoz mon pa tro asire si i annan ankor lezot group ki pa'n konsilte dan sa prosesis.

Alor letan nou pe koz sa bout *human rights* ek proteksyon lanvironnman, i ase kler ki sa ki nou pe get devan nou koman, *zone* proteze dan *EEZ*, i aktyelman en keksoz ki in trouv en balans, kot nou'n kapab trouv en balans e ki i en konpromi, ki nou kapab viv avek tou dimoun, dan pei.

Mr Speaker, Deputy Speaker in donn nou plizyer pwen, Deputy Speaker mon pa konnen si mon'n kapab *capture* tou ou pwen. Akoz keksoz ti pe ganny lir en pe vit.

Me selman nou ava lo, ou bann pwen ki ou'n mete, ou'n koz lo bann *other expenses*, ki kalite bann *other expenses* ki kapab ganny *approve by the Board*.

E sa Onorab i, tou bann lezot *expenses* ki kapab - nou pa konnen akoz

i annan *expenses* ki parfwa i leve, ki i pa neserman liste dan Lalwa. E *the Board* i bezwen annan sa fleksibilite, pour li kapab fer sa bann travay. Me selman toultan reste, annakor avek lentansyon sa Lalwa. Alor i pa en laport ouver pou *the Board* komans kree bann nouvo form *expense* ki pa annakor avek travay, avek travay *SeyCCAT*. Me i bann i keksoz ki nou bezwen fer, e ki parfwa ou bezwen ou vwar ou ganny limite par Lalwa.

Mon a donn ou en legzanp, parey i annan bann lenvestisman ki an *unexpected*, i kapab ki *SeyCCAT* i ganny posibilite pour li kapab fer serten lenvestisman. I annan serten kot ou bezwen fer *co-financing* pou ou kapab ganny en *access* avek en fon. Ou konnen poudir dan bann, dan lemonn finansman enternasyonal i annan de moman, kot pou ou ganny akse avek en finans, en sours finansman, ou pou bezwen miz larzan pour ou ganny *access* avek sa sours finansman. Me dan Lalwa i pa tro kler, sa si ou kapab fer.

Me ou pou bezwen fer, be ou pou bezwen fer sa bann kalite depans pou ou kapab *access* bann lezot finans. E alor i enportan ki nou kapab annan sa fleksibilite pou nou kapab - pou *the Board* kapab, idantifye sa bann kalite finans, e aprouve pour *SeyCCAT* i fer sa bann depans, byensir dapre bann limit e dapre bann lentansyon sa Lalwa, *SeyCCAT*.

So nou pa pe sorti an deor, sa ki *SeyCCAT Act*. E lorganizasyon *SeyCCAT* li menm in ganny met an plas pour li fer. I annan en amannman ki, Onorab in koz lo la, se amannman dan 6(a) mon krwar.

Ok mon pe ganny leksplikasyon ek *CEO* la se ki, i retir en limitasyon, limit en pe lafason ki nou depans larzan, pour diferan kalite aktivite. E sirtou i relye avek travay ki pe ganny fer anba *Marine Special Plan*.

Mon pe sey rod son lozik Onorab, me selman son lozik, se ki i tir en limitasyon ki ti egziste ki anpese ki

SeyCCAT kapab fer serten depans. *One second.*

Ok, wi sorry Onorab, Mr Speaker eskiz mwan pour sa pti koupir la. Sa i annan pou fer avek *total aggregate funds* ki *SeyCCAT* i servi dan en lannen. E alor sa limit 5 poursan i fer si nou annan e fon, total ki enkli larzan ki *SeyCCAT* ki gannyen *from debt swap, plus* lezot sours finansman. E ou pe limit li a 50poursan, i limit lafason ki ou kapab servi ou larzan, pou ou fer ou bann aktivite. Byensir sa *cap*, nou pe propoze ki i ganny tire.

Me se lannen parey nou dir i ganny fer, avek kontrol *the Board* e avek tou bann mezir prekosyon ki ganny met an plas, pou asire ki larzan pa pe depanse an deor manda *SeyCCAT*.

Alor i pa elarzi lafason ki larzan i kapab ganny servi, me i permet ki plis bann reveni ki *SeyCCAT* i ranmase, i kapab ganny depanse dan diferan laliny ki *SeyCCAT* i sipoze pe fer. E non-pa limit li lo 5 poursan, ki fer ki ou pou vwar ou, parfwa serten aktivite ki prezant son leko, ou pa pou kapab al plis ki sa. Akoz ou pou annan en limitasyon lo sonm total ki ganny, permet anba Lalwa.

Kot i konsern *Public Management Act*, Onorab ou ti'n koz lo seksyon 18, amannman seksyon 18. Sa mon krwar nou'n koz lo la. Se ki... wi nou ti'n koz le lefet ki par regilasyon, e nou pou bezwen fer sir ki nou kapab vin ek sa regilasyon deswit - nou etabli egzakteman ki bann Lalwa, ki devret aplike pou diferan sours finansman. E nou defini byen kler, lekel bann sours finansman ki *subject to Public Finance Management Act*. E lekel bann sours finansman ki ganny *subject to* lezot mezir, ki ava ganny determinen atraver laranzman, ki annan ant *SeyCCAT*, ek sa sours finansman, sa don ki pe ganny resevwar sorti an deor Sesel sirtou.

Me lenportans Mr Speaker se ki, letan nou pou met sa bann mezir an plas, nou pou bezwen *still* ensiste ki tou sours finansman i bezwen annan ou

sistenm kontrol. E tou sours finansman i bezwen annan sistenm raporte.

E tou rapor i bezwen ganny enkorpoze dan rapor final ki sorti pour tou dimoun kapab vwar, e konpran egzakteman kote bann larzan *SeyCCAT* pe ganny servi. E sa en keksoz ki nou pou bezwen met dan Lalwa, dan sa relasyon. Ki fer ki napa okenn sours finansman ki antre, ki ava sape e ki evantuelman dan lefitir.

Depandan lekel ki la, koman *CEO* ouswa koman *Board*, zot pa kapab vwar zot annan en posibilite pou pran larzan, pou fer en keksoz ki an deor lentansyon Lalwa *SeyCCAT*.

Seksyon 25 Onorab, Deputy Speaker in koz lo sa bout kot keksoz i ganny *laid before the National Assembly*. Mon krwar ou'n eksplik byen kler, kot nou pa pe koz lo *SeyCCAT* prezant son *work plan* devan *National Assembly*.

Me i oblize anvoy son bann dokiman kot Minis, e Minis dan en peryod si mon rapel byen i trwa mwan, i oblize soumet avek Lasanble Nasyonal, tou sa bann lenformasyon, son rapor aktivite ek son rapor odite.

Ek tou bann lezot odit ki'n ganny fer, lo bann lezot sours finansman ki'n resevwar, devan Lasanble Nasyonal en fason ki nou ava kapab, annan sa latransparans dan sa, *process*.

Zis pou retourn an aryer enn pti pe Mr Speaker, en pwen ki nou'n koz lo la briyevman, ki mon'n koz lo la briyevman boner, e ki mon krwar i enportan ki bann Manm Onorab i note, se ki, dan Lalwa ki pe ganny propoze i osi annan obzervater, ki prezan pou swiv tou bann tranzaksyon ki *SeyCCAT* i fer atraver son bann *Board* miting. E sa i enportan akoz, i donn sa posibilite pou annan plizyer lizye, menm bann ki pa form parti *Board*, pou zot swiv egzakteman, ki pe arive letan *SeyCCAT* pe fer son louvraz.

E zot, zot napa en lentere dan sa lorganizasyon. E zot kapab donn lopinyon, ouswa kapab annan en

lopinyon endepandan lo sa ki pe ganny fer. E zot osi kapab, fer okenn *whistle blowing* lo okenn keksoz ki zot remarke, i pa normal dan travay *SeyCCAT*.

E sa i en lot, mezir transparans ki mon krwar i kapab osi ede pou fer ki *SeyCCAT* son bann tranzaksyon i ganny fer normalman. E ki tou son bann rapor i reflekte egzaktman sa ki li, i pe fer koman en lorganizasyon. I napa okenn pert, ouswa okenn larzan ki pas dan en lot fason. E apre nou bezwen vwar nou avek en difikilte avek sa *trust*.

Mon mazine Mr Speaker, petet Onorab Deputy Speaker i kapab dir mwan si i annan okenn pwen ki mon'n manke, i annan detrwa pwen ki mon'n not en pe briyevman la.

MR SPEAKER

Minis, Minis les mon a zis eklersi prosedir enn pti kou pou ou. Sa ki nou pe fer la se, *general merit of the Bill*. Prensip an zeneral. Bann lamannman spesifik nou pou ganny sans pas lo la demen dan Staz Komite, e sa ki nou bezwen fer la se satisfere Manm, ki zot konpran byen ki sa *Bill* i ete. E nou pa bezwen konsider, bann detay.

So mon krwar nou kapab gard sa prosedir, si ou kapab zis konklir lo merit zeneral. Nou a kapab pran detay demen.

MINISTER FLAVIEN JOUBERT

Mersi Mr Speaker, pour sa klarifikasyon. Alor ler mon get lo merit zeneral ki in ganny mete la ankor devan mwan. Sel keksoz, ki mon krwar i reste se i annan sa size langazman kominoter, ek reprezantasyon laznes lo *Board*.

Sa i pou ganny fasilite par nou sistenm nominasyon, kot Gouvernman i kapab konsilte nenport ki lorganizasyon dan pei. E byensir si, nou krwar i devret annan plis zenn e mwan mon krwar i devret annan bokou bann dimoun ki ase nouvo dan sa *field*. E nou annan en kantite dimoun konpetan kapab fer sa bann rol, nou kapab osi anmenn zot.

E fer ki sa bann dimoun i partisip aktivman dan louvraz *SeyCCAT*. Akoz parey nou'n dir, *SeyCCAT* in ganny fer par - in ganny kree detrwa lannen pase, par plizyer dimoun ki ozordi zot bann profesyonnel dan finans, eksetera.

Me ti a byen si nou ganny nouvo dimoun ki annan nouvo nide. E sirtou enn bann keksoz ki *SeyCCAT* pe travay en pe for lo la se, elarzi bann varyete, soumisyon ki ganny fer. Akoz nou vwar ki bokou bann proze ki ganny soumet ek *SeyCCAT*, i dan bann laliny ase etrwat, i ti a byen si nou ti annan nouvo dimoun, ki annan nouvo nide, ki kapab vin devan avek bann nouvo panse.

Pou anmenn bann proze ki en pe inovativ, en pe an deor sa ki nou abitye fer. E alors si nou kapab ganny bann zenn, mon krwar i pou ede dan sa laliny.

Alor avek sa Mr Speaker, mon ava aret la e mon ava retourn laparol avek ou. E nou la pou reponn okenn kestyon, ki bann Manm i annan. Mersi.

MR SPEAKER

Mersi Minis, pou ou *summing-up*. Nou ava aprezan vot lo *general merit of the Bill*. Manm ki an faver, lev lanmen silvouple?

Thank you, mon krwar tou Manm in vote. Zis pou fer sir, okenn Manm ki kont?

Bon vot lo *general merit Conservation and Climate Adaptation Trust of Seychelles (Amendment) Bill, 2022*. 32 Manm in vot pour, 0 kont e 0 abstansyon. Alor mon annan gran plezir pou anonse ki *Bill* in aprouve inanimite, par Lasanble.

Bon i reste nou travay Komite kot nou pou pas lo bann detay, amannman. Nou a rezerv sa pou demen. La nou a termin avek *Second Reading* Madanm Clerk, *Formal Second Reading*.

MADAM CLERK

Mersi Mr Speaker *A Bill for an Act to amend The Conservation and Climate*

Adaptation Trust of Seychelles Act. Mersi
Mr Speaker.

MR SPEAKER

Mersi. Minis ek ou *panel* nou pou
bezwen ou ankor demen, nou *adjourn* la.
E nou a rebran 9er bomaten demen.
Mersi. *Adjourn*.

(ADJOURNMENT)